

Vaaru poia tau Yoan iboode Jon—John

Neer tau ipaghazonai ghiit pa saveen ve ngar to Maaron, ta izilam taan gha imin tamtamon

¹ Muun geeg, saawe tau sambam ve taan tivot soone, neer tau ipaghazonai ghiit pa saveen ve ngar to Maaron na ilepleep. *

I ileep tomania Maaron, ve i Maaron. *

² Tauvene saawe tau imin maata kat, i ilepleep tomania Maaron. ³ Maaron ighur gabua tisov tivot ila i niima. Gabua eta ivot ila eez ite paam mako. *

⁴ I tauu ta imin puughu pa lepoogh to gabua tisov. Ve lepoogh tooni izi taan, tauta imin ghazonja pa tamtamon. *

⁵ Ghazonja tawe isul ila ndoroom loolo, ve ndoroom tapiri irau itatani mako. †

* **1:1:** Ila Grik alinjazi, Yoan iwaat Kriisi ighe i ‘logos.’ Saveen ‘logos’, puughu naol. Puughu ee, ene ‘saveen.’ Puughu ite, ene ‘ngar.’ Puughu imin tol pani, ene gabua tau ikis gabua naol isov tigheen duduun ila niazi niazi. Ve isaav ighe tagham ngar pa Maaron aliinja tau tiboode na, saveen tooni, ene eez tau i itotoi tauu pait, ve ipaghazonai ghiit pa ngar tooni. Ve saveen tooni, ene saveen mon mako. Saveen tooni, i le tapiri. Maaron isaav mon ve gabua naol isov tivot. Saveen ‘logos’ puughu naol tane ipaghazonai ghiit pa Kriisi ve uraat tooni. *

1:1: Gnp 1:1; Yo 10:30, 17:5; Ro 9:5; Pil 2:6; 1Yo 1:1+; Syg 19:13 *

1:3: 1Kor 8:6; Kol 1:16+; Hib 1:2

* **1:4:** Yo 5:26, 8:12, 9:5, 12:46 † **1:5:** Eez ite to tatoor ziiri tane, ene vene: “Ghazonja tawe isul ila ndoroom loolo, eemon yes to ndoroom lezi ghilaloonj pani mako.”

⁶ Maaron imbaan̄ ñeer ee ilam, eeza Yoan. ⁷ I ilam to ipariaan̄ saveen̄ to ghazon̄a tana. Leso igham tamtamon tisoṽ tighur ila tooni. *

⁸ Yoan, i ghazon̄a tana mako. I ilam to ipariaan̄ saveen̄ to ñeer ta ghazon̄a tauu. Leso tamtamon tighur ila tooni. *

⁹ Tauvene ghazon̄a tauu, ta isul tamtamon tisoṽ ve ipaghazon̄ai zi pa Maaron, tauta izilam taan. *

¹⁰ Onoon, gabua naol isov to taan tivot ila i niima. Eemon saawe tau i izilam ve ileep izi taan, yes tau titaghon taan ñgara na tighilaalo mako. ¹¹ I ila ivot tauu nugh tooni, eemon tamtamon tooni paam tighamu mako. Tizori. *

¹² Eemon tamtamon tisoṽ tau tighur ila tooni ve tighamu imin Tiina toozi, ene i igham lezi ezazi to timin Maaron nat̄a. *

¹³ Zeran tawe, sin̄ to tamaz̄a ma tinaz̄a igham zi timin Maaron nat̄a mako. Yes timin Maaron nat̄a itaghon ñeer eta to taan ñgar tooni ma loolo mako. Maaron tauu igham zi timin i nat̄a. *

¹⁴ Aghita. Ñeer tau ipaghazon̄ai saveen̄ onoon ve ñgar to Maaron pait, tauta imin tamtamon ve ilam gha ileep ila sosoon. I itotoi Maaron tapiri ve poia tooni ivot ighazon̄, ve yei nighita pa matamai. Tauta nighilaalo nighe i Maaron tauu Naatu eemon tau ileep to Taama Maaron ve ilam.

* **1:7:** Mt 3:1 * **1:8:** Yo 3:28+ * **1:9:** Yo 8:12, 9:5; 2Kor 4:6

* **1:11:** Is 53:3; Yo 12:37+ * **1:12:** Yo 3:15; Ro 8:14+; Ga 3:26;

1Yo 3:1+ * **1:13:** Yo 3:3, 5+; Tit 3:5+; 1Pe 1:23; 1Yo 5:1+

Poia to Maaron tomania ngar tooni tau isasavia saveen onoon mon, ene ivon ila to Naatu tawe. *

¹⁵ Yoan ipariaan tamtamon to tighur ila tooni, ve isaav pazi toman aliina tiina ighe: “Muun, yau nasaav payam naghe: ‘Neer ee pale ilam murei payau. I eeza iliiv ghau kat. Pasaa, saawe tau navot soone, i ileep muun wa.’ Ene neer tauta ene.”

¹⁶ Onoon kat. Ngar popoia kat ivon ila to Maaron Naatu, ve i irei poia tooni pa iit tasov. Tauvene poia to Maaron tau aazne izaa toit ne, ene iliiv kat pa poia tau muun i itotoia pa tamtamon.

¹⁷ Onoon, Maaron ivotia tutuun tooni pait ila Mose aavo. Eemon Yesu Krisi, tauta imin eez pa poia to Maaron izaa toit, ve ipaghazonai ghiit pa saveen onoon. †

¹⁸ Tamtamon eta to taan ighit katin Maaron naagho pai eta soone. Naatu mon, tauta ito-toi Maaron naagho ve ngar tooni pait. Pasaa, i Maaron, ve ileep Taama ziige, ve Taama loolo igheen tooni kat.

Neer rughuzaana Yoan ipariaan tamtamon to tighur ila to Yesu

(Mt 3:1-12; Mk 1:1-8; Lu 3:1-18)

¹⁹⁻²⁰ Saawe ee, daaba to yes Yuda tau tileep Yerusalem na, timbaan zeran siriv to watoonrau tomania nginiina siriv to Rumei Tiina tila to Yoan, ve tighasoni tighe: “Laak, yo saa neer, ta ughamgham uraat tane?”

* **1:14:** Pil 2:6+; Kol 2:9; 1Tim 3:16; Hib 2:14; 1Yo 1:1+ † **1:17:** Eez ite to tatoor mos ziiri tane, ene vene: “Eemon Yesu Krisi, tauta imin eez pa poia to Maaron izaa toit, ve igham saveen mbuaan to Maaron anoonja ivot.”

Yoan isaav ghazonja pazi ighe: “Yau tane, Mesia mako.” *

²¹ Tauvene yes tighasoni muul tigde: “Ige tauvene, na yo aat propet Ilia taa?”

I iyol alinjazi ighe: “Mako.” *

Tauvene tighasoni muul tigde: “Wai, ighe vene, na yo aat propet tiina tau nisanjani ne?” §

Eemon i iyol alinjazi muul ighe: “Mako.”

²² Tauvene tighasoni muul tigde: “Wai, ighe tauvene, na yo sei kat? Upaghazonjai taum payei lak! Leso nipaesi ghom poi pa yes tau timbaan ghei gha nilam ne.”

²³ Tauvene Yoan isaav pazi ighe: “Yau neer tau muun propet Isaia isavia na ighe:

Neer ee iboboob izi nugh nginaanja ighe:

‘Apadudunjai eez pa Neer Tiina le iduduun.’ ” *

²⁴⁻²⁵ Yes tau tila tighita Yoan na, zeran tutuunja siriv tila tomani zi paam. Tiloon Yoan aliinja tane, ve tighasoni muul tigde: “Isaav ighe yo Mesia mako, ve yo Ilia mako, ve yo propet tiina tau nisanjani ne mako, puughu mindai ta uru-rughuuz tamtamon?”

²⁶⁻²⁷ Yoan iyol alinjazi ighe: “Ene yau naru-rughuuz tamtamon pa yaa. Eemon neer ee ilepleep ila sosomim, ve yam aghilaalo mako. I ilam

* **1:19-20:** Yo 3:28 * **1:21:** Mal 4:5; Mt 11:14 § **1:21:**

Ilia, i propet ee tau muun ivotia Maaron aliinja pa yes Israela. Yes Yuda tigham ngar pa saveen tau igheen ila Malakai 3:1, 4:5-6, tauta matazi ingal tigde Maaron pale imbaan Ilia ila ivot pazi muul, lesa igharaat eez pa Mesia. Ve tigham ngar tigde Maaron pale imbaan propet tiina eta pazi, itaghon saveen to Lo 18:15-19. Siriv tigde propet tawe pale Mesia. Ve siriv tigde i pale igham uraat imin propet mon. * **1:23:** Is 40:3

murei payau, eemon iliiv ghau kat. Uraat sorok imin polaaj waar to zuzuunja to aaghe, ene paam, yau poiag irau to naghham pani mako.”

²⁸ Gabua tane ivot izi nugh Betania tau igheen yaa Yordan ziige ite. Pasaa, Yoan irurughuuz tamtamon izi ta sewe.

Yesu, i sipsip to Maaron

²⁹ Mboñ le nughizau muul, ve Yoan ighita Yesu ilaagh njaruini ilam. Tauvene isaav ighe: “Aghita. Ewe sipsip to Maaron. I ilam pa rewaan sosor to tamtamon to taan. *

³⁰ Neer tane, ta muun nasavia payam naghe: ‘Neer ee pale ilam murei payau. Eemon i iliiv ghau kat. Pasaa, i ileep muun wa, ra yau navot.’ *

³¹ Muun, yau paam naghilaalo mako. Eemon yau nalam to narughuuz tamtamon pa yaa, leso nagharaat eez pani, ve navotia pa yes Israela.”

³² Yoan ipariaaj zi to tighur ila to Yesu ighe: “Taug naghita Maaron Avuvu izilam imin man mbuun, ve ileep izala paavo. *

³³ Muun, yau paam naghilaalo mako. Eemon Neer tau imbaaj ghau nalam pa rughuzaaj tamtamon na, isaav payau ighe: ‘Saawe eta, yo pale ughita Avuvu Patabuyaaj izilam, ve ileep ila to neer eta. Neer tana, ta pale irei Avuvu Patabuyaaj pa tamtamon.’ *

³⁴ Ve aloon. Yau naghit katin gabua tana pa taug matag wa. Tauta nasaav ghazonja payam. Yau

* **1:29:** Igham 12:3+; 1Kor 5:7; 1Pe 1:19; Syg 5:6 * **1:30:** Muun geeg ve ilam, Yesu ilepleep tomania Taama Maaron izi nugh sambam. * **1:32:** Mt 3:16 * **1:33:** Mk 1:8; Yo 14:16; Mban 2:1+

naghur ila naghe ñeer tane, i Maaron tauu Naatu.”
† *

*Andreas gha Simon Petrus timin mbiwa to Yesu
(Mt 4:18-22; Mk 1:16-20; Lu 5:2-11)*

³⁵ Mboñ le nughizau, ve Yoan iyozyooz muul tomania mbiwa tooni ru. ³⁶ Yoan maata ila le ighita Yesu ilaagh ila. Tauvene isaav pazi ighe: “Aghita. Ewe sipsip to Maaron.” *

³⁷ Mbiwa tooni ru tawe tiloon Yoan isaav tauvene, ve yesuru tipul Yoan, ve tila titaghon Yesu. ³⁸ Yesu maata imuul, ve ighit zi titaghoni tilam. Tauvene ighason zi ighe: “Yamru ail saa?”

Yesuru tiyol aliina tighe: “Rabi, yo ulepleep sindei?” (Saveen ‘rabi’, puughu tauvene: ‘Padudunaañ.’)

³⁹ Yesu isaav pazi ighe: “Yamru alam tomani ghau, o aghita.” Tauvene yesna tila tighita ruum tau i ileep pani na. Saawe tana, ravrav izi wa. Aaz anunu igham paan ma vene. Yesuru tileep tomania Yesu le mboñ izi. ⁴⁰ Zeran ru tau tiloon Yoan aliina ve titaghon Yesu na, ee ene Andreas tau Simon Petrus taazi na. ⁴¹ Tilepleep le isov, ra Andreas iburig, ve malmali ila iil toogha Simon imin maata. Ila indeenja, ve isaav pani ighe: “Uloñ. Yei nighita Mesia wa.” (Saveen ‘Mesia’ ve

† **1:34:** Eez ite to tator saveen ziiri tane, ene vene: “Yau naghur ila naghe ñeer tane, Maaron isiigho ve ighuru pa uraat tooni.”

* **1:34:** Mt 3:17 * **1:36:** Yo 1:29

‘Krisi’, ene pughuzi eemon.) †

⁴² Tauvene Andreas igham toogha Simon, ve yesuru tila to Yesu. Yesu ighita Simon, ve isaav pani ighe: “Yo Simon, Yoan naatu. Murei pale tiwaat ezam tighe Kepas.” (Eez ‘Kepas’, yes Grika tiwaato ila alinjazi tighe ‘Petrus.’) § *

Yesu ipoi Pilip yesuru Natanael timin mbiwa tooni

⁴³ Mbonj nughizau muul, ra Yesu maata ingal ighe ila pa taan sirivu to Galilaia. Ilaagh ila le iza to neer ee, eeza Pilip, ve isaav pani ighe: “Yo ulam utaghon ghau.” ⁴⁴ Pilip nugh tooni, ene Betsaida. Pilip, Andreas, ve Simon, yes tol, nugh toozi eemon. ⁴⁵ Ra Pilip ila iil iitete Natanael le indeenja, ve isaav pani ighe: “Ulooj. Neer tau muunj Mose ibood saveenja ila tutuunj tooni, ve propet siriv tibood saveenja iza tooni paam, tauta aazne nighita wa! I eeza Yesu. I neer to nugh Nasaret, ve taama eeza Yosep.” *

⁴⁶ Eemon Natanael isaav pani ighe: “Wai, gabua poia eta irau ivot ila nugh Nasaret?”

Pilip iyol aliinja ighe: “Ulam tala, ve taum ughita pa matam!” Tauvene tiburig gha tila.

† **1:41:** ‘Mesia’, ene saveen Hibu, ve saveen ‘Krisi’, ene Grika alinjazi. English tighe ‘anointed.’ Saveen ziiri ru tane, pughuzi eemon: ‘Neer tau tilinj ngoreen izala paavo.’ Yes Israela tighamgham tauvene pa yes tau tighur zi pa ghamuunj uraat tiina pa Maaron, imin kinik toozi, yes propet, ve zeran to watoonrau. Tauvene, isaav ighe tiwaat tamtamon eta ‘Mesia’, ene tigham ngar tighe i kinik, ma propet, ma neer to watoonrau. § **1:42:** Kepas, ene yes Aramea alinjazi. Ve Petrus, ene yes Grika alinjazi. Eez ru tane, pughuzi eemon. Ene ‘maet’. * **1:42:** Mt 16:18 * **1:45:** Mt 2:23

⁴⁷ Yesu ighita Natanael injaruini ilam, ve isaav ighe: “Aghita. Njeer tau ilam ne, ene Israel tauu. Ngar karom eta igheen ila loolo mako.” *

⁴⁸ Tauvene Natanael ighason Yesu ighe: “Yo uwatagh ghau mindai?”

Yesu iyol aliina ighe: “Pilip isavi ghau payo soone, ve yau naghit ghom ulepleep ila ai fik saamba.”

⁴⁹ Natanael iloon saveen tane, ve ighe: “Rabi, yo Maaron Naatu. Yo mon ta kinik to Israel.” *

⁵⁰ Yesu iyol aliina ighe: “Natanael, mindai? Saveen tsiau tau naghe naghit ghom uleep izi ai fik saamba, tauta igham ghom ughur ilam tsiau ne? Uloon. Murei, yo pale ughita gabua tintiina siriv tau tiliiv gabua tane.” ⁵¹ Ve Yesu isaav pazi muul ighe: “Onoon kat, yau nasaav payam: Murei, yam pale aghita sambam ikaak, ve anela to Maaron tiyesyes taghon Tamtamon Naatu tizizi ve tizazaa.” * *

2

Yesu itoor yaa imin vaen izi nugh Kana

¹⁻² Mbon ru ilam ila, ve ite imin tol pani, ra vain to njeer ee ivot izi nugh Kana tau igheen izi taan sirivu to Galilaia. Yesu tiina ila ta sewe pa ghitoon

* **1:47:** Mbo 32:2; Ro 2:28, 9:6+ * **1:49:** Mt 2:2, 16:16, 27:42; Yo

12:13 * **1:51:** Saawe tau Yakop ighau pa toogha Esau, vivuun ee ivot pani, ve ighita gabua imin ndeet tau iyooz izi taan, ve izala pa sambam. Ve anela to Maaron tiyesyes taghon ndeet tawe tizizi ve tizazaa. (Ughita Gnp 28:12.) Gabua tana itotoi ghiit pa Yesu. Pasaa, i ilup Maaron to sambam ve iit tamtamon to taan, imin ndeet tawe. Ve i imin puughu pa lupuun to Maaron, imin Yakop imin puughu pa yes Israela. * **1:51:** Gnp 28:12

vainj tawe. Ve tisain Yesu tomania mbiwa tooni to tila paam. ³ Marewaan to vainj tana ivot gha tighanghan ma tighunghun ila ila le vaen isov. Tauvene Yesu tiina isaav pani ighe: “Ughita. Vaen toozi isov wa.”

⁴ Yesu iyol aliina ighe: “Tinan, yo usaav payau pasaa? Ene gabua to ituru mako. Pasaa, saawe to natotoi taug navot naghazon, ene soone.” ⁵ Ra tiina isaav pa yes besoonja ighe: “Aloon! Isaav ighe i isaav payam to agham gabua eta, na ataghon aliina mon.”

⁶ Ruum to ghanghaniin, tipayooz uur tintiina liim ve ee tau tigharaat zi pa maet na, ve titiv yaa ilonj ila, leso timin nimazi ma aghezi ve gabua siriv, le tingalaan itaghon tutuun to yes Yuda. Uur enaenja lolozi, ene irau titiv yaa 20 ma 30 galon ilonj ila.*

⁷ Yesu isaav pa yes besoonja tawe ighe: “Aiyo, ativ yaa ila uur tane le tisov tivon.” Tauvene tiloon aliina, ve titiv yaa ila uur tawe le tivoniir. ⁸ Ra i isaav pazi muul ighe: “Azov rigta, ve aghamu ila pa neer tau inginngin aniin to vainj tane, ve itoova.” Tauvene yes titaghon aliina, ve tizov rig, ve tighamu ila to neer tau inginngin aniin to vainj.

⁹ Saawe tau i itoova, yaa tawe itoora imin vaen wa. I ikankaan pa vaen tawe ilaagh mindai ta ilam. (Eemon besoonja tau titiv yaa tana na, yes tiwataghi.) Tauvene neer tana ipoi i tau ivai paaghu na ilam, ¹⁰ ve isaav pani ighe: “Saawe tau ghanghaniin tauvene ivot, ene tipapamuun vaen popoia ila pa tamtamon gha tighun muun. Ve isaav ighe isoonj zi mako, ene aat tigham vaen

* **2:6:** Mk 7:3+

tau poia geeg mako na ivot, leso tighun. Eemon yo ugham tauvene mako. Unḡuruut vaen poia ighengheen le nḡarig gha ughamu ivot.”

¹¹ Gabua tana ivot izi nugh Kana to Galilaia. Ene gabua nḡereeta tau Yesu ighamu imin maata, leso itotoi tauu pa tamtamon ve tighilaal tighe i eeza tiina pa tapiri ve poia tooni. Mbiwa tooni tighita gabua tana ve tighur ila tooni. *

¹² Ghanghaniḡ to vaiḡ tana isov, ra Yesu yesḡa tiina, tazḡa, ve mbiwa tooni tizila pa nugh Kaper-naum, ve tileep mboḡ siriv izi ta sewe.

Yesu iziir zeran to raukoliḡ tighau pa Rumei Tiina

(Mt 21:12-13; Mk 11:15-17; Lu 19:45-46)

¹³ Saawe to Pasova, lupuuḡ tiina to yes Yuda, ilam igharau wa. Tauvene Yesu izala pa Yerusalem. ¹⁴ I ilonḡ ila sirsiir loolo to Rumei Tiina, ve ighita tamtamon tiraraukol pa makau, sipsip, ve man mbuun ta sewe. Ve ighita zeran to paravoliaaḡ maet paam, mbolezi izi ve tighamgham uraat toozi. ¹⁵ Tauvene igharaat ravraav imin toon, ve inaan zeran to raukoliḡ tawe tomania sipsip ve makau toozi, gha tisov tighau tivot pa Rumei Tiina. Ve itoor boor to zeran to paravoliaaḡ maet paam, le maet toozi iparḡgiriiz izi taan. ¹⁶ Ve isaav pa yes tau tiraraukol pa man mbuun na ighe: “Ayau gabua tsiam tane,

* **2:11:** Uur toman yaa tau yes Yuda timinmin aghezi ve nimazi pani, ene izaḡ to eez mungaana to tutuuḡ tau yes Yuda titaghoni, leso tiḡgalaḡ ila Maaron maata. Gabua nḡereeta tau Yesu ighamu na, itotoi ighe i igham saawe paaghu ivot. Saawe paaghu tana, ene saawe poia tau Mesia igham tamtamon to Maaron tileep poia toman tintinizi.

ve aghau avot ala! Agham Taman Rumei tooni imin nugh to raukoliin sov!”

¹⁷ Tauvene mbiwa tooni matazi ingal Maaron aliin ziiri ee tau tiboode na. Isaav tauvene ighe:

‘Ngar tsiau iyaryaan naghe le nagharaat mulin rumei tsio. Eemon imin puughu pa nabaad patanani tiina imin yav ighan ghau.’ *

Yesu imin Rumei tauu to Maaron

¹⁸ Daaba to yes Yuda tighita ngar tau Yesu ighamu na, ve tisaav pani tighe: “Pale utotoi saa imin ilaal payei, leso niwatagh nighe Maaron ileep tomani ghom pa uraat tau aazne ughamu ne?” *

¹⁹ Yesu iyol alinazi ighe: “Isaav ighe yam areu rumei tane izi, yau aat napayooze muul pa mbon tol mon.” *

²⁰ Tauvene daaba to yes Yuda tighe: “Wai, yo saa neer? Rumei Tiina tane, tigham uraat pa raonni irau ndaman tamoot ru liim ve ee (46)! Ve yo ughe yo irau upayooz mulini pa mbon tol mon?”

²¹ Eemon rumei tau Yesu isavia na, ene i tauu. Pasaa, i ta imin Rumei to Maaron. † ²² Tauvene saawe tau i iburig pa mateegh, mbiwa tooni matazi ingal imuul ila pa aliin tane, ve tighur

* **2:17:** Mbo 69:9 * **2:18:** Mt 12:38, 16:1 * **2:19:** Mk 14:58; Mbanj 6:14 † **2:21:** Muun, yes Yuda tilala Rumei Tiina to Yerusalem, leso tileep tigharau Maaron ve yesja tivalupu zi timin eemon. Eemon aazne, Yesu igham Rumei Tiina niia. Pasaa, i imin eez pait, leso tagharau Maaron, ve itinja Maaron tavalupu ghiit tamin eemon.

ila tighes saveen tane, ene onoon. Ve tighur ila Maaron aliina tau tiboode pataghaan na paam. *

Eval tiina tighes tighur ila to Yesu

²³ Saawe to lupuun tiina to Pasova tana, Yesu ilepleep izi Yerusalem, ve igham gabua ngeretazi katini tau itotoi ighe Maaron ileep tomania pa uraat tooni. Tauvene eval tiina tighita ve tighur ila tooni. ²⁴ Eemon Yesu ighur ila toozi mako. Pasaa, i iwatagh katin tamtamon tisov lolozi ve ngar toozi. ²⁵ I le puughu eta to ighason pa ngar tau tamtamon tighamghamu ne mako. Pasaa, i iwatagh saa ngar tau igheen ila tamtamon tisov lolozi. *

3

Yesu isavsaav tomania Nikodemus

¹ Neer tutuuna ee ilepleep, eeza Nikodemus. I ileep ila lupuun tiina to yes daaba tau tinginngin yes Yuda. *

² Mbon ee, i ila ivot to Yesu, ve isaav pani ighe: “Mos puughu, yei niwatagh: Maaron imbaan ghom ulam to upaghazonai tamtamon pa saveen tooni. Pasaa, yo ughamgham gabua ngeretazi naol tau itotoi ighe Maaron ileep tomani ghom pa uraat tsio. Tamtamon tau ighe Maaron ileep tomania mako, ene irau igham gabua ngeretazi imin yo mako.” *

³ Yesu iyol aliina ighe: “Onoon kat, yau nasaav payo tauvene: Isaav ighe tapiri to nugh sambam igham tamtamon eta imin paaghu mako, i aat irau

* **2:22:** Lu 24:8, 27 * **2:25:** Mbo 139:1+; Mk 2:8; Yo 6:64; Syg 2:23 * **3:1:** Yo 7:50, 19:39 * **3:2:** Yo 9:16, 10:37+; Mban 2:22

ighilaal pooz to Maaron ve ighita anoonja tooni ne mako.” *

⁴ Tauvene Nikodemus ighasoni ighe: “Wai, ighe tamtamon eta imin olman wa, pale irau imin paaghu muul mindai? Pale ilonj ila tiina aapo, ve ipoopa muul imin pai ru?”

⁵ Yesu iyol aliinja ighe: “Yau nasaav payo: Onoon kat, isaav ighe tamtamon eta imin paaghu ila yaa ve uraat to Maaron Avuvu mako, i aat irau itaghon pooz to Maaron ve ilonj ila nugh tooni ne mako. *

⁶ Zeran tau titaghon ngar to taan ne, tighamgham tauvene pasaa, tamazja ve tinazja tau tipoop zi, yes to taan. Eemon tamtamon tau Maaron Avuvu itoor zi timin paaghu, yes titaghon ngar to Maaron Avuvu. *

⁷ Saveenj tau nasavia payo naghe: ‘Tapiri to nugh sambam aat igham gham amin paaghu’ na, urur ve ugham ngar naol pani sov. ⁸ Ugham ngar pa yaghur. Yo irau ughita mako, ve unjini mako. Yaghur ilaagh mindai ilam, ma ilaagh mindai ila, ene yo uwataghi mako. I ilaghlaagh itaghon tauu eez tooni, ve ulonjloonj luutu mon. Uraat tau

* **3:3:** Mbo 51:10; Yo 1:12+; 1Kor 2:14; 2Kor 5:17; 1Pe 1:23

* **3:5:** Ngara siriv tighe mos ziiri tane puughu tauvene: Tamtamon aat tigham yaa ve Maaron Avuvu igham lolozi ve ngar toozi imin paaghu, o yes irau titaghon pooz to Maaron ve tilonj tila nugh tooni. Ve ngara siriv tighe saveenj tane isavia ngar to ghamuun yaa mako. Tighe saveenj tane, puughu tauvene: Maaron aat itoor ngar to tamtamon ve igham zi tingalaan ila i maata imin neer tau iririu ila yaa, ve Avuvu Patabuyaanj igham lolozi ve ngar toozi imin paaghu, o yes irau titaghon pooz tooni ve tilonj tila nugh tooni. *

3:5: Ezek 36:25+; Yo 7:37+; Tit 3:5+ * **3:6:** Mbo 51:5; Yo 1:13; 1Kor 15:50

Maaron Avuvu ighamghamu ila tamtamon lolozi, leso igham zi timin paaghu, ene ngara raraate mon.”

⁹ Nikodemus iloon saveen tane, ve ighason Yesu muul ighe: “Wai, gabua tau yo usavia na, pale ivot mindai?”

¹⁰ Yesu iyol aliina ighe: “Wai, yes Israela tighit ghom tige yo ezam tiina pa uraat to padudunaan tamtamon pa Maaron aliina. Mindai ta yo ughazoon pa gabua tane mako? ¹¹ Onoon kat, yau nasaav payo. Gabua tau yei nighita pa taumai matamai ve niwatagh katini, tauta nisavia ve nipariaan saveenja. Leso tamtamon tighur ila. Eemon yam Yuda aghur ila saveen tsiei mako. *

¹² Yau nasavsaav payam pa gabua tau ivotvot izi taan, eemon yam aghur ila mako. Tauvene isaav ighe nasavia gabua to nugh sambam payam, pale aghur ila mindai? Ene aat mako. ¹³ Tamtamon eta to taan izala nugh sambam ve ighita gabua ta sewe leso ivotia pa tamtamon ne mako. Tamtamon Naatu tau ileep sambam ve izilam na, i mon ta irau isavia gabua tana. *

¹⁴⁻¹⁵ “Muun, saawe tau yes Israela tilaghlaagh izi nugh nginaanja, Mose igharaat moot anunu, isaroni ila ai, ve ipayooze izaa iyooz. †
Ngar raraate mon pale ivot pa Tamtamon Naatu. Pale tighuru ila ai, ve tipayooze izaa iyooz itaghon

* **3:11:** Yo 1:11, 12:49 * **3:13:** Yo 3:31+; 1Kor 15:47; Ep 4:9+

† **3:14-15:** Saawe tau Yesu isavia na, yes Israela tizoor Maaron aliina le tipas Maaron aate. Tauvene i imbaan moot sasaghati tila tighan tamtamon toozi katini ve timatmaat. Eemon yes tau matazi ila pa moot anunu tau Mose igharaata na, timaat mako. Maaron ipul sosor toozi. Saveenja igheen ila Namba 21:4+.

Maaron ngar tooni. Leso sei tau ighe ighur ila tooni, ene i aat igham lepoogh poia ila to Maaron taghon taghon gha ila. *

¹⁶ “Pasaa, Maaron loolo igheen kat to tamtamon to taan. Tauta ipul Naatu eemon izilam taan gha imaat pazi. Leso tamtamon tisov tau tighur ila tooni na, tilalez sov, ve tigham lepoogh poia ila to Maaron taghon taghon gha ila. *

¹⁷ Onoon kat, Maaron imbaan Naatu izilam taan to igabiiz tamtamon ve ighur atuya pazi ne mako. I imbaan izilam to igham mulin zi. *

¹⁸ Tamtamon tau ighe ighur ila to Maaron Naatu, ene Maaron irau igabiiza ve ighur atuya pani mako. Eemon isaav ighe tamtamon eta ighur ila tooni mako, ene i imin tamtamon tau tigabiiza tigde i isosor wa, ve isaan mon to igham atuya tooni. Pasaa, i ighur ila to Maaron Naatu eemon mako. *

¹⁹ “Puughu tau Maaron ighur atuya pa tamtamon, ene vene: Ghazona tooni izilam taan wa. Eemon tamtamon lolozi pani mako, ve tizori. Ve lolozi pa ngar to ndoroom mon. Pasaa, ngar isov tau tighamgham zi, ene sasaghati mon. *

²⁰ Tamtamon tisov tau tighamgham ngar saghati na, tighurghur koi pa ghazona to Maaron, ve tileep soghan pani. Pasaa, tiroi tigde: Ghazona tooni pale itotoi sosor toozi ivot ighazon.

²¹ Eemon yes tau titaghon saveen onoon ngara na,

* **3:14-15:** Nam 21:4+; Yo 3:36, 6:47, 20:31 * **3:16:** Yo 10:28; Ro 5:8, 8:32; 1Yo 4:9+ * **3:17:** Lu 19:10; Yo 12:47; 1Tim 1:15 * **3:18:** Mk 16:16; Yo 5:24; Mban 4:12; Ro 8:1 * **3:19:** Yo 1:4, 8:12

tiŋarui ghazonŋa to Maaron. Leso ipaghazonŋai zi pa ŋgar popoia tau tighamgham zi na, ve tiwatagh tighe ŋgar toozi tawe, Maaron ileep tomani zi ve ipalot zi, tauta tighamu.” *

Yoan ipariaaŋ Yesu saveeŋ tooni

²² Murei ra, Yesu tomania mbiwa tooni tipul Yerusalem, ve tila tileep saawe siriv izi taan sirivu to Yudea, ve tirurughuuz tamtamon izi ta sewe.

²³ Yoan paam, irurughuuz tamtamon izi nugh Aenon tau igheen igharau nugh Salim. Pasaa, nugh tawe le yaa katini. Tauvene tamtamon tilala tooni, ve i irurughuuz zi ta sewe. ²⁴ Saawe tana, Erod ighur Yoan ilonŋ ila ruum to yavyavuun soone. *

²⁵ Saawe ee, mbiwa siriv to Yoan yesŋa Yuda ee, tivazorai zi pa eez sindei tau pale titaghoni pa ririwaanŋ gha leso tingalaanŋ ila Maaron maata. †

²⁶ Tauvene tila to Yoan, ve tisaav pani tighe: “Padudunŋaan, ughita. Neer tau muunŋ yamru alepleep izi yaa Yordan ziige ite ve yo upariaanŋ tamtamon to tighur ila tooni, tauta aazne tamtamon tisov tilala tooni, gha irurughuuz zi we.” *

²⁷ Yoan iyol alinŋazi ighe: “Ene poia. Agham ŋgar naol sov. Tamtamon eta irau igham uraat tauvene sorok mako. Maaron to sambam ipaloti, tauta i irau igham tauvene. *

* **3:21:** 1Yo 1:7+ * **3:24:** Mk 6:14+ † **3:25:** Yes Yuda lezi tutuunŋ naol pa ririwaanŋ. Ŋgar toozi tauvene: Yes aat titaghon dudunŋai tutuunŋ tisov tawe, o tingalaanŋ ila Maaron maata. * **3:26:** Yo 1:29, 35 * **3:27:** 1Kor 3:5+; Yems 1:17

²⁸ Muun, itiņa talepleep, ve yam taumim aloon ghau nasaav naghe: ‘Yau Mesia mako. Maaron imbaan ghau namuun nalam to nagharaat eez pani mon.’ ” *

²⁹ Ra Yoan isavia saveen palelaan tane izaan to i tauu ve Yesu ighe: “Isaav ighe vain eta ivot, ve tamoot ilam pa ghamuun livaa, ve iitete tau imuun pa uraat to vain na iloon aliina, ene ighamu loolo poia kat. Onoon, i irau igham livaa tana mako. Pasaa, livaa tana, i to iitete. Eemon i aat loolo poia kat. Pasaa, uraat tooni ighur anoonja wa. Yau tauvene paam. Lolog poia le poia kat pasaa, uraat tsiau ighur anoonja wa. *

³⁰ I eeza aat imin tiina. Ve yau ezag aat izi ve naleep ila i saamba.”

Neer tau ileep sambam ve izilam na, i iliiv kat

³¹ Tamtamon to taan, i isavia gabua to taan mon. Pasaa, i ivot izi taan. Ve i tau ileep sambam ve izilam na, iliiv tamtamon tisov. *

³² Gabua tau neer to sambam tawe ighita ve iloonja, tauta isavia. Eemon tamtamon tighur ila saveen tooni mako. *

³³ Ve isaav ighe tamtamon eta iloon saveen tooni ve ighur ila, ene itotoi ighe i ighur ila ighe Maaron saveen tooni, ene onoon. *

³⁴ Neer tau Maaron imbaanjo izilam na, i ivovotia Maaron tauu aliina. Pasaa, Avuvu tau Maaron ireii pani na, i igham ngiira ngiira pani mako. Ipul suvinia ila tooni. *

* **3:28:** Yo 1:20, 23 * **3:29:** Mt 9:15 * **3:31:** Yo 8:23; Ro

9:5; 1Kor 15:47 * **3:32:** Yo 1:10, 3:11, 12:37+ * **3:33:** Ro 3:4

* **3:34:** Is 42:1; Mbanj 10:38

³⁵ Taama Maaron loolo igheen to Naatu kat, ve ipul gabua naol isov ila i niima wa. *

³⁶ Tauvene tamtamon tau ighe ighur ila to Maaron Naatu, ene igham lepoogh poia ila to Maaron wa. Ve i pale ileep tauvene taghon taghon gha ila. Eemon yes tau tizoor Maaron Naatu aliinja, ene irau tigham lepoogh tawe mako. Mako kat. Aatyavyav to Maaron pale izazaa toozi taghon taghon gha ila. *

4

Yesu isavsaav tomania Samaria tinazi ee

¹⁻³ Saawe tana, zeran tutuunja tiloonj tigde Yesu iyau tamtamon katini timin ziñeera, ve irughuuz zi le tiliiv Yoan ziñeera. Eemon Yesu tauu irughuuz tamtamon mako. Mbiwa tooni mon ta tighamgham uraat tana. Yesu iwatagh ighe zeran tutuunja tiloonj uraat tooni vaaru wa. Tauvene ipul taan sirivu to Yudea, ve ighe imuul ila pa Galilaia. ⁴ Eez tau i itaghoni, ene imbut taan sirivu to Samaria, ve ila ivot izi Galilaia.

⁵ Tauvene i ilaagh ila le ivot nugh ee to Samaria, eeza Sikar. Nugh tawe igheen igharau taan sirivu tau muun Yakop igham pa naatu Yosep. *

⁶ Yaa tainj ee tau muun Yakop itaii na, igheen nugh ziige. Yesu ilaagh malau le laghoonj isoonja. Tauvene ila mboole izi yaa tainj ziige, ve imariau. Saawe tana, zegmatuugh.

⁷⁻⁸ Yesu idaagi ilepleep, ve mbiwa tooni tila nughei pa gholiinj lezi aniin. Malau mako ve

* **3:35:** Mt 11:27, 28:18; Hib 2:8 * **3:36:** Yo 5:24, 6:47; Ro 1:17;

1Yo 5:12 * **4:5:** Gnp 33:19, 48:22

Samaria tinazi ee ilam ighe itiv le yaa. Yesu ighita, ve isaav pani ighe: “Livaa, irau ugham leg yaa rigta ilam naghun?”

⁹ Livaa tawe iyol aliinja ighe: “Wai, yo Yuda tamazi, ve yau Samaria tinazi. Mindai ta ughason ghau ughe naghham lem yaa?” I isaav tauvene pasaa, yes Yuda ve yes Samaria tivavalupu zi mako. * *

¹⁰ Yesu iyol aliinja ighe: “Imin ta yo uwatagh gabua poia tau Maaron ighe igham payo ve ughilaal neer tau ighason ghom pa yaa, kanan ughasoni, ve i gham lem yaa rereere to igham ghom uleep matam yaryaare le alok.”

¹¹ Tauvene livaa tana isaav pani muul ighe: “Olman, yo lem yaa paatu eta mako. Ve puura tane, yaa igheen izila siinja kat. Yaa rereere tau usavia na, pale ughamu sindei? †

¹² Yo uwatagh: Timbuun Yakop itai yaa tane payei alok wa. Ve i tauu tomania natja, ve makau ve sipsip tooni tighunghun yaa tane. Mindai, yo ughe uliiv Yakop, tauta ughe ugham leg yaa ite paam ne?”

* **4:9:** Yes Samaria titaghon sunjuun to yes Yuda ngara siriv tomania tauzi sunjuun toozi ngara siriv, ve tamtamon to nugh nugh tileep ila lolozi. Tauvene yes Yuda tighita yes Samaria tigde yes Yuda duduun mako, ve titaghon dudunai Maaron tutuun tooni mako. Puughu tane ta yes tau Yuda duduun na tigde tileep soghan pazi. Pasaa, matazi ingal tigde yes Samaria pale tigham zi tisaghat ila Maaron maata. * **4:9:** Lu 9:52+; Mbanj 10:28 † **4:11:** Livaa tane igham sapirin Yesu saveen tooni puughu. I ighe pa Yesu isavia yaa duduun tau irereer ne. Eemon Yesu isavia lepoogh poia tau tamtamon pale tighamu ila tooni, ve Avuvu Patabuyaana.

13 Yesu iyol aliinja ighe: “Tamtamon tisov tau tighun yaa tane, ene pale murun zi muul.

14 Eemon isaav ighe tamtamon eta ighun yaa tau yau naghe naghama pani, i aat irau murunu muul mako. Pasaa, yaa tau yau naghama pani, ene pale ivotvot le ivon ila loolo. Tauvene tamtamon tana pale ighama lepoogh poia ila to Maaron taghon taghon gha ila.” *

15 Livaa tawe iloon saveen tane, ve isaav pa Yesu muul ighe: “Wai olman, ughama yaa tana payau lak! Leso murei murun ghau muul sov, ve nala nalam pa tivuun yaa ta sene muul sov.”

16 Ra Yesu isaav pani ighe: “Aiyo. Ula ughama azuwama, ve yamru amuul alam.”

17 Livaa tana iyol aliinja ighe: “Yau leg azuwag mako.”

Yesu iyol saveen tooni ighe: “Alinam tau yo ugha lem azuwama mako, ena iduduun. 18 Eemon yo uvai zitamoot liim wa. Ve njeer tau aazne yo uleep tomania na, ena yo azuwama tauu mako. Tauvene alinam tana, ena onoon.”

19 Livaa tana iloon saveen tane, ve ngar tooni pakia. Tauvene isaav pa Yesu ighe: “Olman, ngarig gha naghilaal ghom. Yo aat propet ee to Maaron. *

20 Enes, yau leg ghasoniin ee payo. Ta muun ve ilam, yei Samaria timbumainja tiluplup zi pa sunjuun izala loloz tawe. Ve aazne paam, nitaghon ngar tana. Eemon yam Yuda aghe tamtamon aat

* 4:14: Is 44:3, 55:1; Ezek 47:1-12; Yo 7:37+; Syg 21:6 * 4:19: Lu 7:16; Yo 6:14

tisun pa Maaron izi nugh Yerusalem mon. Laak, nugh sindei ta poia pa sunuun?” *

²¹ Yesu iyol aliina ighe: “Olman tinazi, ughur ila saveen tsiau tane. Saawe eta pale ivot, mako yam agham ngar pa nugh eta to sunuun imin loloz tawe, ma Yerusalem muul mako. Nugh sindei tau ighe aleep pani ve asun, ene poia mon. † ²² Yam tamtamon to Samaria awatagh katin Maaron tau asunsun pani ne mako. Ve yei Yuda niwataghi. Pasaa, yei nimin eez to Maaron igham mulin tamtamon.*

²³ Ve uloon. Saawe tana pale ivot. Ighe ivot tane. Saawe tana, tamtamon pale tigham sunuun tauu pa Tamaan Maaron. Yes pale tisun pani toman loloz itaghon saveen onoon ve pooz to Maaron Avuvu. Tamaan Maaron izuari ghi ighe le tamtamon tisun pani itaghon eez tauvene.*

²⁴ Maaron, i Avuvu. Tauvene tamtamon tau tigha tisun pani, ene yes aat tisun pani toman loloz itaghon saveen onoon ve pooz to Maaron Avuvu.”

²⁵ Yesu isavia saveen tane le isov, ra livaa tana isaav pani ighe: “Yau nawatagh: Mesia pale ilam. Ve saawe tau i ilam ivot, i aat ipaghazonai ghei pa gabua ta naol ne.” (Saveen ‘Mesia’, yes Griika tiwaato ila alinazi tigha: ‘Krisi.’) ²⁶ Tauvene Yesu isaav ghazonja pani ighe: “Mesia tau usavia na,

* **4:20:** Lo 12:5+; Mbo 122:1+ † **4:21:** Yesu saveen tooni tane, puughu tauvene: Maaron igham ngar pa nugh to sunuun muul mako. I igham ngar tiina pa tamtamon loloz. Isaav ighe tisun pani toman loloz itaghon saveen tooni, ene i loolo poia pa sunuun toozi.

* **4:22:** Ro 3:1, 9:4+ * **4:23:** Pil 3:3

ene yau taug tane, yau tau nasavsaav tomani ghom ne.”

²⁷ Yesu isavsaav pani, ve mbiwa tooni timuul tilam tivot. Yes tighita Yesu yesuru livaa tana tisavsaav, le tigham ngar naol. Eemon eta ighasoni pa puughu tau i isavsaav tomania livaa tana mako. ²⁸ Ra livaa tana ipul yaa paatu tooni izi, ve imuul ila pa nughei, ve ipaes pa tamtamon ighe: ²⁹ “Ou, yam alam tala aghita neer ee tau ilepleep we. Ngar isov tau naghamgham zi muun ve ilam aazne, i ivoti zi payau le tisov. I aat Mesia taa?” ³⁰ Tauta eval tiina tipul nugh, ve tikeet tila tigde tighita Yesu.

³¹ Saawe tau livaa tana ipul Yesu ve imuul ila pa nughei, mbiwa tooni tisaav pa Yesu tigde: “Padudunjaan, ugham lem aniiñ gha ughan.”

³² Eemon i isaav pazi ighe: “Mako. Aniiñ tsiau to ghaniñ, ene ighengheen. Eemon yam awataghi mako.” ³³ Tauvene mbiwa tooni tivasavo zi tigde: “Mindai, tamtamon eta igham le aniiñ wa?”

³⁴ Yesu isaav pazi muul ighe: “Aloon. Yau aat nataghon Neer tau imbaan ghau nalam ne loolo, ve naparwai uraat tooni le isov kat. Aniiñ tsiau, tauta ene. *

³⁵ Yam asavsaav tauvene: ‘Kaiyo paan isov, mako mariri ivot.’ Eemon yau nasaav payam: Ena ila matini. Matamim ila pa uum. Aniiñ isov imatuugh, ve saawe to lupuun zi, tauta ivot wa. *

³⁶ Tauvene aazne, yes to lupuun aniiñ tisanan muul mako. Tindoundou aniiñ anoonja, ve tighamgham lezi atuya. Tauta yesja yes to

* **4:34:** Yo 6:38, 17:4 * **4:35:** Mt 9:37; Lu 10:2

vazoghiin aniin loloji poia ve tintinizi. Pasaa, uraat toozi ighur anoonja wa. Anoonja tauvene: Tighegherev tamtamon tila pa Maaron, leso tileep matazi yaryaare le alok. *

³⁷ Ngar tana iduduun pa saveen tau monmon tasasavia ne: ‘Ñeer ee ivazogh, ve ite indou anoonja.’ ³⁸ Yau nambaan gham ala pa lupuun aniin anoonja tau taumim avazoghi mako. Zeran siriv tigham uratoini le tighun punitazi pani. Uraat toozi anoonja, tauta aazne yam ala aghamu.”

Tamtamon katini to Samaria tighur ila to Yesu

³⁹ Tamtamon katini to Samaria tau tilepleep izi nugh tawe tiloon saveen to livaa tana, ve tighur ila to Yesu. Pasaa, i ivotia ngar tau Yesu igham pani na, ve isaav pazi ighe: “Ngar isov tau yau naghhamgham zi muun ve ilam aazne, tauta i ivoti zi payau.” ⁴⁰ Tauvene yes Samaria tawe tila tivot to Yesu, ve tinguruuta tighe i ileep tomani zi. Tauvene i ileep mbon ru ta sewe. ⁴¹ Tauta tamtamon katini to nugh tawe tighur ila tooni. Pasaa, tiloon saveen ila i tauu aavo. ⁴² Ve tisaav pa livaa tawe tighe: “Papazoge yei niloon saveen tsio mon, ve nighur ila to ñeer tane. Ve aazne, taumai niloon saveen ila i tauu aavo. Tauta niwatagh nighe onoon kat, ñeer tane, i Uleenja tau pale igham mulin eval tiina to taan.” *

Yesu imuul ila pa taan sirivu to Galilaia

⁴³ Yesu yesja yes Samaria tileep mbon ru isov, ra iburig muul gha ila pa Galilaia. ⁴⁴ (I tauu isaav

* **4:36:** Mk 4:14+ * **4:42:** Lu 2:11; 1Yo 4:14

pataghaan wa ighe: “Propet eta irau le eeza izi tauu nugh tooni mako.” *

⁴⁵ I ila ivot Galilaia, ve yes Galilaia tighamu toman lolozi poia. Pasaa, saawe to lupuun tiina to Pasova, yes paam tila Yerusalem, ve tighita uraat naol ta i igham zi ta sewe.

Yesu igharaat kinik uraata tooni naatu le tiini poia

⁴⁶⁻⁴⁷ Yesu ila ivot muul izi nugh Kana tau igheen izi Galilaia na. Muun, i itoor yaa imin vaen ta sewe. Yesu ilepleep ta sewe, ve uraata ee to kinik tau ileep izi nugh Kapernaum na, iloon tighe Yesu ipul Yudea ve ilam ivot Galilaia wa. Uraata tawe naatu, moroghoon tiina ighamu ve ighengheen. Tauvene i ipul Kapernaum, ve ila ighe ighita Yesu. Ila ivot tooni, ve itan raraini ighe izila Kapernaum ve igharaat naatu. Pasaa, moroghoon tiina ighamu le igharau ighe imaata. ⁴⁸ Yesu isaav pani ighe: “Wai, yam aghe le aghita gabua ngeretazi ve uraat tintiina tau itotoi ighe Maaron ileep tomani ghau pa uraat tsiau, o aghur ila. Ve ighe mako, ene irau aghur ila mako.” *

⁴⁹ Uraata tana iyol aliina ighe: “Tiina, rekia ulam gha tazila. Mako pale natug imaata.”

⁵⁰ Yesu isaav pani ighe: “Ula! Natum irau imaata mako. I pale tiini poia.” Tauvene uraata tana ighur ila Yesu aliina ve ila.

⁵¹ Ilaagh muul izila, ve besoon tooni siriv tilam tizaa tooni izi eez livuugha, ve tipaes pani tighe: “Olman, natum imaata mako. Poia wa!”

* **4:44:** Mk 6:4 * **4:48:** Yo 2:18; 1Kor 1:22

⁵² Tauvene i ighason zi pa saawe sindei kat ta naatu maata pakia.

Yes tipaes pani tigde: “Noor, aaz itap ivool ve tiini iluum gha maata pakia.” ⁵³ Tauvene ñeer marani tana taama maata ingal: Saawe duduun tana, Yesu isaav pani ighe: “Ula. Natum irau imaat mako. I pale tiini poia.” Tauvene i tomania ziñeera tau tileep tomania ila ruum tooni na, tisov tighur ila to Yesu.

⁵⁴ Ene gabua ñgereeta ite imin ru tau Yesu ighamu imin ilaal pa tamtamon. Saawe tau i ipul taan sirivu to Yudea ve imuul ila Galilaia, i igham gabua tawe.

5

Yesu igharaat ñeer narape ee izi yaa naliu Betesda

¹ Murei ra, saawe tiina ee to yes Yuda tilup zi pa sunuun ighe ivot. Tauvene Yesu izala pa Yerusalem. ² Yaa naliu ee igheen igharau didiin tiina tau ilivut Yerusalem ña. Tiwaat eeza ila saveen Hibru tigde Betesda. *

Yaa tawe igheen igharau ataman aavo tau tiwaato tigde ‘Ataman to Sipsip.’ Ve tirau balbaal liim tiyooz tilivutin yaa aaze. ³ Monmon moroghoonja katini tighengheen ila balbaal tawe lolozi. Siriv matazi kumkuuma, siriv aghezi isaghat, ve siriv aghezi imaat wa. Irau tilaagh mako. ⁴ [Tilepleep ta sewe ve tيسانان le ighe yaa itariigh, mako rekia mon tila tiyaat tizila. Pasaa, saawe enjaenja, anjela to Maaron izilam, ve igham yaa itariigh. Ve sei tau

* **5:2:** Baibol siriv tiwaat yaa naliu tane eeza tigde Bet-zata, ma Betsaida.

ighe iyaat izila imin maata, ene aat moroghoon tooni isov, ve tiini poia.] †

⁵ Neer ee ilepleep yaa tawe ziige. I moroghoon ikisi irau ndaman tamoot ee sanjavul liim ve tol (38) wa. ⁶ Yesu ighita neer tawe ighengheen, ve iwatagh ighe i imoroon alok wa. Tauvene ighasoni ighe: “Mindai? Lolom pa tinim poia?”

⁷ Narape tana iyol aliina ighe: “A neer tsiau, isaav ighe yaa itariigh, yau leg etag eta to iuul ghau ve ighur ghau nazila yaa mako. Ve saawe isov tau taug natoova to nazila, tamtamon siriv timuun payau gha tizila.”

⁸ Yesu isaav pani ighe: “Uburig uyooz, uput moogh tsio, ve ulaagh.” ⁹ Reikia mon ve neer tana tiini poia. Tauvene iburig, iput moogh tooni, ibaado, ve ilaagh ila. Eemon saawe tana, ene umbom patabuyaana to Maaron.*

¹⁰ Tauvene daaba to yes Yuda tighita neer tana, ve tiyaoni tighe: “Ai, aazne ene umbom patabuyaana to Maaron! Ubaad moogh tsio ve ulaagh pasaa? Tutuun ingalsek pa ngar tauvene.”

¹¹ Neer tana iyol alinazi ighe: “Yau taug mako. Neer tau igharaat ghau gha tinig poia, tauta isaav payau ighe: ‘Uput moogh tsio, ughamu, ve ulaagh.’”

¹² Tauvene tighasoni muul tighe: “Sei isaav payo tauvene?” ¹³ Eemon neer tana ikankaan pa sei tau igharaata gha tiini poia. Pasaa, Yesu ileep ta sewe muul mako. I ipas ghi ila eval tiina sosozi, gha ila wa.

† **5:4:** Baibol munjanazi siriv, saveen to ziiri tane igheen ila. Ve Baibol siriv, igheen ila mako. * **5:9:** Is 35:4-6; Yo 9:14

¹⁴ Murei ra, Yesu ila indeen ñeer tana izi Rumei Tiina ziige, ve isaav pani ighe: “Ughita. Aazne tinim poia wa. Yau nasaav payo: Ugham sosor muul sov. Isaav ighe unoknok ghamuun sosor, ene aat patanjani tiina kat igham ghom le iliiv patanjani tau muun igham ghom.” *

¹⁵ Yesu isavsaav pani le isov, ra ñeer tana ipuli, ve ila ipaes pa daaba to yes Yuda ighe: “Ñeer tau igharaat ghau, ene Yesu.”

¹⁶ Tauvene daaba to yes Yuda tiburig gha tiil eez to tighur patanjani pa Yesu. Pasaa, i ighamgham uraat tauvene ila saawe to umbom patabuyaaj.

¹⁷ Tauvene Yesu isaav pazi ighe: “Ta muun ve ilam, Taman ighamgham uraat tooni irau saawe. Tauta yau paam naghamgham uraat tauvene.” *

¹⁸ Saveen tooni tane ireu daaba tana lolozi. Tauvene ngar toozi iyaryaaj kat tighe le tiravu imaat. Pasaa, tighita tighe i imamalaaj pa tutuun to umbom patabuyaaj. Ve ngarig igham sosor ite paam izala paavo. Pasaa, i isaav ighe i taama Maaron. Tauvene tighita tighe i ipakur tauu ighe i raraate imin Maaron. *

Yesu itaghon Taama Maaron ngar tooni pa uraat tau i ighamghamu na

¹⁹ Tauvene Yesu isaav pa daaba to yes Yuda ighe: “Onoon kat, yau nasaav payam. Maaron Naatu irau igham gabua eta itaghon tauu ngar tooni ne mako. Mako kat. I ighita Taama igham saa ngar, ene i itaghoni mon. Tauvene saa ngar tau Taama ighamghamu, ene Naatu ighamu paam. *

* **5:14:** Yo 8:11; 2Pe 2:20+ * **5:17:** Yo 9:4, 14:10 * **5:18:** Yo 10:30, 33, 19:7 * **5:19:** Yo 8:28, 14:10

²⁰ Taama loolo igheen to Naatu kat. Tauvene uraat naol tau ighamgham zi na, i itotoi zi pa Naatu. Ve murei, i pale itotoi uraat tintiina siriv tau tiliiv uraat tau ngarig ivot ne pani. Tauvene yam pale aghit zi, le arur pazi ve ngar tsiam imbool. *

²¹ Taama Maaron, i ipaburigin yes mateegha ve tileep matazi yaryaare. Naatu tauvene paam. Isaav ighe loolo pa tamtamon eta, i aat ighamu ileep poia. *

²² Uraat to gabizoon tamtamon tauvene paam. Taama Maaron igabiiz tamtamon eta ve ighur atuya pani mako. Uraat tana, i ipuli isov ila Naatu niima. *

²³ Leso tamtamon tisov tighita Naatu tighe i le eeza, ve titandagh pani raraate imin titandagh pa Taama Maaron. Ve isaav ighe tamtamon eta itandagh pa Maaron Naatu mako, ene itandagh pa Maaron mako paam. Pasaa, i ta imbaan Naatu izilam taan. *

²⁴ “Onoon kat, yau nasaav payam: Isaav ighe tamtamon eta iloon saveen tsiau ve itaghoni, ve ighur ila to Taman tau imbaan ghau nalam ne, ene i igham lepoogh poia ila to Maaron wa. Ve i pale ileep tauvene le alok. Tamtamon tauvene, yau irau nagabiiza ve naghur atuya pani mako. Pasaa, i ipul eez to mateegh wa, ve aazne itaghton eez to ileep maata yaryaare le alok. *

²⁵ Onoon kat, yau nasaav payam: Malau mako pale saawe paaghu ivot. Aazne, ilam igharau

* **5:20:** Yo 3:35 * **5:21:** Yo 11:25; Ro 4:17; 1Kor 15:45; Ep 2:5

* **5:22:** Mt 25:31; Mban 10:42, 17:31 * **5:23:** Lu 10:16; Pil 2:10+;

1Yo 2:23 * **5:24:** Yo 3:16, 6:40, 8:51; 1Yo 5:13

wa. Saawe tana ighe ivot, yes tau titaghon eez to mateegh na, pale tiloon Maaron Naatu aliinja. Ve tamtamon tisov tau ighe tiloon aliinja ve titaghooni, ene aat tigham lepoogh poia ila to Maaron. *

²⁶ Maaron tauu imin puughu pa tauu lepoogh tooni. Ve i ighur tapiri tawe ila to Naatu, tauta Naatu paam imin puughu pa tauu lepoogh tooni. *

²⁷ Ve Taama ighur uraat to gabizoon tamtamon ve ghuruun atuya pazi ila Naatu niima paam. Pasaa, i Tamtamon Naatu. † *

²⁸ Yam arur pa saveen tane sov. Murei, saawe eta pale ivot, o mateegha tisov tau tigheen naal loolo na, tiloon Maaron Naatu aliinja, *

²⁹ ve tiburig, tipul naal toozi, ve tivot. Yes tau muun tighamgham ngar popoia na, pale tiburig ve tileep matazi yaryaare le alok. Eemon yes tau muun tighamgham ngar sasaghati na, pale tiburig ve tigham atuya to sosor toozi. *

³⁰ “Yau irau naghham gabua eta itaghon taug

* **5:25:** Ga 2:20; Ep 2:1, 5; Kol 2:13 * **5:26:** Yo 1:4 † **5:27:** Pai katini Yesu iwaat tauu ighe ‘Tamtamon Naatu.’ Saveen ziiri tane, puughu tol. Pai siriv, ene eez ite to Yesu isavia tauu. Ve pai siriv, Yesu iwaat tauu ighe ‘Tamtamon Naatu’ pasaa, i tamtamon raraate imin iit. Ve pai siriv, saveen tane, puughu tauvene: Yesu, i Mesia tau Maaron ighuru pa uraat to ghamuun pooz itaghon saveen to Daniel 7:13-14. Tauvene mos ziiri tane, ngar ru tigheen ila: Ee, ene vene: Isaav ighe Yesu igabiiz iit tamtamon, gabizoon tooni pale iduduun. Pasaa, i tamtamon raraate imin iit, ve iwatagh katin patajani ve tovaan naol to taan. Ve ngar ite, ene vene: Yesu irau igabiiz tamtamon, pasaa i Mesia tau Maaron ighuru pa uraat to ghamuun pooz. * **5:27:** Hib 4:15-16 * **5:28:** 1Kor 15:52; 1Tes 4:16 * **5:29:** Mt 25:46; Mbanj 24:15; Ro 2:7+; Syg 20:12

lolog ve ngar tsiau ne mako. Saveen tau nalon loonja ila to Taman Maaron, tauta ighamgham pooz payau pa gabizoon tsiau. Tauvene isaav ighe nagabiiz tamtamon, ene pale gabizoon tsiau iduduun mon. Pasaa, yau nataghon taug lolog mako. Nataghon Taman tau imbaan ghau nalam ne loolo.” *

Gabua siriv tau tipariaan ghiit to taghur ila to Yesu

³¹ Yesu isaav muul tauvene: “Isaav ighe yau taug napariaan saveen tsiau, ene irao mako. Saveen tauvene, yam irau aghur ila aghe ene onoon ne mako. ³² Eemon Neer ite ta ipariaan saveen tsiau. [Ene Taman Maaron.] Ve yau nawatagh: Saveen tau i isasavia payau, ene onoon mon.” *

³³ “Ve neer ite paam ipariaan saveen tsiau. Saawe tau yam ambaan tamtamon tsiam siriv tila to neer rughuzaanja Yoan, i ivotia saveen onoon pazi, ve ipariaan zi to tighur ilam tsiau.” *

³⁴ Yau taug naghur matag pa tamtamon eta to ipalot saveen tsiau ne mako. Eemon nasavia saveen tane to nauul gham, leso aghur ilam tsiau, ve Maaron igham mulin gham. ³⁵ Yoan, i imin yaryaroonja tau ighan ve isul tamtamon. Ve saawe rigmon tau i ileep tomani gham, yam tintinmim ve lolomim poia pa ghazoonja tooni.

³⁶ “Eemon yau leg gabua ite paam tau ipariaan saveen tsiau ve iliiv saveen to Yoan. Ene uraat naol tau Taman ighur zi tilam nimag, leso naghram

* **5:30:** Yo 6:38, 8:16; Syg 19:11

* **5:32:** Mt 3:17; Yo 8:18

* **5:33:** Yo 1:29, 35

zi ve napasov zi. Uraat naol tau naghhamgham zi ne, ene tipaghazonai ghau tigde: Taman Maaron imbaan ghau ta nalam. *

³⁷ “Tauvene Taman Maaron tau imbaan ghau nalam ne, i ipariaan saveen tsiau wa. Eemon muun ve ilam, yam aloon aliina rigta mako, ve aghita naagho pai eta soone. ³⁸ Ve saveen tooni paam igheen tunja ila lolomim mako. Pasaa, Taman Maaron imbaan ghau nazilam taan, eemon yam aghur ilam tsiau mako. ³⁹ Yam anumeer aghe Maaron saveen tooni pale itotoi gham pa eez to aleep matamim yaryaare le alok. Tauta monmon awatwaat saveen tooni, ve azuari gham aghe le awatagh katin puughu. Ve mos ziiri ta naol ne tipariaan saveen tsiau. *

⁴⁰ Yau naghe yam alam tsiau, leso agham lepoogh poia ila to Maaron. Eemon yam lolomim pa ngar tauvene mako.

⁴¹ “Isaav ighe tamtamon tipait ghau, ma tipait ghau mako, ene matag ila pa gabua tauvene mako. *

⁴² Eemon yam, yau nawatagh gham wa. Yam aghur lolomim pa Maaron rigta mako. ⁴³ Pasaa, yau naghham Taman Maaron naagho ta nalam. Eemon yam agham ghau mako, ve azor ghau. Ve isaav ighe neer eta itaghon tauu ngar tooni ve ilam, na yam rekia mon aghamu toman lolomim poia, ve aghur ila saveen tooni. ⁴⁴ Pale irau aghur ila to Maaron mindai? Mako. Pasaa, monmon yam azuzuari gham aghe le zeetmimja tipait gham.

* **5:36:** Yo 10:25, 14:11 * **5:39:** Lu 24:44; Mbanj 13:27; Ro 1:2

* **5:41:** Ga 1:10; 1Tes 2:6

Eemon paitoonj tauu tau ilam pa Maaron na, yam
 azuari gham pani mako. *

⁴⁵ Mindai, yām aghe yau pale napayooz gham pa savsaveen ila Taman Maaron naagho? Mako. Mose, neer tau yam anumeera aghe tutuun tooni pale igham gham aleep poia, ene i ta pale ipayooz gham. ⁴⁶ Imin ta yam aghur ila saveen tooni, kanan aghur ilam tsiau paam. Pasaa, saveen naol tau i iboode na, ene iza tsiau. *

⁴⁷ Eemon yam aghur ila saveen tau i iboode na mako. Tauta pale aghur ila saveen tsiau mindai?"

6

Yesu ipan tamtamon ndijndij ndijndij liim
(5,000)

(Mt 14:13-21; Mk 6:30-44; Lu 9:10-17)

¹ Murei ra, Yesu tomania mbiwa tooni tigham waan gha tila tivool pa yaa naliu Galilaia ziige ite. Yaa tawe, eeza ite Tiberias. ² Tila tiloon ta sewe, ve eval tiina kat titaghoni gha yesna tila. Pasa, tighita gabua ngeretazi naol tau i ighamgham zi pa yes moroghoona. ³ Yesu yesna mbiwa tooni tizala nugh mbua ee, ve mbolezi izi gha tilepleep. ⁴ Pasova, saawe tiina to yes Yuda tau tiluplup zi pa sunuun na, ilam igharau wa. *

* **5:44:** Mt 23:5+; Yo 12:43; Ro 2:29

49:10; Lo 18:15+

* 5:47: Lu 16:31

* **5:46:** Gnp 3:15, 22:18,

* **6:4:** Pasova ivotvot pa
es Yuda matazi ingal saawe
sip. Yoan ibood saveen pa
Pasova ee. Ngat tane isavia
aat pa Pasova tau imin tol

⁵ Yesu mboole izi gha ilepleep, ve maata ila le ighita eval tiina tikeet njaruini tilam. Tauvene ighason Pilip ighe: “Pale taghol aniin sindei ve tapan eval tiina tane?” ⁶ Saveen tane, i isavia imin tovaan Pilip. Eemon i tauu iwatagh saa ngar tau i ighe ighamu.

⁷ Pilip iyol aliina ighe: “Wai, ene eval tiina kat! Isaav ighe taghol lezi aniin ngiira rigta to titatan atezi pani pa maet denari ndinndin ru (200) pale irau?”

⁸ Ra mbiwa tooni ite, Andreas, i Simon Petrus taazi, isaav pa Yesu ighe: ⁹ “Tiina, neer marani tane, i le mberet bali liim, ve iigh geegeu ru. Eemon tamtamon tane eval kat. Aniin ngiira tauvene pale irau zi mindai?”

¹⁰⁻¹¹ Nugh tau tileep pani na, le kikiliin popoia. Tauvene Yesu isaav pa mbiwa tooni ighe: “Ala asaav pa eval tiina tawe mbolezi izi.” Tauvene yes eval tiina tana mbolezi izi, ra Yesu igham mberet tawe gha ipait Maaron pani, ve ireii pazi. Mako igham ngar raraate mon pa iigh. Tauvene eval tiina tana tighan le isoon zi. Eval tawe, yes zitamoot mon irau ndinndin ndinndin liim (5,000).

¹²⁻¹³ Tamtamon tisov tighan le apozi isun, ra Yesu isaav pa mbiwa tooni ighe: “Yam ala agoog avozi muuri tau izi na. Takaria aniin sov.” Tauvene tila tigoog avozi muuri tawe ila nakaral sanavul ve ru le tivoniir.

¹⁴ Eval tiina tighita gabua ngereeta tau Yesu ighamu to itotoi tauu pazi na, le tivasavo zi tigha: “Onoon kat, propet tiina tau tisavia tigha Maaron

pale imbaanjo izilam taan, tauta ene!” † *

¹⁵ Tauvene tiburig tighe tikisi ve tighuru imin kinik pazi pataghaan. Eemon Yesu iwatagh ngar toozi wa. Tauvene ipul zi, ve ighau izala muul pa loloz, leso zigani ileep ta sewe. *

Yesu ilaagh izala yaa paavo

(Mt 14:22-33; Mk 6:45-52)

¹⁶ Mbiwa to Yesu tilepleep le ravrav izi, ra tizila nari, ¹⁷ ve tizaa waan, leso tiraav tila tivool pa nugh Kapernaum tau igheen yaa naliu ziige ite. Saawe tana mbonj izi wa. Eemon Yesu izilam toozi soone. ¹⁸ Tivot gha tila ve malau mako, yaghur tiina iburig le ipei dibom tintiina. ¹⁹ Tauvene tapirizi pa goraan le tila tivot bodbodaan to yaa naliu. Ra matazi ila le tighita Yesu ilaghlaagh ila yaa paavo inarui zi ilam le igharau zi. Tighita le roinj tiina igham zi. ²⁰ Eemon Yesu isaav pazi ighe: “Aroi sov! Ene yau.” ²¹ Ra loloz poia, ve tighe tighamu izaa waan. Eemon rekia mon ve tila tiloon nari to nugh tau tighe tila pani na.

Eval tiina tisanjan Yesu

²²⁻²³ Eval tiina tau tilepleep izi yaa naliu ziige ite na, tisanjan Yesu mbonj le nughizau. Tauvene tigham ngar naol. Pa noor, tighita waan eemon tau ipotpot. Tauta mbiwa tooni tighamu gha tila. Ve Yesu ila tomani zi mako. Mbiwa tooni mon ta tila. Eval tiina tawe tisanjan ta sewe le tighita waan

† **6:14:** Yes Yuda tau tileep pa saawe to Yesu na, matazi ingal tighe Maaron pale imbaan propet tiina ee pazi, itaghon saveen to Lo 18:15-19. Siriv tighe neer tana pale Mesia paam. Ve siriv tighe i pale igham uraat to propet mon. *

* **6:15:** Mk 6:46

6:14: Lo 18:15-22; Yo 1:21

geegeu siriv to nugh Tiberias tilam tigharau nugh tau noor Yesu ileep pani, ve ipait Maaron pa aniin ve igham pa eval tiina gha tighan na. ²⁴ Zeran tawe tighita Yesu tomania mbiwa tooni naghozi mako, tauvene tizaa waan geegeu tawe, ve yesna waan tauna tiraav tila tivool pa Kapernaum. Leso tiil Yesu ta sewe.

Yesu, i aniin maata yaryaare

²⁵ Eval tiina tana tilam tiloon yaa naliu ziige ite, ve tindeen Yesu ta sewe. Tauvene tighasoni tigde: “Mos puughu, ulam sene neez?”

²⁶ Yesu iyol alinazi ighe: “Onoon kat yau nasaav payam: Yau naghham gabua ngeretazi naol to natotoi taug payam. Eemon yam agham ngar pa gabua tau aghita na, ve ail ghau alam ne mako. Yam ataghon ghau alam pasaa, aghan katin aniin le apomim isun! ²⁷ Aloon. Aniin tau isasaghat rekrekia na, arav taumim pani sov. Yam aat azuari gham pa aniin tau pale igham gham aleep matamim yaryaare le alok. Aniin tawe, Tamtamon Naatu irau igham payam. Pasaa, Taama Maaron igham gabua ngereeta imin ilaal pani, tauta itotoia ighe i eeza pa ghamuun uraat tauvene.” *

²⁸ Tauvene yes tighasoni tigde: “Ighene vene, pale nigham mindai, lesa nigham uraat tau Maaron loolo pani?”

²⁹ Yesu iyol alinazi ighe: “Uraat tau Maaron ighe yam aghamu, ene vene: Yam aat aghur ila to neer tau i imbaano ilam.” *

* 6:27: Is 55:2; Mt 4:4 * 6:29: 1Yo 3:23

30-31 Tauvene yes tighasoni muul tigde: “Ige vene, pale ugham saa gabua ivot imin ilaal payei, leso nighita ve nighur ila saveen tsio? Ughita. Yei nighur ila saveen to Mose pasaa, muun saawe tau timbumainja tilaghlaagh izi nugh nginaanja, i igham aniin manna pazi, ve tighanghan. Saveenja tiboode pataghaan wa. Isaav ighe:

‘I igham aniin to sambam izi pazi ve tighan.’”
*

32 Yesu iyol alinazi ighe: “Onoon kat, yau nasaav payam. Yam aghe Mose igham aniin to sambam izi pa timbumimnja gha tighan. Ene mako. Pasaa, aniin tauu ta ipul sambam ve izilam, tauta aazne Taman Maaron igham payam. **33** Aniin tauu tau Maaron igham payam, ene neer tau ipul sambam ve izilam, leso igham tamtamon to taan tileep poia ila to Maaron.” *

34 Yes tiloon saveen tane, ve tisaav pani muul tigde: “Wai tiina, ighe tauvene, na ugham aniin tawe payei irau saawe!”

35 Yesu isaav pazi muul ighe: “Yau taug aniin tau igham tamtamon tileep matazi yaryaare. Isaav ighe tamtamon eta ilam tsiau, i aat pitoola muul mako. Ve isaav ighe neer eta ighur ilam tsiau, i aat murunu muul mako.” *

36 Yau nasaav payam wa. Onoon, yam aghita ghau toman uraat tsiau. Eemon aghur ilam tsiau mako.

37 Ve yes tau Taman Maaron igham zi timin leg na, yes tisov pale tilam tsiau. Ve tamtamon tau ighe

* **6:30-31:** Igham 16:4, 15 * **6:33:** Yo 3:13, 31; 1Yo 5:11 * **6:35:** Is 55:1-2

ilam tsiau, ene yau irau naziire mako. Mako le mako kat. *

³⁸ “Yau naleep sambam ve nazilam taan to nagham gabua eta itaghon taug lolog ne mako. Yau nazilam to nataghon Neer tau imbaan ghau nalam ne loolo. ³⁹ Ve i loolo ighe yes tau i igham zi timin leg na, irau napul eta ilale mako. Mako kat. I ighe saawe to Mbonj Murei, yau aat napaburigin zi pa mateegh. *

⁴⁰ Pasaa, Tamanj Maaron loolo tauvene: Tamtamon tisov tau ighe tighilaal Naatu ve tighur ila tooni na, i ighe tigham lepoogh poia ila tooni taghon taghon gha ila. Tauvene Mbonj Murei, yau aat napaburigin zi pa mateegh gha tiburig matazi iyaryaar.” *

⁴¹ Yes Yuda tiloon saveen tane le irau lolozi mako ve tiyau avozi pani. Pasaa, Yesu isaav pazi ighe: “Aniin tauu ta ipul sambam ve izilam, ene yau.” ⁴² Ve tivelegghi tighe: “Neer tane, i Yosep naatu Yesu. Iit tawatagh taama gha tiina. Mindai ta aazne isaav ighe i ipul sambam ve izilam?” *

⁴³ Tauvene Yesu iyol alinjazi ighe: “Yam lolomim nurnjuria pasaa? ⁴⁴ Tamtamon eta irau ilam tsiau sorok ne mako. Tamanj tau imbaan ghau nalam ne, i aat ipazaagh loolo ve igherevu, o ilam tsiau. Tamtamon tauvene, saawe to Mbonj Murei, yau aat napaburigini pa mateegh. *

⁴⁵ “Saveen tau yes propet tibooode na, ziiri ee igheen. Isaav ighe:

* **6:37:** Mt 11:28 * **6:39:** Yo 10:28+; Ro 8:29, 38+; Pil 1:6; 1Pe 1:5

* **6:40:** Yo 3:16, 11:25+ * **6:42:** Mt 13:54+; Yo 7:27+ * **6:44:** Yer 31:3; Yo 12:32; Mbanj 13:48; 1Kor 2:14

‘Maaron pale ipaghazonai tamtamon tisov pa
ngar tooni.’ *

Tamtamon tisov tau tilonloon Taman aliinja ve
tighamgham ngar ila tooni, ene aat tilam tsiau.

⁴⁶ Tamtamon eta to taan ighita Taman Maaron pai
eta soone. I tau ileep to Maaron ve ilam, i mon ta
ighita. *

⁴⁷ “Onoon kat, yau nasaav payam: Isaav ighe
tamtamon eta ighur ilam tsiau, ene i igham lep-
oogh poia ila to Maaron wa. Ve i pale ileep tauvene
taghon taghon gha ila. *

⁴⁸ Yau taug ta aniin to lepoogh maata yaryaare.

⁴⁹ Onoon, muun timbumimnja tighanghan aniin
manna izi nugh nginaanja. Eemon yes tisov
timataar. ⁵⁰ Ve aniin tau yau nasavia ne, ene ipul
sambam ve izilam. Leso yes tau ighe tighani na
timaat gha tilalez sov, ve tileep matazi yaryaare le
alok. ⁵¹ Aniin tau ipul sambam ve izilam, ve igham
tamtamon tileep matazi yaryaare, ene yau. Isaav
ighe tamtamon eta ighan aniin tane, i aat ileep
maata yaryaare le alok. Aniin tau nasasavia ne,
ene yau mizag. Pasaa, yau aat napul taug namaat
pa tamtamon to taan, lesa tigham lepoogh poia ila
to Maaron.” *

⁵² Yes Yuda tiloon saveen tane, le irau lolozi
mako kat. Tauvene tivazorai zi tighe: “Wai, neer
tane ighe igham miiza pait ve taghani? Pale gabua
tane ivot mindai?”

⁵³ Tauvene Yesu isaav pazi muul ighe: “Onoon
kat, yau nasaav payam: Isaav ighe aghan Tamta-

* **6:45:** Is 54:13; Yer 31:34; Hib 8:10; 1Yo 2:27 * **6:46:** Igham

33:20; Yo 1:18 * **6:47:** Yo 3:36; 1Yo 5:13 * **6:51:** Hib 10:5, 10

mon Naatu miiza mako, ve aghun sinj tooni mako, yam aat irau agham lepoogh poia ila to Maaron mako. † *

⁵⁴ Eemon yes tau tighan mizag ve tighun sinjig, ene tigham lepoogh poia ila to Maaron itaghon itaghon gha ila. Ve saawe to Mbonj Murei, yau aat napaburigin zi pa mateegh. ⁵⁵ Pasaa, mizag, ene aniiñ tauu. Ve sinjig, ene yaa tauu to ghunuun. ⁵⁶ Isaav ighe tamtamon eta ighan mizag ve ighun sinjig, ene aat yeiru nivalupu ghei nimin eemon, ve i ileep ilam tsiau, ve yau naleep ila tooni.

⁵⁷ “Tamanj tau imbaanj ghau nalam ne, i lepoogh maata yaryaare puughu, ve yau naleep ila tooni. Ve tamtamon tau ighe ighanghan ghau ve ighamgham tapiri ilam tsiau na, tauvene paam. I aat igham lepoogh poia ilam tsiau. ⁵⁸ Aniiñ tau ileep sambam ve izi, ene aniiñ maata ite pa aniiñ manna tau muunj timbumimña tighanghani izi nugh nginaanja na. Pasaa, yes tau tighan manna tawe, tisov timataar wa. Eemon tamtamon tau ighan aniiñ tau yau nasavia na, i aat ileep maata yaryaare le alok.”

⁵⁹ Yesu ileep izi nugh Kapernaum, ve ipagha-zonjai zi pa Maaron aliinja ilonj ila rumei toozi, ve isavia saveenj tane pazi.

Tapul Yesu sov. Pa saveenj tau igham ghiit taleep mataan yaryaare na igheen tooni

† **6:53:** Zeran ngara siriv tighe saveenj to Yesu tane injarui ngar to ghaniñ pasa. Ve ngara siriv tighe mos ziiri tane, puughu tauvene: Iit aat tagham Yesu imin iit leen, ve taghur ila taghe patanjani tau i ibaado ve mateegh tooni, ene ireu sosor toit. Ighe tagham tauvene, i pale ipalot ghiit imin aniiñ, ve tagham lepoogh poia ila tooni.

* **6:53:** Mt 26:26+

60-61 Yesu ziŋeera katini tiloon saveen tooni tana, le irau lolozi mako. Tauvene tiyau avozi pani tighu: “Wai, saveen tane patanani kat! Sei pale iloonja ve ighur ila?”

Eemon Yesu iwatagh ighe yes tiyau avozi pa aliinja tau i isavia na. Tauvene isaav pazi ighe: “Mindai, yam arere ghau pa saveen tsiau tane, tauta aghe apul ghau ne? **62** Ighe tauvene, ve murei yam aghita Tamtamon Naatu imuul izala pa nugh tau muun i ileep pani na, ene pale agham ngar mindai? *

63 Maaron Avuvu mon ta irau igham lepoogh poia to anunuun ivot. Gabua tau tamtamon to taan tighamu ila tauzi tapirizi ma ngar toozi na, eta irau iuul zi to tigham lepoogh tawe ne mako. Saveen tau yau nasavia payam, tauta imin eez payam to agham Maaron Avuvu ve aleep poia ila to Maaron. *

64 Eemon tamtamon siriv tau tileep ila yam somim na, tighur ila mako.” Yesu isavia saveen tane pasaa, saawe tau i ipaburigin uraat tooni ve ilam ne, i iwatagh yes tau tighur ila tooni mako. Ve neer tau murei pale ighuru ila koinja nimazi na paam, Yesu iwataghi.

65 Yesu iseen saveen tooni muul ighe: “Puughu tane, ta yau nasaav payam pataghaan naghe: ‘Tamtamon eta irau ilam tsiau sorok ne mako. Tamaŋ Maaron aat iuule ve igherevu, o ilam tsiau.’ ” *

66 Yesu isavia saveen tane le isov, ra tamtamon katini tau muun titaghoni na, timoghaagh pani,

* **6:62:** Mk 16:19; Mbanj 1:9+; Ep 4:8 * **6:63:** 2Kor 3:6; 1Pe 1:23

* **6:65:** Yo 6:44

ve tilaagh tomania muul mako. ⁶⁷ Tauvene Yesu ighason mbiwa tooni saṇavul ve ru ighe: “Mindai, yam paam aghe apul ghau ve aghau?”

⁶⁸ Simon Petrus iyol aliinja ighe: “Tiina, nighau pale nila to sei? Pa saveen to lepoogh maata yaryaare, ene igheen tsio. ⁶⁹ Yei nighilaal ghom wa, ve nighur ilat tsio nighe yo neer patabuyaay tauu ta Maaron imbaay ghom ulam.” *

⁷⁰ Tauvene Yesu iyol aliṇazi ighe: “Yam saṇavul ve ru tane, yau taug nisiigh gham amin leg. Eemon tamtamon tsiam ee, i imin Neer Saghati le wa.”

⁷¹ Saveen tane, Yesu isavia iza to Yudas tau Simon Iskariot naatu. Onoon, mbiwa saṇavul ve ru tooni, Yudas, i toozi ee. Eemon murei, i ighur Yesu ila koinja nimazi. *

7

Yesu tazṇa tighur ila tooni mako

¹ Murei pa tane, Yesu loolo pa laghoon izi Yudea muul mako. Pasaa, i iwatagh: Daaba to yes Yuda tau tileep izi sewe na tiliil eez to tiravu imaat. Tauvene ilaghlaagh izi Galilaia mon. ² Saawe tana, lupuun tiina ite to yes Yuda ilam igharau. Lupuun tawe, to matazi ingal saawe tau timbuzṇa tilaghlaagh izi nugh ṇginaaṇa ve tilepleep ila dur mon. *

³ Tauvene Yesu tazṇa tisaav pani tigde: “Ah, upul sene, ve ula pa Yudea. Leso ziṇeram siriv tau tilepleep ta sewe tighita uraat tau yo ughamgham zi ne paam. ⁴ Isaav ighe neer eta ighe vaaru

* **6:69:** Mt 16:16; Yo 11:27

* **6:71:** Mt 26:14+

* **7:2:** Wkp 23:34+

ilaan irau nugh, ene irau igham uraat tooni imin ngozaan mako. Tauvene isaav ighe yo ugham uraat tauvene, yo aat utotoi naghom pa eval tiina to taan.”

⁵ Onoon, ene Yesu tazña duduun. Eemon yes paam tighur ila tooni soone. Tauta tisaav pani tauvene. *

⁶ Tauvene Yesu isaav pazi ighe: “Saawe sindei ta yam aghe ala, ene poia mon. Eemon saawe tsiau to nala, ene soone. ⁷ Tamtamon to taan lezi pu-ughu eta to tighur koi payam mako. Eemon yau, o tighurghur koi payau. Pasaa, ngar sasaghati naol tau tighamgham zi na, yau navoti zi le tighazoon. *

⁸ Tauvene yam mon azala pa lupuun tiina tawe. Yau aat nalat mako. Pale naleep. Pa saawe tsiau to nazala, ene soone.” ⁹ Yesu isaav pazi tauvene, ve ileep izi Galilaia.

Yesu izala pa Yerusalem ve ighita lupuun tiina to Dur *

¹⁰ Tauvene Yesu tazña tizala pa lupuun tiina tana. Murei ra, i paam aana iburig ve itaghon zi gha izala. Eemon ilaagh ghazoonja mako. Ilaagh imin yongaan mon, ve ila ivot. ¹¹ Daaba to yes

* **7:5:** Mbo 69:8; Mk 3:21 * **7:7:** Yo 3:19, 15:18+ * **7:9:** Lupuun tiina to Dur ivotvot pa Septemba ma Oktoba. Saawe tana, ene saawe to yaun oliv ve vaen anoonja. Saawe to lupuun tawe, yes Yuda eval tizala pa Yerusalem pa sunjuun, ve tigharaat dur enjaenja le irau zi, ve tileep ilonj ila irau wik ee. Lupuun to Dur ngara tauvene: Yes Yuda lolozi poia pa oliv ve vaen anoonja tau tiyau zi na, ve tipait Maaron pani. Ve matazi ingal saawe tau timbuznja tilaghlagh izi nugh nginaanja tau le yaa mako, ve Maaron igham yaa ivot ila maet tiina ee ve ireer, leso tighunu.

Yuda tau tileep pa lupuun tiina tawe tiil Yesu, ve tivaghasoni zi tighe: “Ñeer tawe ileep sindei?”

¹² Ve eval tiina tivazorai zi pani paam. Siriv tighe: “I ñeer poia.” Ve siriv tighe: “Mako, i ivatombanoi eval tiina le tisor pa eez to Maaron.” ¹³ Eemon saveen tau tisasavia pa Yesu na, tisavia ivot ighazon mako. Pasaa, tiroi pa daaba to yes Yuda.

¹⁴ Tilam bodbodaan to lupuun tiina tana, ra Yesu ilam peria, ve malmali izala pa Rumei Tiina, ve ipaghazonai tamtamon pa Maaron aliina.

¹⁵ Daaba to yes Yuda tiloon saveen tooni le ngar toozi imbool. Ve tisaav tighe: “Wai, ñeer tane, ñeer ngara eta igham ngar pani mako. Mindai ta i le ngar tiina tauvene?” *

¹⁶ Yesu isaav pazi ighe: “Saawe tau napaghazonai gham pa Maaron aliina, saveen tau navovotia payam ne, ene yau saveen tsiau mako. Ene saveen to Ñeer tau imbaan ghau nalam ne. *

¹⁷ Isaav ighe tamtamon eta ighe itaghon Maaron loolo, i aat ighilaal: Saveen tau yau napaduduun gham pani ne, ene ilam pa Maaron, ma nasavia itaghon taug ngar tsiau? ¹⁸ Isaav ighe tamtamon eta isasavia saveen itaghon tauu ngar tooni, ene taghilaal taghe i ighamgham pa tauu eeza mon. Eemon isaav ighe tamtamon eta izuari ghi pa pakuruun I tau imbaan ilam na eeza, ene i aavo onoon, ve ngar tooni iduduun mon. Karom eta ighen ila loolo mako. ¹⁹ Muun, Mose igham tutuun pa timbumimna. Eemon tsiam eta itaghon

* **7:15:** Mt 13:54 * **7:16:** Yo 14:24

duduṇaini mako. Mindai ta aazne azuari gham aghe arav ghau namaat?” *

²⁰ Eval tiina tiloon saveeṇ tooni tane, ve tisaav pani tighe: “Wai, sei ighe irav ghom umaat? Avuvu saghati eta aat izeev ghom, tauta ṅgar tsio ivaghamgham.” *

²¹ Yesu iyol aliṇazi ighe: “Yau naghham uraat ṅgereeta eemon geeg tane, ve yam asov arur pani ve agham ṅgar naol.” *

²²⁻²³ Aghita. Muuṇ, Mose ighur tutuun payam pa ṅgar to ravuun geegau warozi. Eemon i ipaburigin ṅgar tawe mako. Timbumimṇa Abaram, Isak, ve Yakop, ta tipaburigini. Murei ra, Mose isavia ṅgar tana tutuunṇa payam. Yam aghe ataghon tutuun tooni tana, tauta aravrav natumimṇa warozi. Eemon saawe siriv, yam aat agham uraat tana ila umbom patabuyaṇ to Maaron. Mako pale amalaṇ pa tutuun to Mose. †

Laak, isaav ighe yam taumim aghamgham tauvene, mindai ta atemim yavyav payau? Yau nalam pa ghamuun uraat to uleeṇ. Tauta nagharaat narape ee tiini isov poia ila saawe to umbom patabuyaṇ. *

²⁴ Yam agabiiz gabua paavo mon sov. Aleep ve agabiiz poghania loolo tooni paam. Leso gabizoon tsiam iduduun.”

* **7:19:** Mbaṇ 7:38, 53; Ro 2:17+ * **7:20:** Mk 3:22 * **7:21:**

Yo 5:2+ † **7:22-23:** Yuda tinazi tipoop natuzṇa zitamoot ve mbon imin liim ve tol pani, mako uraat to ravuun natuzṇa tana warozi ivot. Tauvene, isaav ighe tipoop zi pa Fraide, ene Sarere to wik murei, yes aat tirav warozi. Eemon Sarere, ene umbom patabuyaṇ to Maaron. * **7:22-23:** Gnp 17:9+; Wkp 12:3

Tamtamon tivazorai zi pa Yesu: I Mesia, ma mako?

²⁵ Tamtamon siriv to Yerusalem tiloon Yesu saveen tooni tana ve tisaav tighe: “Mindai, neer tau daaba toit tizuari zi pa ravuunni, tauta ene?” *

²⁶ Aghita. Aazne, i isavsaav ila eval tiina matazi. Eemon daaba toit tisavia saveen eta pani mako. Tineneen mon. Mindai, yes aat tiwataghi tighe i Mesia taa? ²⁷ Eemon neer tane, iit tawatagh nugh tau i ilam pani. Ve saawe tau Mesia tauu ilam, tamtamon eta pale irau iwatagh nugh sindei tau i ilam pani ne mako.”

²⁸ Yesu ipaghazonai tamtamon pa Maaron aliina izi Rumei Tiina naagho, ve isaav aliina tiina ighe: “Mindai, yam agham ngar aghe awatagh ghau, ve awatagh nugh tau nalam pani ne? Alooj. Yau nataghon taug lolog ve nalam ne mako. Taman Maaron imbaan ghau ta nalam. I aavo onoon, ve itataghon saveen mbuaan tooni. Yam awataghi mako. ²⁹ Eemon yau o nawataghi. Pasaa, naleep tooni ve i imbaan ghau, ta nalam.” *

³⁰ Yes tiloon saveen tooni tana, ve tighe tikisi pataghaan. Eemon eta niima itutu mako. Pasaa, saawe tooni ivot soone. ³¹ Tamtamon katini tau tileep ila eval tiina sosozi ve tilonlooj saveen tooni na, tighur ila tooni ve tisaav tighe: “Mesia tau tasasanani ne, isaav ighe ilam, pale irau iliiv neer tane pa ghamuun gabua ngeretazi? Mako. I tauta ene.”

Yes daaba tighe tikis Yesu

* 7:25: Yo 5:18 * 7:29: Mt 11:27; Yo 10:15

³² Zeran tutuunja tiloonj eval tiina tivakamunai zi pa Yesu tighe i Mesia. Tauvene yesja yes daaba to watoonjrau timbaanj uraata siriv to Rumei Tiina tila to tikisi.

³³ Yesu isaav pazi ighe: “Yau aat itinja taleep rig, mako napul gham, ve namuul nala pa Njeer tau imbaanj ghau nalam ne.” *

³⁴ Murei, yam pale azuari gham pa iloonj ghau. Eemon irau andeenj ghau mako. Pasaa, nugh tau yau nala pani, ene yam irau ala pani mako.” *

³⁵ Tauvene daaba to yes Yuda tivaghasoni zi tighe: “Njeer tane pale ila sindei kat gha leso iit taghita muul mako? Ma i ighe ila to zetaannja siriv tau tila tileep ila yes Grika sosozi we, leso ipaghazonjai yes Grika paam pa Maaron aliinja?

³⁶ Saveenj tooni tane, puughu mindai? Pa i isaav pait ighe: ‘Yam aat azuari gham pa iloonj ghau. Eemon irau andeenj ghau mako. Ve nugh tau yau nala pani ne, yam irau ala pani mako.’ ”

Yesu irau igham leen yaa to lepoogh maata yaryaare

³⁷ Saawe tau lupuun tana ighe isov, ene saawe tiina kat to tilup zi pa sunjuunj. Saawe tana, Yesu iburig, ve isaav aliinja tiina tauvene: “Isaav ighe tamtamon eta murunu, o ilam tsiau. Yau aat naghama le yaa to ighun.” *

³⁸ Pasaa, Maaron aliinja tau tiboode na isaav ighe: Tamtamon tauvene, yaa to lepoogh maata yaryaare pale ivon ila loolo ve ireer ivot.” *

* **7:33:** Yo 12:35
4:10, 14; Syg 22:17

* **7:34:** Yo 8:21, 13:33+
* **7:38:** Is 12:3, 44:3, 58:11; Ezek 47:1+

* **7:37:** Is 55:1; Yo

³⁹ Saveen tane, Yesu isavia iza to Maaron Avuvu. Murei, i igham Avuvu tawe pa tamtamon tiso tau tighur ila tooni. Eemon saawe tau i isavia saveen tane, eval tiina tigham Avuvu Patabuya soone. Pasaa, saawe to Yesu itotoi eeza tiina ivot ighazoon, ene ilam soone. *

Tamtamon tigham ngar naol pa Yesu

⁴⁰ Eval tiina tiloon Yesu aliina tana, ve tamtamon siriv tiburig ve tisaav tige: “Onoon kat, propet tiina tau tasasanani ne, tauta ene!” *

⁴¹ Ve siriv tige: “Mako. Neer tane, i Mesia.” Ve siriv tizoor zi tige: “Aghita. Mesia irau ivot izi taan sirivu to Galilaia? Ene aat mako. ⁴² Pasaa, Maaron aliina tau tiboode na isaav ighe Mesia pale ivot ila ziiri waaro to David, ve tipopa izi David nugh tooni Betelem.” *

⁴³ Tauvene eval tiina tawe tigham ngar maata maata pa Yesu le tivalagh tauzi. ⁴⁴ Siriv tige tikisi pataghaan. Eemon tamtamon eta niima itutu mako.

Daaba to yes Yuda tighur ila to Yesu mako

⁴⁵ Tauvene yes uraata tau timbaan zi tila pa kisiin Yesu na, timuul tila sorok to yes daaba to watoonrau ve zeran tutuuna. Daaba tawe tighit zi, ve tighason zi tige: “Mindai ta akis neer tawe ve aghamu gha yamna alam mako?”

⁴⁶ Yes uraata tana tiyol alinazi tige: “Wai, ta muun ve ilam, tamtamon eta isavsaav imin neer tawe mako.” *

* **7:39:** Yoel 2:28; Yo 14:16+; Mban 2:4 * **7:40:** Lo 18:15+; Yo 6:14 * **7:42:** Mbo 132:11; Mika 5:2; Mt 2:5+ * **7:46:** Mt 7:28+

⁴⁷ Tauvene zeran tutuunja tana tiyaon zi tighe: “Wai, karom tooni ikau ngar tsiam paam?

⁴⁸ Aghita. Daaba toit ma zeran tutuunja, toozi eta ighur ila to neer tawe? Mako. *

⁴⁹ Ewe eval tiina tau tikankaan pa tutuun to Mose, tauta tighur ila tooni. Ve tambaan zi paam. Murei, aatyavyav to Maaron pale iza toozi.”

⁵⁰ Yes daaba tana, tamtamon toozi ee tau yesja tilepleep na, eeza Nikodemus. I neer tau muun ila to Yesu ve yesuru tisavsaav na. I isaav pazi ighe: *

⁵¹ “Ou, tutuun toit isaav mindai? Irau tasaav sorok taghe tamtamon eta igham sosor? Mako. Iit aat taloon saveen tooni, ve tagabiiz poghania ngar tau i ighamghamu na, o taghur atuya pani.” *

⁵² Yes tiyol aliinja tighe: “Wai, ighe vene, na yo paam aat to Galilaia taa? Utiir poghania Maaron saveen tooni ve ugham ngar pani poi. Propet eta irau ivot izi taan sirivu to Galilaia ne mako.” ⁵³ Ra yes tisov tighau tila pa ruum toz toz.

8

Yesu loolo isaghatin livaa ee tau ighur boog

¹ Yesu ipul Yerusalem, ve izala pa loloz Oliv, ve ileep ta sewe pa mbon. ² Mbonoozo ndoromroome, ve i imuul ila gha ilon ila sirsiir to Rumei Tiina. Ve eval tiina tilam tilivuti. Tauvene i mboole izi, ve ipaghazonjai zi pa Maaron aliinja. ³⁻⁴ I isavsaav pazi, ve yes ngara to tutuun tomania zeran tutuunja siriv tigham livaa ee, gha tila tivot tooni. Livaa tawe ighur boog, ve tamtamon siriv tighita. Tauta

* **7:48:** Yo 12:42; 1Kor 1:26, 2:8 * **7:50:** Yo 3:1, 19:39 * **7:51:** Lo 1:16+

tikisi ve tighamu ila to Yesu. Ra tipayooze ila eval tiina matazi, ve tisaav pa Yesu tigde: “Mos puughu, ughita livaa tane. I ighur boog, ve tamamon siriv tighita. ⁵ Mose ighur tutuun ariaana pait ighe: Livaa tauvene, iit aat taravu pa maet gha imaata. Ve yo ughe mindai?” *

⁶ Yes tisavia saveen tane imin tovaanini. Ighe i isavia saveen eta isosor, mako imin le puughu to tipayooze pa savaaveen. Eemon Yesu iyol alinazi rekia mako. Izi imbutur, ve ibodbood ila taan pa niima nguruuna.

⁷ Yes tinoknokghasoniini. Tauvene maata izaa, ve isaav pazi tauvene: “Tsiam eta, ighe le sosor eta mako, o igham maet ve irav livaa tane imin maata.” *

⁸ Ra maata izi muul, ve ibodbood pa niima nguruuna ila taan.

⁹ Yes tiloon saveen tooni, ve enaen tipaspas gha tighawaar. Zolmana timuun, ve yes paghpaaghu titaghon zi gha tisov tighau tila. Tauvene livaa tana zigani iyozyooz ila Yesu naagho. ¹⁰ Yesu iburig iyooz, ve ighasoni ighe: “Livaa, yes tau tigham ghom ulam na, tila mindai? Eta ileep to ighur atuya payo mako?”

¹¹ Livaa tana iyol aliina ighe: “Tiina, eta ileep sene muul mako. Tisov tighawaar tila wa.”

Yesu isaav pani muul: “Ighe tauvene, yau paam irau naghur atuya payo mako. Ula. Eemon matam ingal. Murei, ugham sosor muul sov.” *

Yesu imin ghazoonja to taan

* **8:5:** Wkp 20:10; Lo 22:22+

* **8:7:** Mt 7:1+; Ro 2:1, 22

* **8:11:**

Yo 3:17, 5:14

¹² Yesu isaav ila pa eval tiina muul ighe: “Yau taug ta ghazoonja to taan. Isaav ighe tamtamon eta itaghon ghau, i aat ilaagh ila ndoroom loolo muul mako. Ghazoonja to Maaron pale igheen tooni, ve igham lepoogh poia ilam tsiau.” *

Yesu ipariaan tamtamon to tighur ila saveen tooni

¹³ Zeran tutuunja tiloon saveen tane, ve tisaav pani tigde: “Ughita. Aazne, yo usavia taum, ve upariaan taum saveen tsio leso tamtamon tighur ilat tsio. Eemon lem gabua eta to ipalot saveen tsio leso nighur ila ne mako. Saveen tauvene, pale nighur ila mindai?”

¹⁴ Yesu iyol alinazi ighe: “Onoon, yau nasavia taug ve napariaan taug saveen tsiau, leso tamtamon tighur ilam tsiau. Ve saveen tsiau, ene onoon. Yam irau aghur ila. Pasaa, yau nawatagh nugh tau naleep pani gha nalam ne, ve aat namuul nala pani. Eemon yam awatagh nugh tawe mako.” *

¹⁵ Gabizoon tsiam, ene itaghon ngar to tamtamon. Eemon yau nagabiiz tamtamon imin yam mako. ¹⁶ Ve isaav ighe nagabiiz tamtamon eta, ene gabizoon tsiau aat iduduun. Pasaa, zigau nagabiiz tamtamon eta mako. Taman tau imbaan ghau nalam ne, yeiru nilup ghei pa uraat tana.

¹⁷ Saveen ziiri ee tau igheen ila tutuun tsiam na isaav tauvene: ‘Isaav ighe tamtamon ru tipariaan saveen eta, ve tisavia saveen raraate, ene irau taghur ila taghe saveen tana, ene onoon.’ *

* **8:12:** Mbo 27:1; Is 49:6; Lu 2:32; Yo 1:4+; 2Kor 4:6 * **8:14:** Yo 5:31, 7:28, 9:29 * **8:17:** Lo 19:15; Mt 18:16

¹⁸ Aazne, yau taug napariaan saveen tsiau. Eemon Taman tau imbaan ghau nalam ne, i paam ipariaan saveen tsiau. Tauvene yam irau aghur ila.” *

¹⁹ Tauta tighasoni tighe: “Tamam ileep sindei?”

Yesu iyol alinjazi ighe: “Yam awatagh ghau mako. Tauta awatagh Taman mako. Ve imin ta awatagh ghau, kanan awatagh Taman paam.” *

²⁰ Yesu ipaghazonai tamtamon pa Maaron aliinja izi nugh tau tisiksik maet pa uraat to Rumei Tiina, ve isavia saveen tane. Eemon tamtamon eta ikisi mako. Pasaa, saawe tooni ivot soone.

Isaav ighe taghur ila to Yesu mako, ene pale tamaat tomania sosor toit gha talaleen

²¹ Yesu isaav pazi muul ighe: “Yau pale napul gham ve nala, ve yam ail ghau. Eemon irau aghit ghau mako. Pasaa, nugh tau yau pale nala pani, ene yam irau ala pani mako. Tauvene yam pale amatmaat tomania sosor tsiam gha alalemim.” *

²² Daaba to yes Yuda tiloon saveen tane, ve tivaghasoni zi tighe: “Wai, i isaav ighe nugh tau i pale ila pani, ene iit irau tala pani mako. Saveen tooni tane, puughu mindai? Ma i ighe ila irav tauu imaat?”

²³ Yesu isaav pazi muul ighe: “Aloon. Yam to siinja. Ve yau to saanja. Yam to taan, tauta ataghon ngar to taan. Ve yau to taan mako.” *

²⁴ Puughu tane ta nasaav payam naghe yam pale amatmaat tomania sosor tsiam gha alalemim.

* **8:18:** 1Yo 5:9 * **8:19:** Yo 14:7; 1Yo 2:23 * **8:21:** Yo 7:34,
13:33 * **8:23:** Yo 3:31

Pasaa, yam aat aghur ila aghe I tau eeza YAU NALEPLEEP, ene yau taug tane. *

Ve isaav ighe aghur ilam tsiau mako, yam aat amatmaat tomania sosor tsiam, gha alalemim.” *

²⁵ Yes tiloon saveen tane, ve tighasoni muul tighe: “Yo sei kat? Usavia taum poi.”

Yesu iyol alinazi ighe: “Saawe tau napaburigin uraat tsiau ve ilam, yau navovotia taug payam.

²⁶ Yau naghita ngar tsiam naol isosor. Tauvene leg saveen naol to nasavia payam, ve yau irau naghur atuya payam pa sosor tsiam. Eemon irau naghama tauvene mako. Pasaa Neer tau imbaan ghau nalam ne, i aavo onoon. Ve saveen tau nalonloona ila tooni, tauta navovotia pa yam tamtamon to taan.”

²⁷ Saveen tane, i isavia izaa to Taama Maaron. Eemon yes tighilaal saveen tooni puughu mako.

²⁸ Tauvene Yesu iseen saveen tooni muul ighe: “Saawe tau yam apayooz Tamtamon Naatu izaa, †

ene pale ngar tsiam ivot, ve aghilaal aghe: Maaron tau eeza YAU NALEPLEEP, ene yau taug tane. Ve awatagh aghe yau naghama gabua eta itaghon taug ngar tsiau mako. Saveen tau naloona ila to Tama, tauta navovotia pa tamtamon. *

* **8:24:** Uwaat Maaron Igham Mulin Yes Israela (=Kisim Bek o Eksodus) 3:14. Maaron eeza Yoova (o Yahweh), puughu tauvene ‘Yau nalepleep.’ Tauvene saveen ziiri tane, puughu tauvene: Iit aat taghur ila to Yesu taghe i Maaron. * **8:24:** Igham 3:14; Yo

3:18 † **8:28:** Mos ziiri tane, Yesu isavia saawe tau tiravu ila ai pambaroon ve tipayooze izaa. * **8:28:** Yo 5:30, 12:32, 14:24

²⁹ Neer tau imbaan ghau nalam ne, irau ipul ghau mako. I ilepleep tomani ghau. Pasaa saawe isov, yau nataghon ngar tau i loolo pani.” ³⁰ Yesu isasavia saveen tane, ve tamtamon katini tau tilonloonja na tighur ila tooni.

Saveen onoon irau ipas ghiit tavot pa saghati tapiri

³¹ Ra Yesu isaav pa Yuda siriv tau tighur ila tooni na tauvene: “Isaav ighe akis saveen tsiau tunja ve ataghoni, ene aat amin ziñerag duduun. ³² Ve yam pale awatagh katin saveen onoon, ve saveen tawe ipas gham avot pa saghati tapiri. Leso amin besoonja sorok muul sov.” *

³³ Yes tiyol aliinja tige: “Wai, yei tane Abaram paaghu tooni. Yei nimin besoonja sorok pa tamtamon eta pai eta soone. Mindai ta yo usaav ughe yei aat nimin besoonja sorok muul mako?” *

³⁴ Yesu iyol ghasoniin toozi ighe: “Onoon kat, yau nasaav payam. Tamtamon tisov tau tinoknok ghamuun ngar saghati, ene timin besoonja sorok pa ngar saghati. Pasaa, ngar tawe ta ighamgham pooz pazi.” *

³⁵ Besoonja eta irau ileep tomania ruum taama taghon taghon gha ila ne mako. Naatu mon ta ileep tomania irau saawe.” *

³⁶ Tauvene isaav ighe Maaron Naatu ipas gham avot pa saghati tapiri, i aat ipas gham kat. Leso saghati ingin gham muul sov.” *

* **8:32:** Ro 6:18, 8:2; Ga 5:1 * **8:33:** Lu 3:8+ * **8:34:** Ro 6:16+;
 2Pe 2:19 * **8:35:** Gnp 21:10; Ga 4:30 * **8:36:** Hib 2:14+; 1Yo 3:6, 9

³⁷ Onoon, yam paaghu to Abaram. Eemon saveen tsiau le niia eta to igheen ila lolomim mako. Tauta aazne, azuari gham aghe le arav ghau namaat. ³⁸ Gabua tau yeiru Taman nileep ve naghita, tauta nasasavia payam. Ve yam tauvene paam. Ngar tau yam alonloonja ila to tamamim, tauta aghamghamu.”

Savunugha ta Abaram paaghu tooni duduun?

³⁹ Yes tiyol aliinja tighe: “Yei timbumai ta Abaram.”

Tauvene Yesu isaav pazi ighe: “Imin ta yam Abaram paaghu tooni duduun, kanan ataghon ngar tau muun i ighamghamu. *

⁴⁰ Eemon yam asapir pa ngar tooni. Aghita. Aazne, yau navotia saveen onoon tau naloona ila to Taman Maaron na payam. Eemon ngar tsiam iyaryaan aghe le arav ghau namaat. Abaram, i igham ngar tauvene mako. ⁴¹ Ene yam ataghon tamamim ngar tooni.”

Yes tiyol aliinja tighe: “Yei tane, Abaram paaghu tooni duduun. Ve Tamamai eemon ta Maaron. Tiinmainja tipoop ghei sorok mako.”

⁴² Yesu iyol alinjazi ighe: “Imin ta yam Maaron natja duduun, kanan lolomim payau. Pasaa, yau naleep tooni ta nalam. Yau nataghon taug lolog ve nalam mako. I imbaan ghau ta nalam. *

⁴³ Mindai ta ngar tsiam ivot pa saveen tsiau soone? Taliinamim aat ivool wa. Tauta yam irau to aloon saveen tsiau mako. *

* **8:39:** Ro 2:28; Ga 3:7, 29
Ro 8:7; 1Kor 2:14

* **8:42:** Yo 16:27+; 1Yo 5:1

* **8:43:**

⁴⁴ Alooŋ wa! Yam tamamim ta Sadan! Tauta aghe le ataghon katin ngar tau i loolo pani. Saawe imin maata ve ilam, i neer to ravuunj tamtamon timat-maat. Ve i itaghon saveenj onoon mako. Pasaa, saveenj onoon eta igheen tooni mako. I karom tamazi. Saawe isov, i isasavia saveenj karom tau ighengheen ila loolo na. Ve i ta imin puughu pa saveenj karom ta naol ne. *

⁴⁵ Saveenj isov tau yau nasasavia payam, ene onoon mon. Eemon yam lolomim pa saveenj onoon mako, tauta aghur ila saveenj tsiau mako.

⁴⁶ Ma mindai? Isaav ighe tsiam eta ighit ghau naghama sisor eta, na ivotia lak! Ve isaav ighe leg sisor eta mako, ve nasasavia saveenj onoon mon payam, mindai ta aghur ila saveenj tsiau mako? *

⁴⁷ Sei tau ighe imin Maaron le, ene ilonjlooŋ Maaron aliinja ve itaghoni. Eemon yam tamtamon to Maaron mako. Tauta alooŋ aliinja mako.” *

Saawe tau Abaram ivot soone, Yesu ileep wa

⁴⁸ Yesu isavia saveenj tane, ve yes Yuda tiyol aliinja tighe: “Wai, saveenj tauta nisavia ila wa. Yo ukankaan pa Maaron imin yes Samaria. Yo, avuvu saghati izeev ghom!” *

⁴⁹ Yesu iyol alinjazi ighe: “Yau, avuvu saghati eta izeev ghau mako. Ngar tau yau naghama nghanu, ene to napait Taman Maaron eeza. Eemon yam avelegh ghau. ⁵⁰ Yau naghama pa taug ezag mako. Eemon Neer ee izuari ghi ighe ighama ezag imin tiina, ene Taman Maaron. Ve uraat to gabizoon

* **8:44:** Gnp 3:1+; 1Yo 3:8 * **8:46:** Hib 4:15; 1Pe 2:22; 1Yo 3:5

* **8:47:** Yo 10:26, 18:37; 1Yo 4:6 * **8:48:** Mk 3:21+; Yo 7:20, 10:20

gabua ve ghuruun atuya, ene igheen ila i tauu niima. *

⁵¹ Onoon kat, yau nasaav payam: Isaav ighe tam-tamon eta maata kisin saveen tsiu ve itaghoni, i aat irau imaata gha ilale ne mako. Mako kat.” *

⁵² Yes tiloon saveen tane, ve tisaav pani tighes: “Aa, ngarig gha niwatagh katin ghom. Yo tane, avuvu saghati izeev ghom! Pasaa, Abaram toman propet tisov timataar tila wa. Eemon yo usaav tauvene: Ighe tamtamon eta maata kisin saveen tsio ve itaghoni, i aat irau imaata gha ilale ne mako.

⁵³ Timbumai Abaram, i imaata wa. Ve yes propet paam timataar wa. Yo saa neer? Yo ughes uliiv Abaram? Usavia taum poi!”

⁵⁴ Yesu iyol aliñazi ighe: “Isaav ighe napait taug ezag, ene aat saveen tsiu ighur mako. Paitoon tauvene, ene kaut sorok. Eemon Tamañ tau yam awatwaato aghe Maaron tsiam na, i tauu ta ipait ghau ve igham ezag imin tiina. ⁵⁵ Yam awataghi rigta mako. Eemon yau o nawataghi. Tauta nalonloon aliña, ve nataghoni. Isaav ighe nasaav naghe nawataghi mako, ene aat nagham karom imin yam. ⁵⁶ Muun, timbumim Abaram ighita saawe tsiu to navot izi taan. I iwatagh gabua tau pale ivot pa saawe tane, tauta tintini ve loolo poia kat.” † *

⁵⁷ Tauvene yes Yuda tana tiyol Yesu aliña tighes: “Wai, ndaman tsio tamoot ru sanjavul (50) soone. Ve yo upakur taum ughes ighita Abaram!”

* **8:50:** Yo 5:41, 7:18 * **8:51:** Yo 5:24, 11:26 † **8:56:** Ngara siriv tighes Maaron ivotia gabua tau murei Mesia pale ighamu na pa Abaram ila vivuun. * **8:56:** Hib 11:13

⁵⁸ Yesu isaav pazi muul ighe: “Onoon kat, yau nasaav payam: Abaram ivot soone, ve YAU NALE- PLEEP.” *

⁵⁹ Saveen tooni tane ipas yes Yuda tana atezi. Tauvene tikor maet tigde tiravu pataghaan. Eemon i inguaaz tauu, ve ipul Rumei Tiina, ve ivot ila muuri.

9

Yesu igharaat neer ee tau maata kumkuuma

¹ Yesu ilaagh ila le ighita neer ee tau maata kumkuuma. I, tiina ipoopa tauveve. ² Mbiwa tooni tighita neer tawe, ve tighason Yesu tigde: “Padudunjaan, puughu mindai ta neer tane tiina ipoopa maata kumkuuma? I tauu sosor tooni, ma tiina gha taama sosor toozi?” *

³ Yesu iyol ghasoniin toozi ighe: “Neer tane igham sosor mako, ve taama gha tiina paam tigham sosor mako. Patanani tane ivot pani, leso Maaron iuule ve itotoi tapiri ve uraat tooni ivot ighazonj. *

⁴ Aazne, ene saawe to mataaz ve taleep ila ghazonja. Tauvene iit aat tagham uraat to Taman Maaron tau imbaan ghau nalam ne. Pasaa, saawe to ndoroom, ene ilam igharau wa. Saawe tana ighe ivot, ene aat tamtamon eta irau igham uraat muul mako. ⁵ Saawe tau nalepleep izi taan, yau taug ta namin ghazonja pa tamtamon to taan.” *

* **8:58:** Igham 3:14; Yo 1:1; Kol 1:17; Syg 1:8 * **9:2:** Lu 13:2+

* **9:3:** Yo 11:4 * **9:5:** Yo 1:4, 5:17, 8:12, 12:35

⁶ Yesu isavia saveen tane le isov, mako ikor taan rig ila niima ve inazuv ila, ra ikepu ve imusu ila neer tana maata. *

⁷ Ra isaav pani ighe: “Ula yaa naliu Siloam, ve umin matam.” (Yaa tawe eeza, puughu tauvene: ‘Mbanjoon.’) Tauvene neer tana itaghon Yesu aliina, ve ila imin maata. Saawe tau ipul yaa tawe ve imuul ilam, maata poia ve ighita nugh.

⁸ Zeetja siriv tau ruum toozi igharau, ve yes tau muun tighita neer tana isunsun tamtamon pa le gabua na, tighita neer tana, le tirur pani tigha: “Wai, neer maata kumkuuma tau muun ilepleep ve isunsun tamtamon pa le gabua na, tauu ta ene?”

⁹ Siriv tigha: “Vee! I tauu ta ene.” Ve siriv tigha: “Mako. Ene aat neer ite paam tau yesuru naghozi raraate.”

Ve neer tana iyolyol aliina ighe: “Mako. Yau taug tanel!”

¹⁰ Tauvene tighasoni tigha: “Wai, mindai ta matam poia gha ughita nugh?”

¹¹ I iyol alinazi ighe: “Neer tau eeza Yesu na, i ikep taan tomania nazuuva, ve imusu ila matag, ve isaav payau ighe: ‘Ula yaa naliu Siloam, ve umin matam.’ Tauvene nataghon saveen tooni ve nala namin matag, ve rekia mon matag poia gha naghita nugh.”

¹² Tauvene tighasoni muul tigha: “Neer tawe, tauu sindei?”

I isaav pazi ighe: “Ii, yau nakankaan pani.”

Zeran tutuunja tipaloon neer tau Yesu igharaat maata na

* 9:6: Mk 7:33

¹³ Ra tigham ñeer tana gha tila to zeran tutuunja siriv. ¹⁴ Pasaa, saawe tau Yesu igharaat maata, ene umbom patabuyaaj to Maaron. ¹⁵ Tauvene zeran tutuunja tawe anazi tighason ñeer tana tigha: “Saa gabua ivot payo, ta matam poia ne?”

I isaav pazi ighe: “Ñeer tau eeza Yesu na, ikep taan tomania ñazuuva, ve imusu ila matag, ra nala namini. Tauta aazne, matag poia gha naghita nugh.”

¹⁶ Zeran tutuunja tana tiloon saveen tooni tane, ve tamtamon toozi siriv tisaav tigha: “Iit tawatagh: Ñeer tawe, Maaron imbaajo ilam mako. Pasaa, i itaghon tutuun to umbom patabuyaaj mako.”

Ve siriv tigha: “Mako. I ighamgham gabua ñgeretazi katini tau itotoia ighe Maaron ileep tomania. Isaav ighe i tamtamon saghati, ene irau to igham tauvene ne mako.” Tauta tivalagh tauzi.

¹⁷ Tauvene tighason ñeer tau Yesu igharaat maata na muul tigha: “Laak, yo tau i igharaat matam na, ugham ñgar pani mindai?”

I iyol alinazi ighe: “I aat propet ee to Maaron.”

¹⁸ Onoon, ñeer tana, tiina ipoopa maata kumkuuma, ve Yesu igharaat maata. Eemon zeran tutuunja tana tighur ila mako. Tauvene tipoi taama yesuru tiina tilam paam, ¹⁹ ve tighason zi tigha: “Laak, natumim tau yamru aghe apoopa maata kumkuuma na, tauta ene? Mindai ta aazne maata poia gha ighita nugh?”

²⁰ Taama gha tiina tiyol alinazi tigha: “Ñeer tane, yeiru niwataghi. Ene natumai. Ve niwatagh nighe nipoopa maata kumkuuma. ²¹ Eemon eez tau aazne maata poia, ve sei tau igharaat maata,

ene nikankaan pani. I kukua mako. I olman. Aghasoni, o tauu ipaesì ghi payam.”

²² Yesuru tisaav tauvene pasaa, tiroi pa daaba to yes Yuda. Pasaa, yes timbu saveen wa tighe: Isaav ighe tamtamon eta isaav ghazonja ighe i ighur ila ighe Yesu i Mesia, ene aat tiziire pa lupuun toozi, ve ila ileep muuri. [Irau ilup ghi tomani zi pa sunuun ma uraat toozi siriv muul mako.] *

²³ Tauta taama gha tiina tisaav pazi tighe: “Ikukua mako. I olman. Taumim aghasoni.”

²⁴ Tauvene tipoi neer tana imuul ilam, ve tisaav ariiaan pani tighe: “Yo aat upait Maaron eeza ve usavia saveen onoon payei ila i maata. Yei niwatagh: Yesu tawe, i neer to ghamuun sosor!”

²⁵ Neer tana iyol alinjazi ighe: “I neer to ghamuun sosor, ma neer poia, yau nawatagh tana mako. Ve gabua eemon tau yau nawataghi, ene vene: Muun, matag ikumkum. Ve aazne, matag poia gha naghita nugh.”

²⁶ Tauvene tighasoni muul tighe: “I igham mindai payo? Igharaat matam mindai?”

²⁷ I iyol alinjazi ighe: “Wai, saveen ta nasavia payam wa. Eemon yam aloon ghau mako. Pu-ughu mindai ta anoknok ghasoniin ghau pa gabua tane? Yam paam aghe le amin zijeera?”

²⁸ Tiloon alinja tane le igham zi atezi yavyav kat. Tauvene tisik saveen veleghiin pani tighe: “Yo ta neer tawe zijeera. Eemon yei o nitaghon ngar to Mose. ²⁹ Pasaa, yei niwatagh: Mose ivotia saveen tau iloonja ila Maaron tauu aavo. Eemon neer tawe,

* **9:22:** Mbanj 26:9+

yei nikankaan pani ve uraat tooni. Ileep sindei ta ilam?”

³⁰ Neer tau muun maata ikumkuum na, iyol aliñazi ighe: “Wai, naloon saveen tsiam le narur pani! Neer tawe igharaat matag, ve yam aghe akankaan pani ve uraat tooni, ve aghason aghe ileep sindei ta ilam? ³¹ Iit tawatagh: Maaron iloon yes tau tighamgham sosor ne mako. I ilonloon yes tau matazi ingalngali, ve titaghon aliña.” *

³² Saawe tau Maaron ighur sambam ve taan tivot, ve ilam aazne, iit taloon neer eta vaaru pa ghara-toon tamtamon tau tiina ipoopa maata kumkuma ne mako. Aazne mon, ra gabua tauvene ivot.

³³ Isaav ighe Maaron imbaan neer tawe mako, i aat irau igham gabua ngereeta eta tauvene mako.” *

³⁴ Saveen tooni tane ireu lolozi kat. Tauvene tisik saveen pani tighe: “Ai, yo tane, saawe tau tinam ipoop ghom ve ilam aazne, ulepleep ilon ila ngar saghati loolo. Ve yo ughe upaghazonai ghei pa Maaron aliña?” Tisaav pani tauvene, ra tiziire ighau.

Zeran tau tighur ila to Krisi mako na, timin yes tau matazi kumkuma

³⁵ Yesu iloon neer tana vaaru tighe yes Yuda tiziire ighau. Tauvene ila indeenja, ve ighasoni ighe: “Mindai? Yo ughur ila to Tamtamon Naatu, ma mako?”

³⁶ Neer tana iyol aliña ighe: “Tiina, Tamtamon Naatu tawe sei? Upaghazonai ghau pani, leso naghur ila tooni.”

* **9:31:** Mbo 66:18; Yems 5:16+

* **9:33:** Mbo 146:8; Is 29:18,

35:5

³⁷ Yesu isaav pani ighe: “Yo ughita wa. Taug ta ituru tasavsaav ne.” *

³⁸ Neer tana isaav pa Yesu ighe: “Tiina, yau naghur ilat tsio.” Ra iput aaghe pani ve ipakuru.

³⁹ Yesu isaav muul ighe: “Yau nazilam taan to napaghazonai tamtamon, leso tighilaal tauzi. Yes tau tighilaal tigde matazi ikumkum ve tikankaan pa Maaron ngar tooni, ene pale matazi pakia ve tighazoni pani. Ve yes tau tinumeer sorok tigde matazi pakia ve tighazoni pa Maaron, ene pale matazi ikumkum ve ndoroom ikau zi le tisaghat kat.” *

⁴⁰ Yesu isavsaav, ve zeran tutuunja siriv tau tiyozyoos tigharauu na tiloonja. Tauvene tighasoni tigde: “Mindai, yo ughe yei tane matamai ikumkum?”

⁴¹ Yesu iyol alinjazi ighe: “Isaav ighe matamim ikumkum ve akankaan pa Maaron ngar tooni, ene aat lemim sosor mako. Eemon yam aghe matamim pakia ve aghazoni pa Maaron ngar tooni. Tauta aazne, alepleep tomania sosor tsiam soone.” *

10

Yesu injin olol atamana

¹ Yesu isaav muul ighe: “Onoon kat, yau nasaav payam: Tamtamon tau ighe ilonj ila olol to sipsip, i aat itaghon ataman, ve ilonj ila. Ve isaav ighe tamtamon eta itaghon ataman mako, ve imalaan pa olol gha ilonj ila, ene i umbuunja ve neer tau ighe ivaghamunia sipsip. ² Eemon neer tau itaghon

* **9:37:** Yo 4:26 * **9:39:** Mt 13:11+; Yo 3:19 * **9:41:** Yo 15:22+

olol atamana, ve ilonj ila, i nginiinj tauu to sipsip. ³ Tauvene nginiinj to olol atamana pale ikaak ataman pani, ve i ilonj ila. Yes sipsip tooni tighilaal aliinja. Tauvene i ipoipoi enaena ezazi, ve igherev zi tivot tila. ⁴ Isaav ighe iyauur zi tisov tivot tila muuri, i aat imuun pazi, ve tikeet taghoni gha yesna tilaagh tila. Pasaa, tighilaal aliinja. ⁵ Eemon isaav ighe neer ite paam ipoi zi, ene irau titaghoni mako. Pale tighau pani. Pasaa, tighilaal aliinja mako.”

⁶ Yesu isavia saveenj palelaan tane pazi, eemon yes tau tilonloonj saveenj tooni na tighilaal puughu mako.

⁷ Tauvene isaav pazi muul ighe: “Onoon kat, yau nasaav payam. Olol atamana tau sipsip tivotvot ve tilonlonj pani, ene yau taug. ⁸ Tamtamon tisov tau timuun payau ve tilam na, yes umbuuna, ve zeran tau tivaghamunia sipsip. *

Eemon sipsip tilonj alinjazi mako. ⁹ Yau taug ta olol atamana. Tauvene isaav ighe tamtamon eta injarui ghau ilam ve ilonj ila olol loolo, ene yau aat naghama mulini gha ileep poia. Ve i aat ivotvot ve ilonlonj, leso ighama le aninj popoia. *

¹⁰ Neer to umbuun, i ilam to ivaghamunia sipsip mon. I iyumyum zi, ireureu zi, ve iravrav zi timatmaat. Eemon yau nalam to naghama sipsip tsiau tileep poia le poia kat.

Yesu, i nginiinj poia to sipsip

* **10:8:** Tamtamon tau Yesu isavi zi na, ene daaba sasaghati siriv to yes Yuda tau tinjin poghania sipsip to Maaron mako, ve matazi ingal tauzi mon. Ughita Ezek. 34:1-23. * **10:9:** Yo 14:6; Ep 2:18; Hib 10:19

11 “Yau taug ta nginiin poia to sipsip. Pasaa, nginiin poia, i aat ipul tauu gha imaas pa sipsip tooni. *

12-13 Eemon tamtamon tau ingin sipsip to tamtamon ite, i nginiin tauu to sipsip mako. Ighamgham uraat pa le atuya mon. Tauvene i pale ighur loolo pa sipsip geeg mako. Pasaa, i sipsip taama mako. Isaav ighe ighita ngavuun sagsag eta ilam, i pale ipul sipsip tileep, ve ighau. Tauvene ngavuun sagsag pale ighan zi, ve ireu zi gha timbiriis.

14-15 “Yau taug ta nginiin poia to sipsip. Yenja sipsip tsiau nivawataghi ghei imin yeiru Taman Maaron nivawataghi ghei. Ve yau aat napul taug gha namaat pa sipsip tsiau. Leso naghham mulin zi gha tileep poi. *

16 Eemon yau leg sipsip siriv paam. † Yes to olol tane mako. Yau leg uraat to nayau zi tilam titaghon ghau paam. Yes pale tiloon alinag, ve yesja sipsip tsiau siriv tivalupu zi timin lupuun eemon, ve lezi nginiin eemon. *

17 “Taman Maaron loolo igheen tsiau kat. Pasaa, yau pale napul taug gha namaat. Leso naburig pa mateegh ve naleep matag yaryaare muul. *

18 Tamtamon eta to taan irau irav ghau namaat sorok ne mako. Nayoki taug, o irav ghau namaat. Pasaa, yau tapirig irau to nayoki taug gha namaat,

* **10:11:** Mbo 23:1; Ezek 34:8+; Yo 15:13; Hib 13:20; Syg 7:17

* **10:14-15:** Mt 11:27; 2Tim 2:19; 1Pe 2:25; 1Yo 3:16 † **10:16:**

Sipsip siriv paam tau Yesu isavia na, ene yes to nugh nugh tau murei pale tighur ila tooni. *

* **10:16:** Yo 11:51+; Mbanj 10:34; Ep 2:11+ * **10:17:** Pil 2:8+

ve tapirig irau to naburig matag iyaryaar muul, itaghon saveen tau Taman isavia payau na.”

¹⁹ Yes Yuda tiloon saveen tooni tane, le tivavalaghi zi muul. ²⁰ Tauta toozi katini tigde: “Neer tane, taloon saveen tooni pasaa? I avuvu saghati izeeva, tauta ngar tooni ivaghamgham!” *

²¹ Eemon tamtamon siriv tigde: “Neer tau avuvu saghati izeeva, ene irau isavia saveen tauvene mako. Ve aghita. Avuvu saghati eta irau igharaat tamtamon maata kumkuuma gha ighita nugh? Mako.” *

Yes Yuda tighur koi pa Yesu, ve tigde tiravu pa maet

²² Tilepleep le saawe to lupuun tiina ite to yes Yuda ivot. Lupuun tawe to matazi ingal saawe tau tigharaat mulin Rumei Tiina, ve tighuru imin Maaron le. Saawe tana, ene saawe to nugh yauna. † ²³ Yesu ilaghlaagh ila ruum to lepoogh tau Solomon irao ila Rumei Tiina ziige na loolo, ²⁴ ve

* **10:20:** Yo 8:48, 52 * **10:21:** Yo 9:32+ † **10:22:** Lupuun tane, eeza ‘Hanuka.’ Ivotvot pa Desemba, igharau saawe to Krismas. Yes Yuda titun kandol ve lam katini, ve tilup zi pa sunuun irau mbon liim ve tol. Saawe tana, tileep toman tintinizi. Lupuun tane, puughu tauvene. Muun, kinik saghati ee to yes Grika ingin taan to Yudea, eeza Antiokus Epipanes. I izuari ghi ighe le igham Yuda tisov tipul ghuruun ila toozi, ve itaghon yes Grika ngar toozi. Tauvene ighur patanani naol pazi, ve igham ngar siriv to ivaghamunia Rumei Tiina paam. Eemon yes Yuda tiparav ariiaan le tiliivo. Murei ra, tigharaat mulin Rumei Tiina. Saawe tana, yes timbool pa ngoreen to oliv. Rigmon ta igheen. Eemon Maaron igham gabua ngereeta, ve ngoreen toozi rigmon tawe igham lam toozi ighan irau mbon liim ve tol. Tauvene lupuun tane, eeza ite ene: ‘Lupuun to ghazonja’.

daaba siriv to yes Yuda tilam tilivuti, ve tisaav pani tighe: “Yei nikaria sanjaniin ghom wa. Pale neez o uvotia taum? Isaav ighe onoon yo Mesia, na usaav ghazonja payei lak!”

²⁵⁻²⁶ Yesu iyol alinjazi ighe: “Yau nasaav payam wa. Eemon yam aghur ila saveen tsiau mako. Uraat naol tau naghhamgham zi ila Taman eeza, ene ipariaan saveen tsiau. Eemon yam sipsip tsiau mako, tauta aghur ilam tsiau mako. *

²⁷ Sipsip tsiau, ene yes tau tilonloon alinjag. Yau nawatagh zi tisov, ve yes titaghon ghau. ²⁸ Yau naghham lezi lepoogh poia tau iseenga taghon taghon gha ila. Tauvene yes irau timaat gha tilalez ne mako. Pale tileep le alok. Ve tamtamon eta irau isan zi ila nimag mako. *

²⁹ Pasaa, Taman tau ighur zi timin leg na, tapiri iliiv gabua naol isov. Tauvene tamtamon eta irau isan zi ila i niima ne mako. ³⁰ Yau ve Taman, yeiru eemon.” *

³¹ Yes Yuda tiloon saveen tooni ziiri tane, ve tiburig tigham maet, ve tighe tiravu imaet pataghaan. *

³² Tauvene Yesu ighason zi ighe: “Yau naghham uraat popoia naol ila matamim itaghon ngar to Taman. Saa uraat isosor, ta aghe arav ghau pa maet?”

³³ Yes tiyol aliina tighe: “Yei nighe nirav ghom umaat pa uraat popoia tau ughamgham zi na mako. Nighe nirav ghom umaat pasaa, yo tamtamon sorok to taan. Eemon upakur taum ughe

* **10:25-26:** Yo 5:36, 8:47, 14:11; 1Yo 4:6 * **10:28:** Yo 6:39; Ro 8:38+; 2Tes 3:3 * **10:30:** Yo 1:1, 17:11, 21+ * **10:31:** Yo 8:59

yamru Maaron raratemim. Tauvene yo uvelegh Maaron ve uvaghamunia eeza.” *

³⁴⁻³⁵ Yesu isaav pazi muul ighe: “Yam awatagh mako? Saveen ziiri ee tau igheen ila tutuun tsiam na, isaav tauvene: Maaron isaav pa daaba siriv ighe: ‘Yau nasaav payam: Yam zimaronna.’ Daaba tawe, yes tamtamon to taan. Eemon Maaron aliina tau inarui zi na, iwaat zi ighe yes zimaronna. Ve iit tawatagh: Maaron aliina tau tiboode na, irau toraanni mako. Igheen tauvene.” *

³⁶ Eemon yau, Taman Maaron ighur ghau to nagham uraat patabuyaana tane, ve imbaana ghau nazilam taan. Tauvene isaav ighe nawaat taug naghe yau Maaron Naatu, puughu mindai ta yam aghe yau navelegh Maaron ve navaghamunia eeza? ³⁷ Isaav ighe yau naghamgham Taman uraat tooni mako, na aghur ilam tsiau sov. ³⁸ Eemon isaav ighe naghamgham uraat tooni, na yam aat aghur ilam tsiau. Tauvene isaav ighe saveen tsiau igham gham aghur ila mako, na aghita uraat tau naghamgham zi ne, ve aghur ila. Leso ngar tsiam ivot ve aghilaal aghe: Yau naleep ila to Taman, ve Taman ileep ilam tsiau.” *

³⁹ Yes Yuda tiloon saveen tooni tane, ve titoova to tikisi muul. Eemon i ighau pazi gha ila.

⁴⁰ Ilaagh ila imbut yaa Yordan, ve ila ivot muul nugh tau muun Yoan ileep pani ve irurughuuz tamtamon na. Yesu ilepleep ta sewe, ⁴¹ ve eval tiina tila tivot tooni, ve tivasavo zi tigde: “Yoan igham gabua ngereeta eta mako. Eemon saveen

* **10:33:** Wkp 24:16; Mt 26:65; Yo 5:18 * **10:34-35:** Mbo 82:6;

Mt 5:18 * **10:38:** Yo 14:10, 17:21

isov tau i isavia pa neer tane, ene onoon mon.”
⁴² Tauvene tamtamon katini tau tilepleep ta sewe na, tighur ila tooni.

11

Mateegh to Lasarus

¹⁻² Neer ee to nugh Betania, moroghoon tiina ighamu. Eeza Lasarus. Livnja ru tilepleep izi nugh tawe paam. Ee eeza Marta, ve ite eeza Maria. Maria tane, ta muun ilin ngoreen vaazi poia izala Yesu aaghe, ve imusu pa daaba raua. *

³ Saawe tau Lasarus imoroon, livnja ru tawe timbaan ila pa Yesu tighe: “Tiina, livumai Lasarus tau yo lolom igheen tooni kat na, i imoroon le isaghat kat.”

⁴ Yesu iloon paesiin tane, ve isaav ighe: “Moroghoon tawe ivot to igham Lasarus imaat ne mako. Pale imin eez to Maaron itotoi tapiri ve poia tooni. Leso tamtamon tipait eeza ve tipait Naatu eeza paam.” *

⁵ Yesu loolo igheen to Marta gha tazliva Maria ve livuzi Lasarus kat. ⁶ Eemon saawe tau iloon tighe Lasarus imoroon, i rekia iburig ipul nugh tau ilepleep pani ne mako. Ilepleep ta sewe le mbon ru paam. ⁷ Ra isaav pa mbiwa tooni ighe: “Aiyo, iit aat taburig ve tamuul tala pa Yudea.”

⁸ Mbiwa tooni tiloon saveen tane, ve tisaav pani tighe: “Wai, Padudunjaan, ngarig mon ta yes Yuda to nugh tawe tighe tirav ghom pa maet gha umaat. Mindai ta aazne ughe umuul ula ta sewe?” *

* **11:1-2:** Lu 10:38+ * **11:4:** Yo 9:3 * **11:8:** Yo 8:59, 10:31

⁹ Yesu iyol aliŋazi ighe: “Mindai, tamtamon eta irau ipasulai saawe to mataaz ila imin tuuku? Mako. Mbonoozo ila le ravrav izi, ene mataaz dodoli to tagham uraat. *

Tamtamon eta ighe ilaagh pa mataaz, ene irau itut aaghe ve itap ne mako. Pasaa, i ighita ghazona to taan. *

¹⁰ Eemon isaav ighe tamtamon eta ilaagh ila ndo-room loolo, ene pale itut aaghe ve itap. Pasaa, ghazona igheen ila tooni mako.” *

¹¹ Yesu isaav tauvene, ve iseen aliŋa ighe: “Etaan ite Lasarus igheen wa. Tauvene yau aat nala, leso navaaŋo iburig muul.” ¹² Mbiwa tooni tisaav pani tigde: “Tiina, isaav ighe Lasarus igheen poi, ene i aat maata pakia wa.”

¹³ Yesu iwatagh: Lasarus imaata wa. Eemon isavia saveen palelaan, tauta mbiwa tooni tikankan pa saveen tooni puughu, ve tigde pa Lasarus igheen mon. ¹⁴⁻¹⁵ Tauta Yesu isaav ghazona pazi ighe: “Lazarus igheen mako. I imaata kusia. Eemon poia pa naleep tomania mako ve imaata. Pasaa, gabua tau pale ivot ne, ene aat iuul gham ve ipariaan ghuruun ila tsiam. Aiyo, aburig gha tala taghita.”

¹⁶ Tomas, tau eeza ite Didimus na, isaav pa zeetŋa ighe: “Tambaanŋo. Aburig gha itinŋa tala.

* **11:9:** Yesu saveen tooni, puughu tauvene: I iroi pa koinŋa tau tigde tiravu imaata na mako. Pasaa, i iwatagh: Saawe tau Maaron ighuru pani to igham uraat izi taan, tamtamon eta irau ipasulaini mako. Tauvene koinŋa irau tigham gabua eta pani rekia mako. I pale ileep ve ipasovuur uraat tooni isov. Ve saawe to ndoroom ighe ivot, mako koinŋa tiravu imaata. * **11:9:** Yo 9:4+ * **11:10:** Yo 12:35

Leso iit tasov tamaat raraate tomania tiina toit.”

Yesu imin puughu pa burigiin to yes mateegha, ve lepoogh to taleep mataan yaryaare

¹⁷ Yesu tomania mbiwa tooni tilaagh tila tigharau nugh Betania, ve tiloon tighe Lasarus paata igheen ila naal loolo irau mbon paan wa.

¹⁸ Nugh Betania, ene igheen igharau nugh tiina Yerusalem, irau kilomita tol ma vene. ¹⁹ Tauvene yes Yuda katini tilam tileep tomania Marta gha Maria pa moniin toozi tawe lesu tirav atezi.

²⁰ Saawe tau Marta iloon tighe Yesu ilam igharau nugh Betania, i iburig ila ighe ighita. Eemon Maria, i ileep izi ruum. ²¹ Marta ila ivot to Yesu, ve isaav pani ighe: “O Tiina, imin ta yo uleep ta sene, kanan livug irau imaata mako. ²² Eemon yau nawatagh: Aazne, saa gabua tau ighe yo ughason Maaron pani, i aat iloon ghom ve igham payo.”

²³ Yesu isaav pani ighe: “Livum aat iburig muul.”

²⁴ Marta iyol aliina ighe: “Yau nawatagh. Saawe to Mbon Murei, Maaron ighe ipaburigin yes mateegha, ene pale livug iburig paam.” *

²⁵ Yesu isaav pani muul ighe: “Uloon. Yau taug ta namin puughu pa burigiin to yes mateegha ve lepoogh to tamtamon tileep matazi yaryaare. Tamtamon eta ighe ighur ilam tsiau ve imaata, ene mateegh irau ikisi mako. I aat iburig muul, ve ileep maata yaryaare le alok.” *

²⁶ Tamtamon tisov tau tighur ilam tsiau ve tigham lepoogh poia ila to Maaron, yes irau timaat gha

* **11:24:** Dan 12:2; Yo 5:28+ * **11:25:** Yo 1:4+; 1Kor 15:51+; 1Tes 4:16+

tilalez ne mako. Pale tileep matazi yaryaare le alok. Yo ughur ila saveen tsiau tane, ma mako?”

²⁷ Marta iyol aliina ighe: “Vee. Tiina, yau naghur ila kat naghe yo Mesia. Yo Maaron Naatu. I imbaan ghom tauta uzilam taan.” *

Yesu itan pa Lasarus

²⁸ Marta yesuru Yesu tisavsaav le isov, ra Marta imuul ila ruum, ve ikamuun pa tazliva Maria ighe: “Uloon. Padudunaan toit ilam ivot wa. Ve i ighe yo ula ughita.” ²⁹ Maria iloon saveen tane, ve rekia mon iburig ila ighe ighita Yesu. ³⁰ Saawe tana, Yesu ilam peria nughei soone. Ilepleep izi nugh ziige tau papazoge Marta ila ivot tooni na. ³¹ Yuda siriv tau yesna Maria tilepleep ila ruum loolo pa ravuun aate na, tighita Maria iburig, ipul ruum, ve ila. Tauvene tighe pa i ila pa naal to Lasarus, leso itan pani. Tauvene titaghoni tila.

³² Maria ila ivot to Yesu, ve iput aaghe izi Yesu aaghe puughu, ve isaav pani ighe: “O Tiina, imin ta yo ulepleep ta sene, kanan livug irau imaat mako.” ³³ Yesu ighita Maria yesna Yuda siriv tau tilam tomania na titantan, le loolo ipatanan kat. ³⁴ I ighason zi ighe: “Yam aghur Lasarus paata izi sindei?”

Yes tiyol aliina tighe: “Tiina, ulam tala ve ughita.”

³⁵ Ra Yesu itan.

³⁶ Tauvene Yuda siriv tau yesna tiyozyoos na, tisaav tighe: “Aghita. I aat loolo igheen to Lasarus kat.”

* **11:27:** Mt 16:16; Yo 6:69

³⁷ Eemon tamtamon toozi siriv tivasavo zi tigde: “Neer tane igharaat neer ee tau maata kumkuuma. Mindai ta iuul Lasarus mako? Imin ta iuule, kananj Lasarus irau imaat mako.”

Yesu ipaburigin Lasarus pa mateegh

³⁸ Yesu loolo ipatanjan kat pa mateegh to Lasarus. Tauvene ilaagh narui maet puura tau Lasarus paata igheen pani na. Puura tawe, tigharaata imin naal, ve tigham maet tiina ee gha tipoon aavo. ³⁹ Yesu ila ivot naal aavo, ve isaav pazi ighe: “Apatambulia maet ighau pa naal aavo.”

Mateegh tana liivu Marta isaav pa Yesu ighe: “Wai Tiina, vene mako. Yei nighuru igheen ta sewe mbonj paan wa. Takaako, pale vaazi.”

⁴⁰ Yesu isaav pani ighe: “Marta, matam ingal saveenj tsiau, ma mako? Yau nasaav payo wa. Isaav ighe ughur ila, ene aat ughita Maaron itotoi tapiri ve poia tooni ivot ighazonj.” ⁴¹ Tauvene tipatambulia maet tiina ighau pa puura aavo, ve Yesu maata izala pa sambam, ve isaav ighe: “O Tamañ, yau lolog poia payo pasaa, sunjuunj tsiau, yo uloonja wa. ⁴² Yau nawatagh: Saawe isov, yo ulonloonj sunjuunj tsiau. Eemon yau nagham ngar pa eval tiina tau yenja niyozyoos ne, naghe le yes tighur ila tigde: Yo taum umbaanj ghau ta nalam. Tauta nasavia saveenj tane.”

⁴³ I isavia saveenj tane le isov, ra iboob aliinja tiina ighe: “Lasarus, uvot ulam!” *

⁴⁴ Reikia mon Lasarus iburig, ve ivot. Eemon uuli siriv siriv tau tikaukauu pani na, ene ighenaar ila

* **11:43:** Lu 7:14; Yo 5:25

tiini soone. Tauvene i ivot ila muuri, ra Yesu isaav pazi ighe: “Apool uuli siriv siriv tawe ighau pa naagho, niima, ve aaghe. Leso ilaagh poi.”

Daaba to yes Yuda tiil eez pa ravuun Yesu imaat (Mt 26:1-5; Mk 14:1-2; Lu 22:1-2)

⁴⁵ Yes Yuda tau tilam tileep tomania Maria na, tighita kaut ngereeta tau Yesu ighamu, le katini tighur ila tooni. ⁴⁶ Eemon tamtamon toozi siriv tila to zeran tutuunja, ve tipaesia gabua tana vaaru pazi. ⁴⁷ Tauvene daaba to watoonrau ve zeran tutuunja tila tilup zi tomania pooza siriv to yes Yuda, ve tivasavo zi tighe: “Neer tawe ighamgham gabua ngeretazi katini tau itotoi ighe Maaron ileep tomania pa uraat tooni. Pale tagham mindai?” ⁴⁸ Isaav ighe tapuli ve ighamgham tauvene, ene pale tamtamon tisov tighur ila tooni ve titaghoni. Mako yes Roma tilam, ve tireu mbirisai Rumei Tiina toit patabuyaaj, ve tivarewai ghiit paam le irau tauun tangin nugh toit muul mako.”

⁴⁹ Tilup zi gha tilepleep, ve tamtamon toozi ee, eeza Kaiapas, i daaba to watoonrau pa ndaman tana, iburig ve isaav pazi ighe: “Yam tane, lemim ngar mako! ⁵⁰ Agham mindai ta avaghamgham tauvene? Yam aghilaal mako? Poia pa njeer eemon igham eval tiina niazi ve imaat pazi. Mako pale iit Yuda tasov tamataar.” ⁵¹ Saveen tane, Kaiapas isavia sorok itaghon tauu ngar tooni mako. Maaron igham pooz pani, tauta isavia. Pasaa, ndaman tana, Kaiapas, i daaba to watoonrau. Tauta ivotia Maaron aliinja pazi, ve ighe Yesu pale igham yes Yuda niazi ve imaat pazi. ⁵² Eemon Yesu imaat pa yes Yuda mon mako. I imaat pa Maaron

natŋa tisov tau tileep irau nugh nugh. Leso ilup zi timin lupuun eemon. *

⁵³ Tauvene saawe tana ve ila, daaba to yes Yuda tiliil eez pa ravuun Yesu imaat. ⁵⁴ Tauta i ilaagh ghazoonŋa ila yes Yuda matazi muul mako. I ipul zi, ve ila pa nugh Epraim tau igheen nugh nginaanŋa ziige, ve yesŋa mbiwa tooni tilepleep izi ta sewe.

⁵⁵ Tilepleep le saawe to lupuun tiina to yes Yuda tau tiwaato tighe Pasova na, igharau. Tauvene eval tiina to nugh nugh tizazala pa Yerusalem. Tighe tigharaat tauzi gha tŋgalaanŋa ila Maaron maata le isov, o lupuun tiina tana ivot.

⁵⁶ Tamtamon tilepleep ila sirsiir to Rumei Tiina loolo, ve matazi inesnes Yesu, ve tivasavo zi tighe: “Ou, agham ŋgar mindai? Neer tawe pale ilam pa lupuun tiina tane, ma mako?” ⁵⁷ Saawe tana, yes daaba to watoonrau tomania zeran tutuunŋa tighur saveenŋa ariiaanŋa pa eval tiina tauvene: Isaav ighe tamtamon eta iwatagh nugh tau Yesu ileep pani na, rekia mon ve ipaes pazi. Leso tila tikisi.

12

*Maria ilin ngoreen vaazi poia izala Yesu aaghe
(Mt 26:6-13; Mk 14:3-9)*

¹ Mbonŋ liim ve ee ighengheen soone, mako uraat to Pasova ivot. Saawe tana, Yesu ila ivot Lazarus nugh tooni Betania. Lasarus, i neer tau imaat ve Yesu ipaburigini pa mateegh na. *

² Yesu tomania mbiwa tooni tileep izi ta sewe, ve zeetŋa siriv to nugh tawe tigham ghanghaniinŋa pani. Marta igham uraat pa gharatoonŋa lezi aniinŋa,

* **11:52:** Yo 10:16, 17:20+; 1Yo 2:2 * **12:1:** Yo 11:1+

ve Lasarus ileep tomani zi pa ghanghaniin tana paam. ³ Tauvene yes tighanghan, ve Maria igham ngoreen tau vaazi poia ve atuya tiina kat ilam, ve ilin izala Yesu aaghe. Ra imusu pa daaba raua. Ngoreen tawe vaazi ivot le ikau ruum loolo. *

⁴ Yudas Iskariot, i mbiwa to Yesu tau murei ighuru ila koina nimazi. I ighita gabua tana, ve iburig gha isaav ighe: ⁵ “Wai, livaa ne, ivaghamunia ngoreen tane sorok pasaa! Imin ta tagholia, kanan tagham maet tiina pani, irau 300 denari ma vene. Leso tagham pa yes mbolaanja.” ⁶ Saveen tane, i maata ingal yes mbolaanja, ve isavia mako. Isaav sorok. Pasaa, i neer to umbuun. I ingin lugluug toozi, ve saawe siriv niima kaukauia pa maet toozi siriv.

⁷ Yudas isaav tauvene, ve Yesu isaav pani ighe: “Uyau avom pani pasaa? Upuli. I ikis ngoreen tane to igharaat ghau pa saawe to namaat ve titavi ghau. ⁸ Yes mbolaanja pale yamja alepleep irau saawe. Ve yau irau itina talepleep irau saawe mako.”

Yes daaba to watoonrau timbu saveen tighe tirav Lasarus imaat paam

⁹ Eval tiina tiloon tighe Yesu ilepleep izi nugh Betania, ve timeke tila tighe tighita. Ve tighe tighita Lasarus paam. Pasaa, tiloon vaaru tighe i imaat ve Yesu ipaburigini pa mateegh. ¹⁰ Tauvene yes daaba to watoonrau tilup zi, ve timbu saveen tighe tirav Lasarus imaat paam. ¹¹ Pasaa, Yuda

* **12:3:** Maria ilin ngoreen tiina irau kilo sirivu. Tigharaat ngoreen tawe pa gabua ee tau atuya tiina kat, eeza nard.

katini tau tiloon Lasarus vaaru na, timoghaagh pa daaba toozi tawe, ve tighur ila to Yesu. *

Yesu izala pa Yerusalem

(Mt 21:1-11; Mk 11:1-11; Lu 19:28-40)

¹² Mbon le nughizau, ra eval tiina tau tila tileep izi Yerusalem pa lupuun tiina to Pasova na, tiloon Yesu vaaru tighe i ighe izala pa Yerusalem.

¹³ Tauvene tigham gabua imin tuum raua, ve tivot tila tighe tighita. Saawe tau tighita, tipaburigin bobaan ve tiyoor eeza tighe:

“Hosana! †

Tapakur Maaron toit!

Poia to Maaron aat izaa to neer tane. Pasaa, i ilam pa Neer Tiina eeza, ve i kinik to iit Israela!” *

¹⁴ Yesu igham donki paaghu ee ve mboole izala, ve ilam itaghon Maaron aliina ziiri ee tau tibooode na. Isaav tauvene:

¹⁵ “Yam tamtamon to nugh Zion, ‡

aroi sov.

Aghita kinik tsiam tau ilat na!

I mboole izala donki paaghu ee, ve ilat.” *

¹⁶ Saawe tau gabua tana ivot, mbiwa to Yesu tighi-laal puughu mako. Eemon murei, saawe tau i

* **12:11:** Yo 11:45 † **12:13:** ‘Hosana’, ene saveen ziiri ee to yes Israela. Puughu tauvene: ‘ugham mulin’ o ‘uul.’ Isaav ighe tiyoor neer eta tau eeza tiina, ene tibobai saveen tane to tipakuru.

* **12:13:** Mbo 118:25+ ‡ **12:15:** Zion (o Sion, o Zaion), ene Yerusalem eeza ite. Zion, ene nugh mbua ee to Yerusalem tau tirau Rumei Tiina to Maaron izala. * **12:15:** Is 62:11; Sek 9:9

imaat gha iburig muul, ve eeza tiina ivot ighazoon, ra matazi ingal gabua tana, ve tighilaal tighe Maaron aliina tana, tiboode iza to Yesu.

¹⁷⁻¹⁸ Puughu tau eval tiina timeke tila tighita Yesu, ene vene: Saawe tau i ipoi Lasarus gha iburig ve ilaagh ivot pa naal, eval tiina tileep ve tighita gabua ngereeta tana. Tauvene murei, tila ve tipaesia gabua tana vaaru pa tamtamon, ve tipariaan Yesu saveen tooni tighe gabua tana itotoia ighe Maaron ileep tomania pa uraat tooni.

¹⁹ Zeran tutuuna siriv tighita eval tiina tawe yesu Yesu tilaghlaagh ve tiyoryoor eeza, tauta tivasavo zi tighe: “Oyai, aghita! Iit tarao mako. Tamtamon to taan tisov tila titaghoni wa!”

Grika siriv tighe tighita Yesu

²⁰ Yes tau tizala Yerusalem to tisu pa Maaron ila lupuun tiina to Pasova na, Grika siriv tileep ila lolozi paam. §

²¹ Yes tila to Pilip, (i neer to nugh Betsaida tau igheen Galilaia na), ve tisaav pani tighe: “Olman, yei nighe le nighita Yesu.” ²² Tauvene Pilip ila ipaesia alinazi pa Andreas, mako yesuru tila tipaes pa Yesu.

²³ Yesu isaav pazi ighe: “Saawe to Tamtamon Naatu itotoi eeza tiina tomania tapiri ve poia tooni ivot ighazoon, tauta ivot wa. *

²⁴ Onoon kat, yau nasaav payam: Isaav ighe wit uuve izila taan loolo mako, ene irau paaghu eta

§ **12:20:** Grika tau saveen ziiri tane isavi zi na, yes aat tighur ila to Maaron, ve titaghon tutuun siriv to yes Yuda ve tiluplup tomani zi pa suuun. Eemon tirav warozi mako. Tauvene yes timin Yuda duduun mako. * **12:23:** Yo 1:14, 13:31, 17:1

izaa pani mako. Ene pale uuv tana mon igheen. Eemon isaav ighe uuv tana izila taan loolo ve uuli imbuuz gha ilale, ene aat paaghu tooni izaa, ve ighur anoonja katini. * *

²⁵ Isaav ighe tamtamon eta loolo pa ghamuun lepoogh poia to taan mon, ene pale tauu ilale. Ve isaav ighe tamtamon eta ighur muuri pa taan lepoogha, i aat igham lepoogh poia ila to Maaron taghon taghon gha ila. *

²⁶ Isaav ighe tamtamon eta ibees payau, i aat itaghon ghau. Tamtamon tauvene, pale ileep tomani ghau izi nugh tau yau pale nala naleep pani. Ve tamtamon tau ighe ibesbees payau, ene aat Tamanj ipakuru.” *

Yesu isavia mateegh tooni

²⁷ Yesu isaav muul ighe: “Aazne, lolog ipatanjan kat ve naghham njar naol. Pasaa, saawe tsiau to mateegh, ene ilam igharau wa. Pale nasaav mindai? Pale naghe: ‘Tamanj, upasali ghau pa patanjani tiina tau ighe ivot payau ne?’ Mako, irau

* **12:24:** Yoan ibood saveenj tauvene: “Wit uuve aat itap ve izila taan loolo gha imaas, o paaghu tooni ivot, ve ighur anoonja katini. Ighe mako, ene pale uuv tana mon ighengheen.” Eemon iit tawatagh: Saawe tau tavazogh wit uuve izila taan loolo, uuve dodoli imaas mako. Uuli mon ta imbuuz gha ilale. Ve anoonja, tauta wit paaghu ivot pani. Yesu ighita ighe mateegh tooni, ene imin wit uuli tau imbuuz gha ilale, ve wit paaghu ivot. Pasaa, i pale imaas gha tighuru ila taan loolo. Eemon mateegh tooni pale imin eez to Maaron igham gabua paaghu ivot. Ve iit Kristen tauvene paam. Iit aat tarei tauun pa Krisi ve uraat tooni, o ghuruun ila toit ighur anoonja popoia tivot. * **12:24:** 1Kor 15:36 * **12:25:** Mt 10:39, 16:25 * **12:26:** Yo 14:3, 17:24; 1Tes 4:17

nasaav tauvene mako. Pa puughu tane ta yau nazilam taan. *

²⁸ O Tamañ, gabua tau pale ivot payau ne, yau naghe imin eez to utotoi tapirim ve poia tsio ivot ighazoon pa tamtamon. Leso tipait ezam.”

Yesu isavia saveen tane, ra saveen sambam ve izilam ighes: “Yau natotoi tapirig tomania poia tsiau pa tamtamon wa. Ve yau pale natotoia pazi muul. Leso tighilaal ghau tighes yau ezag tiina.” *

²⁹ Eval tiina tau yesja Yesu tilepleep na, tiloon saveen tane, ve siriv tighes pa lalaav luutu. Ve siriv tighes: “Mako. Anela eta aat isavsaav pani.”

³⁰ Eemon Yesu isaav pazi ighes: “Saveen tau luutu izilam ne, ene to iuul ghau mako. Ene to iuul gham. *

³¹ Aazne, tazaa pa saawe to Maaron ipaghazonjai ngar saghati to tamtamon to taan ivot ighazoon, ve ighur atuya pazi, ve iziir daaba tau inginjin taan ne ighau. *

³² Aazne, yau naleep izi taan. Eemon murei, saawe tau tiit ghau nazaa, ene pale nagherv tamtamon tisov tilam tsiau.” *

³³ Yesu isavia saveen tane to ivotia eez tau pale imaat pani.

³⁴ Eval tiina tiloon saveen tooni tana, ve tiyol aliina tighes: “Maaron aliina tau tiboo de na, saveen ziiri ee isaav tauvene: Mesia pale ileep maata yaryaare le alok. Ighes tauvene, puughu mindai

* **12:27:** Mt 26:39+ * **12:28:** Mt 3:17 * **12:30:** Yo 11:42

* **12:31:** Yo 16:11; Kol 2:15; Syg 12:9, 20:2+ * **12:32:** Yo 3:14, 8:28; Ro 5:18

ta yo ughe Tamtamon Naatu aat tiiti iza? Tamtamon Naatu tau yo usavia na, ene sei?” *

³⁵ Yesu isaav pazi muul ighe: “Aazne, ghazonja to Maaron ileep tomani gham. Eemon malau mako pale ipul gham. Tauvene saawe tau ghazonja tooni ilepleep tomani gham, alaghlaagh ila ghazonja tawe loolo. Leso ndoroom ikau gham sov. Tamtamon tau ighe ilaghlaagh ila ndoroom loolo, ene aat ikankaan pa nugh sindei tau pale ila pani.
*

³⁶ Tauvene saawe tau ghazonja to Maaron ilepleep tomani gham soone, aghur ila tooni pataghaan. Leso amin tamtamon to ghazonja.”

Yesu isavia saveen tane le isov, ra ipul zi, ve ila iyoon pazi.

Yuda katini tighur ila to Yesu mako

³⁷ Onoon, Yesu igham gabua ngeretazi naol ila yes Yuda matazi, lesa itotoi tauu pazi ve tighilaal tigha Maaron ileep tomania pa uraat tooni. Eemon tighur ila tooni mako. *

³⁸ Ngar tau tighamu na, ene itaghaon saveen tau muun propet Isaia iboode na. Isaav tauvene:

“O Maaron, yei nivotia alinam pazi, ve sei ighur ila?

Ve saawe tau utotoi tapirim ivot ighazon pazi, sei ighilaalo? Mako.” *

³⁹ Yes irau tighur ila to Yesu mako. Ve Isaia ipaghazonai ghiit pa puughu. Pasaa, saveen ziiri ite tau i iboode na isaav ighe:

* **12:34:** Mbo 89:36, 110:4; Is 9:6+; Dan 7:14 * **12:35:** Yo 8:12, 11:9+; Ep 5:8; 1Yo 1:7 * **12:37:** Yo 1:11 * **12:38:** Is 53:1; Ro 10:16

40 “Maaron tauu igham ngar toozi iyaryaan kat ve ipoon matazi.

Tauta matazi irau tighita gabua tau Maaron ighamu ne mako, ve lezi ghilaloon ila lolozi mako. Ve lolozi imuul payau mako, ve tiyok payau to nagharaat mulin zi mako.” *

41 Isaia isavia saveen tane pasaa, muun i ighita Yesu tapiri ve poia tooni tomania uraat tiina tau murei pale ighamu na ila tandaghiin. Tauta ighilaal ighe Yesu eeza tiina. *

42 Onoon, pooza katini to yes Yuda tighur ila to Yesu. Eemon tivotia ghuruun ila toozi ivot ighazon mako. Pasaa, tiroi tigher zeran tutuun pale tiziir zi pa lupuun toozi, ve irau yesa tilup zi pa sunuun muul mako. 43 Zeran tawe, lolozi pa pakuruun to tamtamon iliiv pakuruun tau ilam pa Maaron na. *

Yesu iparwai saveen tooni pa eval tiina

44 Murei ra, Yesu iburig ve isaav aliina tiina ighe: “Tamtamon tau ighe ighur ilam tsiau, ene ighur ilam tsiau mon mako. I ighur ila to Tama tau imbaan ghau nalam ne paam. *

45 Tamtamon tau ighe ighit ghau, ene ighita Tama tau imbaan ghau nalam ne paam. 46 Yau nazilam taan to namin ghazon pa tamtamon. Leso tamtamon tisov tau tighur ilam tsiau ne, tileep ila ndoroom loolo muul sov. *

47 “Isaav ighe tamtamon eta iloon saveen tsiau, ve itaghooni mako, ene irau nagabiiza ve naghur

* 12:40: Is 6:9+; Mt 13:15 * 12:41: Is 6:9, 52:13–53:12

* 12:43: Yo 5:44; Ga 1:10 * 12:44: Mt 10:40 * 12:46: Yo 1:4, 8:12

atuya pani mako. Pasaa, yau nazilam taan to nagabiiz tamtamon to taan ve naghur atuya pazi ne mako. Nalam to naghram mulin zi. *

⁴⁸ Ve aloon! Tamtamon tisor tau tizor ghau, ve lolozi pa ghamuun saveen tsiau mako na, saawe to Mbon Murei, Maaron pale igabiiz zi itaghon saveen tau yau nasavia na, ve ighur atuya pazi. *

⁴⁹ Pasaa, yau nasavia saveen eta itaghon taug ngar tsiau mako. Yau nataghon Taman tau imbaan ghau nalam ne ngar tooni. Saveen tau i tauu ighuru payau to nasavia, tauta nasasavia payam.

⁵⁰ Ve yau nawatagh: Tutuun tooni tau i ighuru ilam tsiau to navotia, ene imin eez to tamtamon tigham lepoogh poia ila tooni taghon taghon gha ila. Tauvene saveen tau yau nasasavia ne, ene nataghon dudunai saveen tau Taman isavia payau.”

13

Yesu imin mbiwa tooni aghezi

¹ Saawe to lupuun tiina to Pasova igharau ighe ivot. Yesu iwatagh: Saawe tooni to ipul taan ve imuul izala pa Taama, ene ilam igharau wa. Muun ve ilam, i ighur loolo kat pa tamtamon tooni tau tileep izi taan. Ngar tawe, i itaghone ila ila le saawe to mateegh tooni, ra itotoia ivot ighazon kat. *

² Ravrav izi, ve Yesu tomania mbiwa tooni tilup zi pa ghanghaniin. Yudas tau Simon Iskariot naatu, Neer Saghati ipazaagh loolo wa, leso ighur Yesu ila koina nimazi. ³ Yesu iwatagh: Taama

* **12:47:** Yo 3:17, 4:42; 1Yo 4:14 * **12:48:** Lo 18:19; Yo 3:18

* **13:1:** 1Yo 3:16

Maaron ighur gabua naol isov ila niima wa. Ve i ileep tooni ta izilam, ve pale imuul izala tooni. *

⁴ Tauvene Yesu ipul ghaniin, ve iburig gha izuzuum nonoghiin tooni to ngooan izi, ve igham uuli ee to musuun gha ipoosa ila ngaali. ⁵ Ra ilin yaa izila oon, ve ipaburigin uraat to miniin mbiwa tooni aghezi. Saawe tau iminmin aghezi, imus zi paam pa uuli tau ipoosa ila ngaali na. *

⁶ Iminmin aghezi ila ila le ivot to Simon Petrus. Ra Simon isaav pani ighe: “Wai Tiina, yo uغه umin agheg?” *

⁷ Yesu iyol aliina ighe: “Ngar tau yau naghamu ne, aazne yo ughilaal puughu mako. Eemon murei pale ughazoon pani.”

⁸ Petrus izoora ighe: “Aazne ve murei paam, yo irau umin agheg mako. Mako le mako kat!”

Yesu isaav pani muul ighe: “Isaav ighe namin aghem mako, yo tamtamon tsiau mako.”

⁹ Simon Petrus iyol aliina ighe: “O Tiina, ighe tauvene, na umin agheg mon sov. Umin nimag ve dabag paam!”

¹⁰ Yesu isaav pani ighe: “Tamtamon tau ighe iririu wa, i le puughu eta to iririu muul mako. Pasaa, tiini isov ingalaan wa. Tauvene i aat imin

* **13:3:** Mt 28:18; Yo 3:35; 1Kor 15:27 * **13:5:** Mt 20:28; Lu

22:27; Pil 2:7+ * **13:6:** Uraat to miniin tamtamon aghezi, ene uraat to yes besoonja sorok. Ngar tau Yesu ighamu, ene itotoi ghiit pa ngar to tatatan tauun ezaan, ve tabees pa tamtamon ve tauul zi. Ve itotoi ghiit ighe mateegh tooni pale ireu sosor to tamtamon, ve igham zi tingalaan ila Maaron maata.

aaghe mon. Yam tane angalaan wa. Eemon yam asov mako.” † *

¹¹ Yesu isavia saveen tane pasaa, neer tau ighe ighuru ila koina nimazi na, i iwataghi wa. Tauta isaav pazi ighe: “Yam asov angalaan mako.”

¹² Yesu imin mbiwa tooni aghezi le isov, ra inonogh ghi pa nonoghiina tooni muul, ve imuul ila pa niia gha mboole izi, ve ighason zi ighe: “Laak, ngar tau ngarig naghham payam na, awatagh puughu, ma mako? ¹³ Yam awatwaat ghau aghe yau padudunaan ve tiina tsiam. Saveen tsiam tana, ene onoon. Isaav ighe awaat ghau tauvene, ene iduduun. *

¹⁴ Aghita. Yau Tiina ve padudunaan tsiam. Eemon namin aghemim. Isaav ighe yau naghham tauvene, na yam paam aat agham ngar raraate mon pa taumim. *

¹⁵ Yau naghham ngar tane imin totoyaan payam. Leso aghita, ve ataghon ngar raraate imin yau naghham payam na. *

¹⁶ Yau nasaav payam. Onoon kat, besoonja eta irau iliiv tiina tooni ne mako. Ve mbanjoona eta irau iliiv neer tau imbaano ne mako. *

¹⁷ Ngar tau naghhamu ne, yam aghazoon pa puughu

† **13:10:** Onoon, isaav ighe taghur ila to Krisi, mateegh tooni ireu sosor toit, ve igham ghiit tangalaan ila Maaron maata, imin neer tau iririu poi le tiini isov ingalaan. Eemon, saawe siriv, iit Kristen tatap ve tagham sosor. Isaav ighe tatap, iit irau tavotia sosor toit pa Krisi ve taghasoni to ireua pait. Leso tangalaan ila i maata muul. Ughita 1Yo 1:8-9. * **13:10:** Yo 15:3; 1Yo 1:8-9 * **13:13:** 1Kor 8:6; Pil 2:11; Kol 2:6 * **13:14:** Lu 22:25+; Ga 5:13; 1Pe 5:5 * **13:15:** Pil 2:5; 1Pe 2:21; 1Yo 2:6 * **13:16:** Mt 10:24+

wa. Isaav ighe ataghoni, ene aat tintinmim, ve poia to Maaron iza a tsiam. *

¹⁸ “Saveen tane, yau nasavia iza a to yam asov mako. Yam tau nasiigh gham amin leg na, yau nawatagh katin gham. Tamtamon tsiam ee, i ipaak ghau mako. Pasaa, Maaron aliin a tau ti-boode na, aat ighur anoon a. Saveen tauvene:

‘Etag ite tau yeiru lupuun tsiei eemon ve niluplup ghei pa ghanghaniin, tauta imin koiag.’ *

¹⁹ Aghita. Gabua tane ivot soone, ve aazne yau navotia payam pataghaan. Leso saawe tau ivot, yam aghur ila aghe YAU TAUG TA NALEPLEEP. ‡
*

²⁰ Onoon kat yau nasaav payam: Yes tau yau nambaan zi tila pa uraat na, isaav ighe tamtamon eta igham zi toman loolo poia, ene i igham ghau. Ve isaav ighe tamtamon eta igham ghau, ene i igham Taman tau imbaan ghau nalam ne paam.”
*

*Yesu ivotia ngar tau Yudas pale ighamu
(Mt 26:20-25; Mk 14:17-21; Lu 22:21-23)*

²¹ Yesu isavia saveen tane le isov, ra loolo ipatanan kat, ve isaav ghazoon a ighe: “Onoon

* **13:17:** Mt 7:24; Yems 1:25 * **13:18:** Mbo 41:9 ‡ **13:19:** Maaron eeza Yoova puughu, ene YAU NALEPLEEP. Ughita Maaron Igham Mulin Tamtamon Tooni (o Eksodus) 3:14. Tauvene ngara katini tighe Yesu saveen tooni puughu, ene tauvene: “Yam aghur ila aghe yau Yoova.” Ve ngara siriv tighe saveen tooni puughu, ene vene: “Yam aghur ila aghe yau Mesia.” * **13:19:** Igham 3:14; Yo 8:58 * **13:20:** Mt 10:40; Lu 10:16

kat, yau nasaav payam: Tamtamon tsiam ee pale ighur ghau nala koiagna nimazi.”

²² Mbiwa tooni tiloon saveen tane, ve tivamarari zi. Pasaa, tikankaan: Yesu isavia saveen tane inarui sei? ²³ Saawe tana, mbiwa tau Yesu loolo ighen tooni kat na, ileep Yesu ziige. *

²⁴ Tauvene Simon Petrus daaba katia pani ighen ighason Yesu pa saveen tau i isavia na. Inarui sei?

²⁵ Tauta mbiwa tawe indaleel pa Yesu, ve ighasoni ighen: “Tiina, yo usaav pa sei?”

²⁶ Yesu iyol aliina ighen: “Yau aat nazeev mberet tane ila sur, ve nagham pa tamtamon toit ee. Neer tane ta yau nasavia.” Ra igham mberet sirivu, izeeva ila sur,§

ve igham pa Yudas tau Simon Iskariot naatu na.

²⁷ Yudas ipaes mberet tawe, ra Sadan izeeva. Tauvene Yesu isaav pani ighen: “Ngar tau yo ughen ughamu, na ughamu rekia mon.”

²⁸ Yes tau tilup zi pa ghanghaniin na, toozi eta ighilaal puughu tau Yesu isavia saveen tane pa Yudas ne mako. ²⁹ Siriv tigham ngar tighen Yesu imbaano pa gholiin gabua siriv pa lupuun tiina tana, ma imbaano ila pa rein gabua siriv pa yes mbolaana. Pasaa, Yudas ingin lugluug toozi.

³⁰ Tauvene Yudas igham mberet sirivu tana, ve rekia mon iburig gha ivot ila pa muuri. Saawe tana, ndoroom izi wa.

Tutuun paaghu to Krisi

* **13:23:** Yo 19:26, 20:2, 21:7 § **13:26:** Saawe tau yes Yuda tighan aniin to Pasova, tigharaat sur pa vaen suuru, tomania vaen anoona, ai fik ve ai det anonazi, ve gabua papaizi siriv. Leso tizeev mberet toozi izila.

³¹⁻³² Yudas ipul zi, ve ivot ila muuri, ra Yesu isaav pazi ighe: “Saawe to Tamtamon Naatu ito-toi eeza tiina tomania tapiri ve poia tooni ivot ighazon, tauta ivot wa. Ve gabua tau pale ivot pani, ene aat ipaghazonai Taama Maaron eeza tiina tomania tapiri ve poia tooni paam. Leso tamtamon tipakur Taama Maaron eeza. Ve Taama Maaron tauvene paam. Pale ipaghazonai Naatu eeza tiina tomania tapiri ve poia tooni. Leso tamtamon tipakur Naatu eeza. Malau mako, ve gabua tane pale ivot. *

³³ “Aa geegeu tsiau, yau aat naleep tomani gham rig mon, ve aghit ghau muul mako. Pale napul gham ve ail naghog. Tauvene saveen tau muun nasavia pa yes Yuda, tauta aazne nasavia payam paam. Saveen tauvene: ‘Nugh tau yau nache nala pani ne, yam irau ala pani mako.’ ³⁴ Aloon. Aazne, yau nasavia tutuun paaghu payam tauvene: Lolomim pa taumim ve avaghamu poghani gham. Lolomim pa taumim kat, imin yau lolog igheen tsiam. *

³⁵ Isaav ighe lolomim pa taumim kat, ene aat tamtamon tighilaal gham tige yam zinjerag duduun.”

*Yesu isaav ighe Petrus pale ipaisamuna
(Mt 26:31-35; Mk 14:27-31; Lu 22:31-34)*

³⁶ Yesu isavia saveen tane le isov, ra Petrus ighasoni ighe: “Tiina, nugh sindei ta yo ughe ula pani?”

* **13:31-32:** Yo 12:23, 17:5; 2Kor 4:6
15:12+; 1Pe 1:22; 1Yo 3:11

* **13:34:** Mk 12:31; Yo

Yesu iyol aliŋa ighe: “Nugh tau yau nala pani ne, yo irau utaghon ghau ulam ta aazne ne mako. Eemon murei, yo pale utaghon ghau ulam.” *

³⁷ Tauvene Petrus ighasoni muul ighe: “Tiina, puughu mindai ta yo ughe yau irau nataghon ghom ta aazne mako? Yau irau napul taug ve namaat payo.”

³⁸ Yesu isaav pani muul ighe: “Aliŋam tana, pale onoon wa? Yo irau upul taum ve umaat payau? Yau nasaav payo: Onoon kat, mboŋ aazne, yo pale upaisamun ezag pai tol le isov, o tatareek itaŋ.”

14

Yesu pale ila igharaat nugh to lepoogh pa tamta-mon tooni

¹ Yesu isaav pa mbiwa tooni ighe: “Lolomim ipataŋan ve agham ŋgar naol sov. Aghur ila to Maaron, ve aghur ilam tsiau paam.” *

²⁻³ Tamaŋ ruum tooni, le sooso katini to lepoogh. Imin ta le sooso katini mako, ene irau nasaav payam tauvene mako. Yau aat namuun nala, ve nagharaat lemim niamim to lepoogh izi ta sewe. Ighe nagharaata le isov, ene aat namuul nalam, ve naghamaŋ gham alam tsiau. Leso aleep tomani ghau izi nugh tau yau naleep pani na.” *

⁴ Eez to nugh tau yau naghe nala pani, ene yam awataghi wa.”

Yesu imin eez pait to tala pa Taama Maaron

* **13:36:** Yo 21:18+; 2Pe 1:14 * **14:1:** Mbo 42:5; Mt 6:25; Pil 4:6+; 1Pe 5:7 * **14:2-3:** Yo 12:26, 17:24; 2Kor 5:1+; Hib 11:16; 1Tes 4:16+

⁵ Tomas iloon saveen tane, ve isaav pa Yesu ighe: “Tiina, nugh tau yo ughe ula pani na, yei nikankaan pani. Pale niwatagh eez to nila pa nugh tana mindai?”

⁶ Yesu iyol aliinja ighe: “Yau taug ta eez. Yau nato-toi katin gham pa Maaron ve saveen tooni onoon, ve namin puughu pa lepoogh maata yaryaare. Eez eemon to tamtamon titaghoni ve tila pa Taman, ene yau. Ite paam mako.” *

⁷ Isaav ighe awatagh katin ghau, ene pale awatagh Taman paam. Aazne ve ila, yam awataghi. Pasaa, aghita wa.” * *

⁸ Tauvene Pilip isaav pani ighe: “Tiina, utotoi Tamam tana payei, o nighazon pan ve atemai izi.”

⁹ Yesu iyol aliinja ighe: “Wai Pilip, itinja takaria lepoogh wa! Ve yo ughilaal ghau soone? Tamtamon tau ighe ighit ghau, ene ighita Taman. Mindai ta ughason ghau ughe natotoi Taman payam?” *

¹⁰ Yo ughur ila soone? Yau naleep ila to Taman, ve i ileep ilam tsiau. Saveen tau yau nasasavia payam ne, ene nataghon taug ngar tsiau mako. Taman tau ileep ilam tsiau, tauta ighamgham uraat tooni ila yau nimag.” *

¹¹ Yau naleep ila to Taman, ve i ileep ilam tsiau. Saveen tane, yam irau aghur ila. Ve isaav ighe aghur ila mako, na agham ngar pa uraat tintiina

* **14:6:** Yo 10:9; Yo 11:25; Ep 2:18; Hib 10:19+ * **14:7:** Eez ite to tator saveen ziiri tane ene vene: “Imin ta yam awatagh katin ghau, kanaj awatagh Taman paam. Eemon aazne ve ila, yam aat awataghi. Pasaa, aghita wa.” * **14:7:** Yo 8:19 * **14:9:** Yo 12:45; Kol 1:15; Hib 1:3 * **14:10:** Yo 7:16+

tau yau naghām zi tivot na. Leso ipalot gham, ve aghur ilam tsiau. *

¹² “Onoon kat, yau nasaav payam: Isaav ighe tamtamon eta ighur ilam tsiau, i pale igham uraat tintiina imin yau naghāmgham zi ne. Ve i pale igham uraat tintiina siriv paam le tiliiv uraat tsiau. Pasaa, paita napul taan, ve namuul nala pa Tamanj. *

¹³ Saa gabua tau ighe yam aghason Tamanj Maaron pani ila yau ezag, ene yau pale naghāmu ivot. Leso napaghazonjai Tamanj eeza tiina tomania tapiri ve poia tooni. *

¹⁴ Tauvene saa gabua tau ighe yam aghason pani ila yau ezag, ene yau pale naghāmu.

Yesu pale imbaan Avuvu Patabuyaanj izilam

¹⁵ “Isaav ighe lolomim igheen tsiau, yam pale matamim kisin tutuunj tsiau, ve ataghon zi. *

¹⁶ Ve yau pale naghason Tamanj to imbaan Palotiinja ite paam izilam payam. Leso ileep tomani gham irau saawe, ve ipalot gham.

¹⁷ Palotiinja tawe, ene Maaron Avuvu. I pale ipaghazonjai gham pa saveen onoon to Maaron. Pasaa, i isasavia saveen onoon. Tamtamon tau titaghon taan ngara na, yes irau tighāmu mako. Pasaa, tighita mako, ve tiwataghi mako. Eemon yam o, awataghi. Pasaa, i ilepleep tomani gham. Ve murei, i pale ileep tunja ila lolomim. *

* **14:11:** Yo 5:36, 10:38 * **14:12:** Mk 16:16+; Mbanj 2:43, 5:12

* **14:13:** Mt 7:7; Yo 15:7; 1Yo 3:22, 5:14 * **14:15:** Yo 15:10+; 1Yo 2:3, 5:3 * **14:17:** Yo 15:26, 16:7, 13+; Mbanj 2:4; 1Kor 2:14

18 “Yau irau napul gham aleep sorok imin yes paroonja ne mako. Yau aat namuul nalam tsiam.
*

19 Yes tau titaghon taan ngara na, malau mako pale tighit ghau muul mako. Eemon yam pale aghit ghau. Pasaa, yau aat naburig muul ve naleep matag yaryaare. Tauvene yam paam pale agham lepoogh poia ilam tsiau, ve aleep matamim yaryaare. 20 Saawe tana, yam pale aghilaal aghe yau naleep ila to Taman, ve yam aleep ilam tsiau, ve yau naleep ilat tsiam. Iit tasov tavalupu ghiit tamin eemon. *

21 Tamtamon tau ighe maata kisin tutuun tsiau ve itaghon zi, ene i ta loolo igheen tsiau. Tamtamon tauvene, Taman pale loolo igheen tooni, ve yau paam lolog igheen tooni, ve natotoi taug pani.” *

22 Yesu isaav tauvene, ve Yudas ite (tau Yudas Iskariot mako na) ighasoni ighe: “Tiina, mindai ta yo ughe utotoi taum pa yei mon, ve eval tiina to taan mako?”

23 Yesu iyol ghasoniin tooni tauvene: “Isaav ighe tamtamon eta loolo igheen tsiau, ene pale maata kisin saveen tsiau ve itaghoni. Tamtamon tauvene, Taman pale loolo igheen tooni, ve yeiru Taman nila tooni, ve nighamu imin niamai to lepoogh. *

24 Eemon tamtamon tau ighe loolo igheen tsiau mako, ene pale loolo iveegh pa saveen tsiau ve itaghoni mako. Saveen tau yam alonloorja ne, ene

* 14:18: Mt 28:20; Mbanj 2:4 * 14:20: Yo 17:21 * 14:21: 1Yo 2:5, 5:3 * 14:23: 1Kor 3:16; 2Kor 6:16; Syg 3:20

taug saveen tsiâu mako. Ene Taman tau imbaan ghau nalam ne saveen tooni.

²⁵ “Aazne, itiña talepleep, ve nasavia saveen tane payam. ²⁶ Eemon malau mako pale napul gham ve Taman imbaan lemim Palotiinja ite paam izilam ila yau ezag. Ene Avuvu Patabuyaan. I pale igham naghog, ve ipaghazonjai ngar tsiam pa gabua naol isov, ve ipei ngar tsiam pa saveen naol isov tau yau nasavia payam na. Leso matamim kisini.*

²⁷ “Yau aat napul gham tane. Tauvene naghe napul luuma tsiâu igheen tomani gham, lesa aleep poia toman lolomim luuma. Lepoogh poia tau naghe nagham payam, ene raraate imin lep-oogh poia tau tamtamon to taan tighamghamu ne mako. Tauvene lolomim bubu sov, ve aroi sov.*

²⁸ Yam aloon ghau naghe: ‘Yau pale napul gham, ve nala. Eemon murei, yau pale namuul nalam payam.’ Isaav ighe lolomim igheen tsiâu, ene aat tintinmim. Pasaa, Taman tau iliiv ghau ne, yau naghe namuul nala tooni. ²⁹ Saveen isov tane, yau nasavia payam pataghaan. Leso saawe tau anoonja tooni ivot, yam aat matamim ingal alinag, ve aghur ilam tsiâu. ³⁰ Saveen tau nasasavia payam ne, irau naseenga ila malau geeg mako. Pasaa, nginiinj to taan tane ilam igharau wa. I tapiri irau ghau mako, ve yau naleep ila i saamba mako. ³¹ Eemon yau aat nataghon dudunjai saveen isov tau Taman ighuru payau na, ve patanani ivot payau itaghon ngar tooni. Leso tamtamon to taan tiwatagh tighe yau lolog igheen to Taman.

* **14:26:** Lu 24:49; Yo 16:13; 1Yo 2:27 * **14:27:** Yo 16:33; Ro 5:1; Pil 4:7; Kol 3:15

Aiyo, aburig gha tapul nugh tane, ve tala.” *

15

Yesu, i vaen tauu

¹ Yesu isaav muul ighe: “Yau taug ta vaen tauu.
*

Ve Taman, i nginiin to uum vaen. *

² Yes tau tipaak tunja ilam tsiau, ene timin ai vaen booga. Booga tisov tau anonazi ivot poi mako, ene Taman ipook zi tizi. Ve booga tisov tau anonazi ivot poi, ene i irav motmotin matazi ve ighagharaat zi, leso tingalaan ve anonazi katini ivot. *

³ Yam tane, saveen tau nasavia payam, tauta igharaat gham gha angalaan wa. *

⁴ Yam irau apaak tunja ilam tsiau, ve yau napaak tunja ilat tsiam. Agham ngar pa vaen booga. Isaav ighe igheen soghan pa ai livuugha, pale ai booga tawe ighur anoonja? Mako. Ai booga irau ipaak tunja ila ai livuugha, o anoonja ivot. Ve yam tauvene paam. Isaav ighe apaak tunja ilam tsiau mako, ene irau ghuruun ila tsiam ighur anoonja poia eta mako. *

* **14:31:** Yo 10:18; Pil 2:8; Hib 5:8 * **15:1:** Muun, Maaron igham yes israela timbuzja tila tivot taan to yes Kanaana, ve igham taan toozi pazi, leso tileep ta sewe, ve tigham ngar popoia ivot itaghon ngar tooni, imin ai vaen ighur anoonja popoia. Eemon saawe naol, yes Israela titaghon ngar poia mako. Ve Yesu, i igham ngar poia ivot itaghon Maaron ngar tooni. Tauta iwaat tauu ighe i ai vaen tauu.

* **15:1:** Mbo 80:8+; Is 5:1+ * **15:2:** Ro 11:17+ * **15:3:** Yo 13:10, 17:17; Ep 5:26 * **15:4:** Kol 1:22, 2:7

⁵ “Yau taug ta ai vaen, ve yam amin vaen booga. Tamtamon tau ighe ipaak tunja ilam tsiau, ve yau napaak tunja ila tooni, ene aat ghuruun ila tooni ighur anoonja popoia katini. Ve isaav ighe aleep soghan payau, ene irau agham gabua poia eta ivot mako. *

⁶ Tamtamon tau ighe ipaak ilam tsiau mako, ene i imin ai booga gorgori tau timbutu, ve tisiki ila. Ai booga tauvene, ene pale murei tindou zi, ve tisik zi tisov tizala yav ighan zi. *

⁷ Isaav ighe apaak tunja ilam tsiau, ve saveen tsiau igheen tunja ila lolomim ve ataghoni, yam irau aghason Taman Maaron pa saa gabua tau lolomim pani na, ve i pale igham gabua tana ivot payam. *

⁸ Isaav ighe ghuruun ila tsiam ighur anoonja popoia katini, ene aat apaghazonai Taman Maaron eeza tiina tomania tapiri ve poia tooni, ve atotoi taumim paam aghe yam ziñerag. *

⁹ Yau lolog igheen tsiam raraate imin Taman loolo igheen tsiau. Matamim kisin ngar tsiau tane, ve aleep ilon ila irau saawe. ¹⁰ Isaav ighe matamim kisin tutuun tsiau ve ataghon zi, ene aat awatagh kat aghe yau lolog igheen tsiam, ve aleep ilon ila ngar tsiau tane irau saawe. Imin yau. Matag kisin Taman tutuun tooni ta naol ne, ve nataghon zi. Tauta nawatagh naghe i loolo igheen tsiau, ve naleep ilon ila ngar tooni tana irau saawe. *

¹¹ “Yau nasavia saveen tane payam, leso

* **15:5:** Ga 5:22+; Pil 2:13; Kol 1:10 * **15:6:** Mt 3:10, 7:19

* **15:7:** Yo 14:13; 1Yo 5:14+ * **15:8:** Mt 5:16 * **15:10:** 1Yo

lolomim poia le poia kat imin yau. ¹² Tutuun tau nasavia payam, ene vene: Lolomim pa taumim ve avaghamu poghani gham, raraate imin yau lolog payam ve naghham poghani gham. *

¹³ Isaav ighe tamtamon eta ibaad patanani pa zeetna, ve ipul tauu gha imaat pazi, ene itotoia ighe i loolo igheen toozi kat. Ngar tauvene iliiv eez naol isov to loloon pa zetaanja. *

¹⁴ Isaav ighe ataghon tutuun tau naghuru payam, yam pale atotoi taumim aghe yau zetagna duduun ta yam. *

¹⁵ Besoonja eta iwatagh katin uraat tau tiina tooni ighamghamu ne mako. Eemon yam o, awataghi. Pasaa, saveen isov tau naloona ila to Taman, tauta navotia payam gha aloona wa. Tauvene yau irau nawaat gham besoonja muul mako. Yau aat nawaat gham naghe zetagna duduun. *

¹⁶ Yam taumim lolomim ve alam ataghon ghau mako. Yau taug ta nasiigh gham amin leg, ve naghur gham to ala ve agham uraat. Uraat tau aghamu, ene pale ighur anoonja, ve anoonja tana igheen taghon gha ila. Isaav ighe yam agham tauvene, ve aghason Taman pa gabua eta ila yau ezag, i pale iloon gham ve igham payam. *

¹⁷ Tauvene yau naghur tutuun payam tauvene: Lolomim pa taumim ve avaghamu poghani gham.” *

Yes tau titaghon taan ngara na pale tighur koi pa

* **15:12:** Yo 13:34+; 1Yo 4:7+

* **15:13:** Ro 5:7+; Ep 5:2; 1Yo 3:16

* **15:14:** Mt 12:50; Yo 14:23

* **15:15:** Gnp 18:17; Mban 20:27;

Yems 2:23 * **15:16:** Mt 28:19; Yo 14:13; Ep 1:4 * **15:17:** Yo 13:34

Yesu ziŋeera

¹⁸ Yesu isaav pazi muul ighe: “Isaav ighe yes tau titaghon taan ngara na tighur koi payam, na matamim ingal: Ngar toozi tawe, paaghu mako. Yes tighur koi payau muun, tauta tighur koi payam paam. *

¹⁹ Zeran tau titaghon ngar to taan na, imin ta yam apaak zi pa ngar toozi ve yamŋa raratemim, kanan lolozi payam. Eemon mako. Pasaa, yau napas gham avot ila sosozi gha amin leg, ve apul ngar to taan wa. Tauta yes tighurghur koi payam. *

²⁰ Matamim ingal saveen tau yau nasavia payam: Besoonja eta irau iliiv tiina tooni ne mako. Tau-vene yes tau tighur patanani payau, ene pale tighur patanani payam paam. Ve yes tau matazi kisin saveen tsiau ve titaghoni, ene pale matazi kisin saveen tsiam paam ve titaghoni. *

²¹ Taman tau imbaan ghau nalam ne, yes tau titaghon ngar to taan tiwataghi rigta mako. Tauta yes pale tigham ngar tauvene payam. Pasaa, yam amin leg, ve ataghon ghau. *

²² Imin ta yau nalam ve navotia saveen pazi mako, kanan lezi sosor ila Maaron maata mako. Eemon yau nalam gha navotia saveen tooni pazi wa. Tauta, aazne, yes irau tipasakaal tauzi muul mako. Sosor toozi igheen ghazonja wa. *

²³ Tamtamon tau ighe ighur koi payau, ene ighur koi pa Taman paam. ²⁴ Uraat tintiina tau naghham

* **15:18:** Mt 10:22; 1Yo 3:13 * **15:19:** Lu 6:22; Yo 17:14; 1Yo 4:5

* **15:20:** Mt 10:24+; 2Tim 3:12; 1Yo 4:6 * **15:21:** Mt 5:10+; Yo

16:2+ * **15:22:** Lu 12:47; Yo 9:41; Ro 1:20; Yems 4:17

zi ila matazi na, ñeer eta igham uraat tauvene pai eta soone. Imin ta naghham uraat tane mako, kanan lezi sosor ila Maaron maata mako. Eemon yau naghham uraat tane ve tighita wa. Ve tighurghur koi pa yeiru Taman soone. Tauta lezi sosor ila Maaron maata. ²⁵ Ngar tau tigham payau na, ene itaghon saveen tau muun tiboode ila tu-tuun toozi. Isaav ighe:

‘Yes tighur koi payau sorok.’ ” *

²⁶ Yesu iseen saveen tooni muul ighe: “Palotiina tau pale ilam, i ileep to Taman. Ve yau aat nam-baano izilam payam. I Maaron tauu Avuvu tau ivot ila tooni ve izilam. I isasavia saveen onoon mon. Ve i pale ipariaan saveen tsiau, leso tamta-mon tighur ilam tsiau. *

²⁷ Ve yam paam pale apariaan saveen tsiau. Pasaa, saawe tau napaburigin uraat tsiau le ilam aazne, yam alepleep tomani ghau. *

16

¹ “Saveen isov tane, yau nasavia payam to ipalot gham. Leso atap ve apul ghuruun ila tsiam sov.

² Aloon. Murei, yes Yuda pale tiziir gham pa rumei toozi, ve irau yamna alup gham pa sunuun muul mako. Saawe tana, isaav ighe toozi eta irav tsiam eta imaati, i pale igham ngar ighe ibees poi pa Maaron. *

* **15:25:** Mbo 35:19, 69:4

* **15:26:** Lu 24:49; Yo 16:14; Mban

2:33 * **15:27:** Lu 24:48; Mban 1:8; 1Yo 1:1+ * **16:2:** Mt 24:9; Mban 26:9+

³ Tamtamon pale tigham ngar tana payam pasaa, tikankaan pa Taman Maaron, ve tikankaan payau paam. *

⁴ Saveen tane, yau nasavia payam pataghaan. Leso saawe tau patanani tana ivot payam, matamim ingal alinag tane, ve ayooz ariaan.

Yesu isavia uraat to Avuvu Patabuyaan

“Muun, yau nasavia saveen tane payam mako. Pasaa, taug nalepleep tomani gham. ⁵ Ve aazne, naghe napul gham, ve namuul nala pa Taman tau imbaan ghau nalam ne. Eemon tsiam eta ighason ghau pa nugh tau naghe nala pani ne mako. ⁶ Onoon, saveen tau nasavia payam ne, aat igham gham lolomim ipatanan kat. ⁷ Eemon yau nasaav payam: Onoon kat, isaav ighe napul gham ve nala, ene pale poia payam. Pa ighe napul gham mako, ene aat Maaron Avuvu irau izilam payam mako. Ve ighe nala, ene pale nambaan Palotiina tawe izilam payam, lesu iuul gham. *

⁸ Saawe tau ilam, i aat igham tamtamon to taan tighilaal sosor toozi ve ngar tau iduduun ila Maaron maata, ve tighilaal tighe murei pale Maaron igabiiz tamtamon ve ighur atuya pazi.

⁹ Sosor toozi, ene vene: Tighur ilam tsiau mako. *

¹⁰ Ve saawe tau yau namuul nala to Taman, ve aghit ghau muul mako, ene aat tamtamon tighilaal tighe yau nagham ngar duduun ila Maaron

* **16:3:** Yo 15:21; Ro 10:2; 1Tim 1:13 * **16:7:** Yo 14:16, 26, 15:26

* **16:9:** Yo 15:22

maata. * *

¹¹ Ve uraat to gabizoon ve ghuruun atuya pa tam-tamon, ene pale ivot. Pasaa, nginiin to yes tau titaghon taan ngara na, Maaron igabiiza ighe i isosor wa. Tauvene i isasaan mon pa saawe to Maaron ighur atuya pani. *

¹² “Yau leg saveen naol to nasavia payam. Eemon irau nasavia ta aazne mako. Pale ipatanan payam. ¹³ Eemon Maaron Avuvu, i ipaghazonai saveen onoon to Maaron puughu. Saawe tau ilam, i pale ipaduduun gham, leso aghazoon kat pa saveen isov tau onoon na. Pasaa, i irau isavia saveen eta itaghon tauu ngar tooni mako. Saa saveen tau iloon a ila to Taman, tauta i pale ivotia. Ve i pale ipaghazonai gham pa gabua siriv tau pale ivot murei. *

¹⁴ Saa ngar ma saveen tau i ighamu ilam tsiau, i pale ivotia payam. Leso aghazoon kat payau ve aghilaal ghau aghe ezag tiina pa tapirig ve poia tsiau. ¹⁵ Taman ngar tooni ve tapiri, tomania gabua tooni naol isov, ene igheen tsiau paam. Tauta nasaav payam naghe: ‘Saa ngar ma saveen tau Maaron Avuvu ighamu ilam tsiau, i pale ivotia payam.’ ” *

Mbiwa to Yesu pale lolozi ipatanan. Eemon murei pale lolozi poia muul

* **16:10:** Saawe tau Maaron ipaburigin Yesu pa mateegh, ve imuul izala pa nugh sambam, ene itotoi ghiit ighe Taama Maaron loolo poia pani, ve iyok pa uraat tooni. * **16:10:** Ro 1:4 * **16:11:** Yo 12:31 * **16:13:** Yo 14:26; 1Yo 2:27 * **16:15:** Mt 11:27; Yo 17:10

¹⁶ Yesu iseen saveen tooni muul ighe: “Malau mako pale ail naghog. Ve tala rig, mako aghit ghau muul.”

¹⁷ Tauvene mbiwa tooni siriv tivasavo zi tighe: “Wai, saveen tooni tane, puughu mindai? I isaav pait ighe, malau mako pale tail naagho. Ve tala rig, mako taghita muul. Ve isaav paam ighe i pale ila to Taama. ¹⁸ Aliiṇa ziiri rig tau ighe: ‘malau mako’, ene puughu mindai? Iit takankaan pa saveen tooni tane. I isavia saa?”

¹⁹ Yesu ighilaal ngar toozi ighe yes tighe tighasoni pa saveen tooni puughu. Tauvene isaav pazi ighe: “Mindai, aliṇag ziiri tau naghe: ‘Malau mako pale ail naghog, ve tala rig, mako aghit ghau muul,’ tane ta avaghasoni gham pani ne? ²⁰⁻²¹ Onoon kat, yau nasaav payam. Yam pale lolomim ipatanan kat ve agham tanjiz tiina. Ve yes tau titaghon taan ngara na, ene pale tintinizi. Eemon tala rig, mako lolomim ipatanan muul mako, ve anamim tintinmim imin livaa tau ipoop. Onoon, saawe to popaan, i iyamaan yavyavuun tiina. Eemon saawe tau ipoop tamtamon izi, i pale loolo poia kat pa naatu paaghu tana, ve loolo iveegh pa yavyavuun tau ighamu na.

²² “Yam tauvene paam. Aazne, lolomim ipatanan kat. Eemon yau aat nalam naghit gham muul. †
Saawe tana ighe ivot, yam pale lolomim poia le poia kat. Ve lolomim poia tana, tamtamon eta irau iwalaava payam mako. *

† **16:22:** Yesu aat isavia saveen tane inṇarui saawe to burigiin tooni.

* **16:22:** Lu 24:52; Yo 20:20; 1Pe 1:8

²³ Saawe tana ve ila, yam pale aghason ghau pa gabua eta puughu muul mako. Pasaa, ngar tsiam pale ighazonj. Onoon kat, yau nasaav payam: Isaav ighe aghason Tamanj pa gabua eta ila yau ezag, i aat igham payam. ²⁴ Muunj ve ilam aazne, yam aghason Maaron pa gabua eta ila yau ezag soone. Ve yau nasaav payam: Aghasoni, o igham payam. Leso lolomim poia le poia kat. *

Yesu itatan taan tapiri wa

²⁵ “Saveenj naol tane, yau nasavia payam ila saveenj palelaanj. Eemon saawe tsiau ighe ivot, ene yau irau nasavia saveenj eta payam ila saveenj palelaanj muul mako. Yau aat nasaav ghazonja, ve napaghazonjai gham pa Tamanj. ²⁶ Saawe tana, yam taumim pale aghur ghasoniinj tsiam injarui Tamanj ila yau ezag. Lemim puughu eta to naghham avomim, ve naghur ghasoniinj tsiam ila pani ne mako. ²⁷ Pasaa, Tamanj iwatagh: Yam lolomim igheen tsiau, ve aghur ilam tsiau aghe: Yau naleep tooni, ta nalam. Tauta loolo igheen tsiam, ve ighe igham poghani gham. ²⁸ Onoon kat, yau naleep to Tamanj, ta nazilam taan. Ve aazne, saawe to napul taan, ve namuul nazala tooni, ene ilam igharau wa.”

²⁹ Yesu isavia saveenj tane, ve mbiwa tooni ti-saav pani tighe: “Tiina, aazne yo usavsaav ila saveenj palelaanj muul mako. Usaav ghazonja kat payei. ³⁰ Tauvene yei nighilaal nighe yo uwatagh gabua naol isov. Pasaa, saawe tau tamtamon tighason ghom soone, ve yo uwatagh ghasoniinj

* **16:24:** Mt 7:7; Yo 15:11

toozi wa. Tauta nighur ilat tsio nighe yo uleep to Maaron, ta uzilam.”

³¹ Yesu iyol alinjazi ighe: “Onoon? Ngarig gha aghur ila? ³² Aloon, saawe tsiau ilam igharau wa. Ighe ivot tane. Tauvene tamtamon pale tinaan gham le asov aparmbiriis ala lemim lemim, ve apul ghau naleep. Eemon yau zigau naleep mako. Pasaa, Tamañ ilepleep tomani ghau. *

³³ Saveen tane, yau nasavia payam, lesa apaak tunja ilam tsiau, ve luuma tsiau igheen tomani gham. Onoon, saawe tau aleep izi taan, patanjani pale igham gham. Eemon aroi sov. Lolomim poia ve ayooz ariaañ! Pa taan tapiri, yau natatani wa.” *

17

Yesu isun ve ighason Taama Maaron to ipaghazonjani ighe i eeza tiina

¹ Yesu isavia saveen tane le isov, ra maata izala pa sambam, ve isun ighe: “O Tamañ, saawe tsiau, tauta ivot wa. Upaghazonjai tamtamon pa Natum, ve ugham zi tighilaal tapiri ve poia tooni. Lesa i ipaghazonjai zi payo, ve tighilaal ghom paam tige yo ezam tiina pa tapirim ve poia tsio. *

² Yo ughur tamtamon tisov tileep ila Natum saamba wa. Lesa yes tau yo ughur zi timin i le na, tisov tigham lepoogh poia ila tooni taghon taghon gha ila. *

* **16:32:** Mt 26:31, 56; Yo 8:29

* **16:33:** Yo 14:27; Ro 8:35+; 1Yo

4:4, 5:4

* **17:1:** Yo 12:23

* **17:2:** Dan 7:14; Mt 28:18; Yo 6:39

³ Yo mon ta Maaron tauu. Ve lepoogh poia tau tamtamon tighamu ilat tsio, ene ngara tauvene: Yes tiwatagh katin ghom, ve Natum Yesu Krisi tau umbaano izilam taan ne. Tamtamon tauvene, ene pale tileep poia ilat tsio taghon taghon gha ila. *

⁴ Uraat naol isov tau ughur zi ila nimag na, yau napasovuur zi tisov wa. Tauta napaghazonai ezam tiina tomania tapirim ve poia tsio izi taan. *

⁵ O Tamañ, muuñ geeg, saawe tau gabua eta ivot soone, yau naleep toman mbonarig ve ezag tiina ila naghom. Tauvene aazne, yau naghe ugham ghau namuul nalat tsio, ve naleep toman mbonarig ve ezag tiina imin muuñ. *

Yesu ighason Taama Maaron ighe injin poghania mbiwa tooni

⁶ “O Tamañ, yo upas zeran siriv tivot ila tamtamon to taan sosozi, ve ugham zi timin leg, ve yau napaghazonai zi pa ezam tomania ngar tsio ve gabuam wa. Yes tamtamon tsio. Eemon yo ugham zi timin leg, ve matazi kisin saveen tsio ve titaghoni. *

⁷ Aazne, yes tiwatagh tighe: Gabua naol isov tau yo ugham zi payau, ene tivot ilat tsio. *

⁸ Pasaa, saveen isov tau yo ughuru ilam tsiau, ene anag nasavia pazi gha tighamu imin lezi wa. Tauta aazne, tighur ilam tsiau, ve tiwatagh tighe: Yau naleep tsio, ve yo umbaon ghau ta nalam.

* **17:3:** Yo 3:16; 2Pe 1:2+; 1Yo 5:20 * **17:4:** Yo 4:34, 13:31

* **17:5:** Yo 1:1+; Pil 2:6; Hib 1:3 * **17:6:** Yo 6:37, 10:29 * **17:7:** Gabua tau Yesu isavi zi, ene gabua imin tapiri to igham gabua ngeretazi, ve ngar tau ighen tooni, tomania uraat ve saveen tooni.

9 “Taman, sunuun tsiau tane inarui ghom pa zeran tane pasaa, yes tamtamon tsio, ve yo ughur zi timin leg wa. Ve yes tau titaghon taan ngara na, yau naghur zi ila sunuun tsiau tane mako.

10 Tamtamon tsiau tomania gabua tsiau ta naol ne, ene yo tsio. Ve tamtamon tsio tomania gabua tsio naol isov, ene yau tsiau. Zeran tsiau tane tipaghazongai ezag tiina tomania tapirig ve poia tsiau wa. 11 Yau irau naleep tomani zi muul mako. Pale napul zi tileep izi taan. Pasaa, naghe nalat payo tane. O Taman, yo patabuyaaj. Ungin poghani zi, ve umin sigheu pazi. Leso tikis ezam tomania ngar tsio ariaaj, ve lupuun toozi eemon imin ituru. *

12 Tapirim tomania ngar tsio tau ezam tiina pani na, yo ugham payau paam. Tauvene saawe tau nalepleep tomani zi, yau nangin zi ila yo ezam, ve namin sigheu pazi. Tauta toozi eta ilale mako, ve aazne tikiskis ezam tomania ngar tsio ariaaj. Neer tau eeza igheen pataghaaj to ilale, i mon ta ilale. Leso saveen tsio tau tiboode na, ighur anooja. *

13 “Eemon naghe napul zeran tane tileep, ve nalat payo tane. Tauvene saawe tau yenja nilepleep izi taan soone, ve nasavia saveen isov tane pazi pataghaaj. Leso lolozi poia le poia kat imin yau. *

14 Zeran tane, yau navotia saveen tsio pazi gha tighamu wa. Tauvene yes to taan muul mako, imin yau to taan mako. Puughu tane ta yes tau titaghon taan ngara na, tighurghur koi pazi. *

* 17:11: 2Tes 3:3; 1Pe 1:5; Jud 24+ * 17:12: Mbo 41:9; Yo 6:39,

70 * 17:13: Yo 15:11 * 17:14: Yo 15:19; 1Yo 2:15+

15 Yau naghason ghom to upas zi tivot soghan pa yes tau titaghon taan ngara ne mako. Yau naghe umin sigheu pazi, ve upoon zi pa Neer Saghati. *

16 Pa zeran tane, yes to taan mako, raraate imin yau to taan mako.

17 “Saveenj tsio, ene saveenj onoon mon. Upalot saveenj tsio igheen ariaanj ila lolozi. Leso timin tamtamon tsio patabuyaana, ve titaghon katin ngar tsio. *

18 Yau nambaanj zi tila to tileep ila tamtamon to taan sosozi, ve tigham uratoi zi, raraate imin yo umbaanj ghau nazilam to naleep ila tamtamon to taan sosozi. *

19 Aazne, yau napul taug ila yo nimam, ve naghe napasov uraat tau ughuru payau na. Leso nauul zi, ve saveenj tsio onoon igham uratoi zi gha timin tamtamon tsio patabuyaana ve titaghon katin ngar tsio. *

Yesu ighason Maaron to ilup yes tau murei pale tighur ila tooni na timin eemon

20 “Sunjuunj tsiau tane injarui ghom pa zeran tane mon mako. Yau nasunj ghom pa yes tau murei pale tiloonj saveenj toozi, ve tighur ilam tsiau na paam.

21 Tamaanj, ulup zi tisov timin eemon, ve ugham zi tileep tunja ilam toit, imin yau naleep ilat tsio, ve yo uleep ilam tsiau, ve lupuunj toit eemon. Leso tamtamon to taan tighilaal tighe yo umbaanj ghau ta nalam. *

* **17:15:** Mt 6:13; 1Yo 5:18 * **17:17:** Yo 15:3; 1Pe 1:22 * **17:18:**

Mt 28:19; Yo 20:21 * **17:19:** 1Kor 1:2, 30; Ep 5:26; Hib 10:10

* **17:21:** Ro 12:5; Ga 3:28; Ep 4:3+

²² Tapirim ve poia tsio tau ezam tiina pani na, ene yo ugham payau, ve yau napaghazonjai zi pani wa. Leso tivalupu zi timin eemon, raraate imin ituru.

²³ Yau aat naleep ila toozi, ve yo uleep ilam tsiau. Leso tivalupu zi timin eemon kat. Isaav ighe ngar tauvene ivot, ene pale tamtamon to taan tighilaal tighe yo umbaan ghau ta nazilam, ve lolom igheen to yes tau tighur ilam tsiau na, raraate imin lolom igheen tsiau. *

²⁴ “Taman, yes tau yo ugham zi timin leg na, yau naghe tilam tileep tomani ghau izi nugh tsiau, ve tighit katin mbonarig, tomania tapirig, ve poia tsiau. Saawe tau yo ughur gabua eta ivot soone ve ilam, yo lolom igheen tsiau. Tauta ugham taum mbonarim, tomania tapirim ve poia tsio payau. *

²⁵ O Taman, yo dudunam kat. Yes tau titaghon taan ngara na, tiwatagh ghom mako. Eemon yau, o nawatagh katin ghom. Ve zeran tane tighilaal tighe yo umbaan ghau ta nalam. ²⁶ Ezam tiina tomania gabuam ve ngar tsio, yau napaghazonjai zi pani wa. Ve yau aat naghamgham tauvene le tighazonj pani kat. Leso lolozi pa tauzi imin yo lolom payau, ve naleep ila toozi ve yenja nilup ghei nimin eemon.”

18

Tikis Yesu

(Mt 26:47-56; Mk 14:43-50; Lu 22:47-53)

¹ Yesu ipasov sunuun tooni le isov, ra toman mbiwa tooni tipul nugh tiina Yerusalem, ve tizila timbut yaa Kidron, ve tinau tizala pa oliv loolo tau

* **17:23:** Yo 16:27 * **17:24:** Yo 12:26; 1Tes 4:17

igheen ila loloz ziige. ² Nugh tawe, Yudas, ñeer tau ighe ighur Yesu ila koiña nimazi na, iwataghi paam. Pasaa, Yesu tomania mbiwa tooni monmon tiluplup zi ta sewe. ³ Tauvene Yudas igham zaaba siriv to Rom tomania uraata siriv tau yes daaba to watoonrau ve zeran tutuunja timbaan zi na, ve yesja tila pa nugh tawe. Tikis lam ve sul tomania zaab to malmal, ve tilaagh tila. ⁴ Ngar isov tau pale ivot pani na, Yesu iwataghi wa. Tauvene ipul oliv loolo tawe, ve ilaagh ñarui zi ila, ve ighason zi ighe: “Yam ail sei?”

⁵ Yes tiyol ghasoniin tooni tighe: “Yei niil Yesu to Nasaret.” Yudas tau ighur Yesu ila koiña nimazi na, i paam iyozyooz tomani zi.

Yes isaav pazi ighe: “YAU TAUG TA NALE- PLEEP.” ⁶ Saawe tau i isaav pazi tauvene, yes tirur ve tizuur timuul, le titaptap tizi taan. * *

⁷ Ra Yesu ighason zi muul ighe: “Yam ail sei?”

Ve yes tighe: “Yei niil Yesu to Nasaret.”

⁸ I isaav pazi muul ighe: “Yau nasaav payam wa. TAUG TA NALEPLEEP. Isaav ighe yam aghe agham ghau, ene poia. Eemon apul zeran tane tila.” ⁹ I isaav pazi tauvene, leso saveen tooni tau muun i isavia na ighur anoonja. Saveen tauvene: ‘Yes tau yo ugham zi payau na, napul toozi eta ilale mako.’ *

¹⁰ Saawe tana Simon Petrus ikis mbuzaagh. Tauvene ipasu iza, ve isap motin ñeer ee taliija

* **18:6:** Maaron eeza Yoova, puughu tauvene: ‘Yau nalepleep.’ Ughita Maaron Igham Mulin Yes Israela (o Kisim Bek) 3:14. Saawe tau Yesu isavia saveen tane, i aat itotoi Maaron tapiri siriv. Puughu tane ta yes tau tila pa ghamuunni na, titaptap tizi. * **18:6:** Igham

3:14 * **18:9:** Yo 17:12

ziige ila pa tapir. Neer tawe, i daaba to watoonrau besoonja tooni. Eeza Malkus. †

¹¹ Yesu isaav pa Petrus ighe: “Ai! Uzeev mbuza-agh tsio tana imuul ila niia. Mindai, rubruub tau Tamar igham payau ne, pale irau naghun ila mako?” ‡

Tigham Yesu ila to Anas

¹²⁻¹³ Ra yes zaaba to Rom tomania daaba toozi ve yes uraata tau yes Yuda timbaan zi tila na, tikis Yesu, tikau niima, ve tighamu ila to Anas imin maata, leso iloon saveen tooni. Ndaman tana, Anas raawa Kaiapas, i daaba to watoonrau. §

¹⁴ Kaiapas tane, ta muun isaav pa pooza to yes Yuda ighe: “Poia pa neer eemon igham eval tiina niazi ve imaat pazi. Mako pale tamtamon tisov timatmaat gha tilalez.” *

Petrus ipaisamun Yesu eeza

(Mt 26:69-70; Mk 14:66-68; Lu 22:55-57)

¹⁵ Simon Petrus yesuru mbiwa ite titaghon Yesu le tila tivot daaba to watoonrau ruum tooni. Mbiwa tawe, daaba to watoonrau iwataghi. Tau-vene i itaghon Yesu gha yesuru tilon tila didiin tau ilivut ruum na loolo. ¹⁶ Eemon Petrus, i ileep

† **18:10:** Takabiid Malkus tane ve Markus ezazi sov. Markus, i neer tau murei ibood vaaru poia. Ve Malkus, i daaba to watoonrau besoonja tooni. ‡ **18:11:** Rubruub tau Yesu isavia, ene izaa to patajani tau i pale ibaado, leso ireu sosor to tamtamon, ve itatan Maaron aatyavyav tooni. § **18:12-13:** Anas, muun i imin daaba pa zeran to watoonrau. Ve saawe tane, i isov pa uraat tooni wa. Eemon eeza ighengheen soone. Saawe tau tirav Yesu imaat, Anas raawa Kaiapas imuun pa yes to watoonrau. * **18:14:** Yo 11:49+

muuri igharau ataman aavo. Tauvene mbiwa ite tana ivot muul, ve isaav pa livaa tau inginngin ataman na to igham Petrus ilonj ila paam. ¹⁷ Tauta livaa tawe ighason Petrus ighe: “Yo mbiwa ee to neer tawe paam?”

Petrus iyol aliinja ighe: “Ee-e, yau mbiwa tooni mako.” ¹⁸ Saawe tana, nugh iyaun. Tauvene yes besoonja tomania uraata siriv tindav yav gha ilavlaav zi ve tilepleep. Ve Petrus paam ila iyozy-ooz tomani zi, ve yav ilavlaavo.

Anas ighason rarai Yesu

(Mt 26:59-66; Mk 14:55-64; Lu 22:66-71)

¹⁹ Anas tau daaba mungaana to yes to watoonrau na ighason Yesu pa mbiwa tooni, ve saveen tau ivovotia pa tamtamon. ²⁰ Yesu iyol aliinja ighe: “Saveen tsiau, yau nangooza mako. Nasasavia ghazonj ila eval tiina matazi. Saawe naol, yau naghazonjai tamtamon pa Maaron aliinja izi nugh tau iit Yuda taluplup ghiit pani, imin rumei to nugh nugh, ve Rumei Tiina naagho. ²¹ Yo ughason ghau pa saveen tsiau pasaa? Ughason yes tau tilonloon saveen tsiau na. Pa yes tiwatagh saveen tau nasasavia na.”

²² Yesu isavia saveen tane, ve uraata ee tau iyooz igharauu na, iposai paanja, ve isaav pani ighe: “Ai, uyol daaba to watoonrau saveen tooni tauvena pasaa? Uroron pani mako?”

²³ Yesu iyol aliinja ighe: “Isaav ighe alinag eta isosor, na uvotia. Ve ighe saveen tsiau iduduun, puughu mindai ta yo uposai sorokin ghau ne?”

²⁴ Yesu isaav tauvene, ra Anas ipuli, ve isaav gha tighamu ila to Kaipas tau daaba to watoonrau. Ve

ravraav tau tikau Yesu niima pani na, ighengheen, ve i ilaghlaagh tomania.

Petrus ipaisamun Yesu eeza muul

(Mt 26:71-75; Mk 14:69-72; Lu 22:58-62)

²⁵ Petrus, iyozyooz ila yav ziige ve yav ilavlaavo. Tauvene yes tau yesna Petrus tilepleep izi yav ziige na, tighasoni tighe: “Yo paam, aat mbiwa tooni ee?”

Petrus ipaisamun tauu ighe: “Ee-e, yau mbiwa tooni mako.”

²⁶ Neer tau Petrus isap motin taliina na, ziiri waaro tooni ee, i besoonja to Kaiapas. I iburig ve isaav pa Petrus ighe: “Wai, yo tane ta naghit ghom yamna ayozyooz izi oliv loolo na!” ²⁷ Eemon Petrus ipaisamun tauu muul. Saawe duduun tana, tatareek itan.

Tipayooz Yesu ila Piladus naagho

(Mt 27:1-2, 11-14; Mk 15:1-5; Lu 23:1-5)

²⁸ Mbonoozo geeg, daaba to yes Yuda tigham Yesu gha tipul ruum to Kaiapas, ve tighamu tila pa ruum tiina to Piladus tau gavana to Rom na. Eemon tilon tila ruum tooni loolo mako. Tileep muuri. Pasaa, Piladus, i Yuda mako. Ve saawe to Pasova ilam igharau wa. Tauvene tiroi: Isaav ighe tilon tila ruum tooni loolo, ene pale igham zi tisaghat ila Maaron maata, ve irau tighan aniin to Pasova mako. ²⁹ Tauvene Piladus ivot ila toozi, ve ighason zi ighe: “Neer tane igham saa sosor, ta aghamu ilam ne?”

³⁰ Yes tiyol ghasoniin tooni tighe: “Wai, isaav ighe i neer poia, pale nighamu ilam payo? Mako. I neer saghati ee. Tauta nighamu ilam.”

³¹ Tauvene Piladus isaav pazi muul: “Ighe tauvene, aghamu ala, ve taumim agharaat saveen tooni itaghon tutuun tsiam.”

Yes tiyol aliina tigde: “Ene poia. Eemon yam Roma tutuun tsiam ingalsekin ghei pa ravuun tamtamon imaat.” ³² Muun, Yesu isavia eez tau i pale imaat pani. Yes tisaav tauvene tauta Yesu aliina tana ighur anoonja.

³³ Tauvene Piladus imuul ilon ila ruum loolo, ve isaav gha tigham Yesu ilon ila tooni. Ra ighasoni ighe: “Mindai, yo tane, kinik to yes Yuda?” *

³⁴ Yesu iyol aliina ighe: “Ghasoniin tsio tana, ivot ila taum ngar tsio, ma tamtamon siriv tipaesighau payo, tauta ughason ghau ne?”

³⁵ Piladus isaav pani muul ighe: “Mindai, yau to Yuda? Ene taum tamtamon tsio, tomania yes daaba to watoonrau, ta tighur ghom ila nimag. Tauvene usaav ghazonja payau lak. Yo ugham saa sosor, ta tigham ghom ulam?”

³⁶ Yesu isaav pani ighe: “Gabua tau yau naghhamgham pooz pani, ene to taan mako. Imin ta yau kinik itaghon ngar to taan, kanan uraata tsiau tivool tsiau ve tigham malmal. Leso yes Yuda irau tikis ghau mako. Eemon imin yau nasavia ila wa. Gabua tau yau naghhamgham pooz pani, ene to taan mako.” *

³⁷ Piladus iloon saveen tooni, ve ighasoni muul ighe: “Ighe tauvene, na yo aat kinik taa?”

Yesu iyol aliina ighe: “Ene onoon. Saveen tauta taum usavia na. Eemon yau kinik imin yo ugham ngar pani ne mako. Yau nazilam taan to napariaan

* **18:33:** Mt 2:2 * **18:36:** Dan 7:13-14; Ro 14:17

tamtamon to tighur ila saveen onoon. Tinaŋ ipoop ghau pa puughu tane. Tauvene tamtamon tisov tau lolozi pa taghoniin saveen onoon, ene aat tiloon alinag ve titaghoni.” *

³⁸ Tauta Piladus ighasoni muul ighe: “Saveen onoon, ene saa?” *

Piladus ighe ipul Yesu ila

(Mt 27:15-23; Mk 15:6-14; Lu 23:13-23)

Piladus isavsaav tomania Yesu le isov, ra ivot ila pa muuri muul, ve isaav pa yes Yuda ighe: “Yau naghita naghe neer tane, i le sosor eta mako.

³⁹ Aghita. Yam gabuamim tauvene: Tamtamon tsiam tau tileep ilon ila ruum to yavyavuun na, ighe saawe to Pasova ivot, yau aat napul toozi ee ivot ilat payam. Mindai, aghe napul kinik to yam Yuda tane ilat?”

⁴⁰ Yes tiboob toman alinazi tiina tigde: “Yei lolomai pa neer tana mako! Upul Barabas ilam!” Barabas tawe, i ighamgham malmal leso iziir gavman to Rom. *

19

Yes zaaba tilos Yesu ve tipamogheraini imin i kinik

(Mt 27:27-31; Mk 15:16-20)

¹ Tauvene Piladus isaav pa zaaba tooni gha tigham Yesu ve tilosi. *

* **18:37:** Yo 8:47 * **18:38:** Yo 14:6 * **18:40:** Mban 3:14

* **19:1:** Ravraav tau yes Roma tiloslos tamtamon pani na, timbit gabua matazi ila. Leso iranġat tamtamon ulizi ve mizazi.

2-3 Ve tigham waar tuatua gha titalia, ve tighuru izala Yesu daaba imin moghar ndamoonda to yes kinik. Ve tisik nonoghiinja ngereeta imin dagilgil † izala paavo. Ra tamtamon toozi enjaenja tilaagh tila tiyooz ila naagho, ve tisaav pani tighe: “Aa, kinik to yes Yuda, mbonjoozo poia! Yei nipakur ghom!” ve tipoposaii.

Piladus isaav ighe tirav Yesu imaat

(Mt 27:24-25; Mk 15:15; Lu 23:24-25)

4 Tighamgham tauvene, ve Piladus ivot ila muuri, ve isaav pa eval tiina ighe: “Aghita. Yau aat naghham njeer tawe ivot ilam payam. Leso awatagh aghe yau naghita naghe i le sosor eta mako.”

5 Tauvene Piladus igham Yesu ivot ila muuri. Waar tuatua igheen ila daaba, ve nonoghiinja ngereeta imin dagilgil igheen ila tiini. Ra Piladus isaav pa eval tiina ighe: “Aghita! Tamtamon tauta ene!”

6 Yes daaba to watoonjrau tomania uraata siriv to Rumei Tiina tighita Yesu, ve tiboob tighe: “Uravu izala ai pambaroon! Uravu izala ai pambaroon!”

Eemon Piladus isaav pazi ighe: “Yam taumim aghamu ala, ve aravu izala ai pambaroon. Pa yau naghita naghe i le sosor eta mako.” *

7 Yes Yuda tiyol aliinja tighe: “Yei lemai tutuun. Ve tutuun tsiei isaav ighe: Tamtamon tauvene, i aat imaat. Pasaa, ipakur tauu ighe i Maaron Naatu.”

8 Piladus iloonj saveenj toozi tane le roinj tiina ighamu. 9 Tauvene ilonj ila ruum loolo muul, ve

† **19:2-3:** Yes kinik tinonogh zi pa nonoghiinja tau ngeretazi imin dagilgil. * **19:6:** Mbanj 3:13+

ighason Yesu ighe: “Yo saa neer? Ulaagh mindai ta ulam?” Eemon Yesu iyol aliinja mako. Ineneen mon. ¹⁰ Tauvene Piladus ighasoni muul ighe: “Pu-ughu mindai ta uyol alinag mako? Yo ukankaan payau? Aazne, yo uleep ila yau nimag. Yau leg tapirig to napul ghom ula, ve leg tapirig to nasaav, ve tirav ghom izala ai pambaroon.”

¹¹ Yesu iyol aliinja ighe: “Isaav ighe Maaron to sambam ipul ghau ila nimam mako, ene aat yo lem tapirim to ugham gabua eta payau mako. Tauvene neer tau ighur ghau ila nimam na, sosor tooni iliiv sosor tsio.” *

¹² Piladus iloon saveen tane, ra iil eez to ipul Yesu ila. Eemon yes Yuda tiboob ila pani tighe: “Isaav ighe yo upul neer tana ila, na yo kinik tiina to Rom eeta mako. Pasaa, tamtamon tisov tau tipakur tauzi tighe yes kinik, ene tizoor kinik tiina to Rom pooz tooni.” *

¹³ Piladus iloon saveen tane, ve igham Yesu gha yesuru tivot tila muuri, ra Piladus mboole ila niia to gharatoon saveen. Niia tawe igheen nugh tau tiwaat eeza ila saveen Hibru tighe ‘Gabata’ (‘Gabata’ puughu tauvene: nugh tau tiraar maet babanazi ila imin nugh to lepoogh.) ¹⁴ Saawe tana, ene saawe to gharatoon aniin ma gabua pa Pasova. Ve aaz izalam zegmatuugh wa. Piladus isaav pa yes Yuda ighe: “Aghita. Kinik tsiam tane!”

¹⁵ Eemon tiboob ila pani tighe: “Mako. Neer tana ileep sov! Ughamu ila, ve uravu imaas. Uravu izala ai pambaroon!”

* **19:11:** Yo 10:18; Mban 2:23 * **19:12:** Lu 23:2

Tauvene Piladus ighason zi muul ighe: “Lolomim mindai, aghe yau narav kinik tsiam tane izala ai pambaroon?”

Yes daaba to watoonrau tiyol aliija tighe: “Yei lemai kinik ite paam mako. Kinik tiina to Rom, i mon ta kinik tsiei.” ‡

¹⁶ Tauvene Piladus iloon aliinazi, ve ipul Yesu ila zaaba tooni nimazi. Leso tiravu izala ai pambaroon.

Tirav Yesu izala ai pambaroon

(Mt 27:32-44; Mk 15:21-32; Lu 23:26-43)

¹⁷ Tauvene tigham Yesu ila, ve tauu ibaad ai pambaroon tooni. Tipul nugh tiina Yerusalem gha tivot tila muuri, ra tinau pa nugh mbua ee, eeza ‘Daaba rubruuba.’ Tiwaat nugh tawe eeza ila saveen Hibru tighe ‘Golgata.’ § *

¹⁸ Tila tivot ta sewe, ra tirav Yesu toman zeran ru paam ila ai pambaroon. Ra tipayooz ai pambaroon to Yesu ila bodbodaan, ve zeran ru tawe, ee ila pa nas, ve ite ila pa tapir.

¹⁹ Ve titaghon saveen to Piladus, ve tibood mateegh tooni puughu ila ndiu sirivu ee, ra tiravu izala ai pambaroon tooni daaba. Paesiin tawe isaav ighe: “Yesu to Nasaret, kinik to yes Yuda.”

‡ **19:15:** Maaron aliija ziiri naol isaav tauvene: Maaron, i kinik to yes Israela. Eemon saveen ziiri tane, ene yes Yuda tizor Maaron tau kinik toozi duduun na, ve tighe kinik to Rom ta ingin zi. § **19:17:** Saveen ‘daaba rubruuba’, yes Roma tiwaato ila tauzi aliinazi Latin tighe ‘Kalvari’. * **19:17:** Hib 13:12

²⁰ Saveen tane, tiboode ila saveen Hibru, Roma alinazi, ve yes Grika alinazi paam. *

Nugh tau tirav Yesu izala ai pambaroon pani na, ene igheen igharau Yerusalem. Tauvene yes Yuda eval tilam tighita saveen tana, ve tiwaato.

²¹ Tauta yes daaba to watoonrau tila to Piladus, ve tisaav pani tigde: “Yo ubood ughe ‘kinik to yes Yuda’ sov. Yo aat ubood saveen tauvene: ‘Neer tane isaav ighe i kinik to yes Yuda.’ ”

²² Eemon Piladus iyol alinazi ighe: “Mako. Saveen tau naboode na, ene aat igheen tauvene.”

²³ Zaaba tana tirav Yesu izala ai pambaroon le isov, ra tigham nonoghiina tooni tomania gabua tooni siriv paam ve tivalagh zi imin paan, ve tirei irau zi. Eemon nonoghiina tooni to ngoaan, ene sain mako. ²⁴ Tauvene zaaba tana tivasavo zi tigde: “Nonoghiina to ngoaan tane, tarangati sov. Igheen tauvene, ve tapayooz mbuur ve taghita: Sei pale ighamu?” Tauvene Maaron alina ziiri ee tau tiboode na, ighur anoonja. Isaav tauvene:

“Yes tirei nonoghiina tsiau tomania gabua siriv irau zi.

Ve nonoghiina tsiau to ngoaan, ene tipayooz mbuur pani. Leso tighita sei ta pale ighamu.” *

Ngar tau zaaba tighamu na, ene iduduun pa saveen tane.

* **19:20:** Saveen tau tiboode na, ene vene: Yeshua Nasaret, Ham-elech Yehudah (saveen Hibru), Yesu Ho Nazariaos, Ho Basileus Toon Yudaion (Grika alinazi), Iesus Nazarenus Reks Iudaeorum (saveen Latin). Saveen Latin tane, tuuku tooni ene INRI. Yesu anunu tau tighen ila rumei siriv lolozi na, tibood saveen INRI ila.

* **19:24:** Mbo 22:18

25-26 Yesu tiina Maria yesuru tazliva, ve Maria ite tau Klopas azaawa na, ve Maria ite to nugh Magdala, ve mbiwa tau Yesu loolo igheen tooni kat na, yes tiyozyoos igharau ai pambaroon tooni puughu. Yesu maata izi le ighita tiina yesuru mbiwa tooni tawe tiyozyoos. Tauvene isaav pa tiina ighe: “Tinaŋ, ughita. Ena yo natum.” *

27 Ve isaav pa mbiwa tooni ighe: “Ughita. Ena yo tinam.” Tauta saawe tana ve ila, mbiwa tana igham Yesu tiina ila ruum tooni, ve inġini.

Yesu imaat

(Mt 27:45-56; Mk 15:33-41; Lu 23:44-49)

28 Yesu isavsaav pa tiina ve mbiwa tooni tana le isov, ra iwatagh ighe i ipasovuur uraat tooni naol isov wa. Tauvene isaav ighe: “Yau murun ghau!” Saveen tane, i isavia leso Maaron aliin tau tiboode na ighur anoonja. 29 Uur ee tomania vaen manjin igheen igharau. Tauvene tigham gabua tau ighoghooloom yaa na, ve tizeeva izila vaen tawe. Ra tighurumu ila ai isop booga ve tizuzuuna izala pa Yesu aavo. *

30 Yesu ighooloom vaen tana le isov, ve isaav ighe: “Uraat tsiau, ene isov tane.” Ra inġoor luua, ipul avuvu ila, ve imaat.

Tighurum Yesu ranraanjo saamba

31 Saawe tana, ene saawe to titartar pa umbom patabuyaŋ tau ighe ivot. Umbom tana, ene patabuyaŋ kat. Tauvene daaba to yes Yuda tila to Piladus, ve tighasoni tighe i isaav ila pa yes zaaba gha tirav polin yes tau tituktuuk ila ai pambaroon

* 19:25-26: Yo 13:23 * 19:29: Mbo 22:15, 69:21

na aghezi. Leso timaat rekia, ve tizugh zi tizi, gha tila titavi zi. Le isov, o umbom patabuyaany ivot. ³² Tauvene zaaba tila, ve tirav polin zeran ru tau tirav zi tomania Yesu na aghezi. ³³ Tirav polin yesuru aghezi le isov, ra tila pa Yesu aana. Eemon tighita i imaat wa. Tauta tirav polin aaghe mako. ³⁴ Eemon zaaba ee igham iiz, ve ighurum Yesu ranraano saamba. Ve rekia mon sinj tomania yaa imalinj. *

³⁵ Neer tau ighita gabua tawe pa tauu maata, tauta isavia. Ve i iwatagh: Saveen tooni, ene onoon. Pasaa, i ighit katin gabua tana. Tauta ipari-aan saveenja, lesu yam paam aghur ila. ³⁶ Gabua tane tivot pa Yesu, lesu Maaron aliinja ziiri ee tau tiboode na ighur anoonja. Saveen tauvene:

“Iraa tuua eta ipol mako.” *

³⁷ Ve saveen ziiri ite isaav tauvene:

“Pale matazi ila pa neer tau tighurumu na.” *

Tighur Yesu paata ila naal loolo

(Mt 27:57-61; Mk 15:42-47; Lu 23:50-56)

³⁸ Gabua tana tivotiir le isov, ra Yosep to nugh Arimatea ila ighason Piladus ighe iyokia Yesu paata pani, lesu ighamu ila ve ighuru ilonj ila naal. Yosep tawe, i mbiwa ee to Yesu. Eemon ivotia ghuruunj ila tooni ivot ighazoonj mako. Pasaa, iroi pa yes Yuda. Piladus iyok pani, tauvene i ila pa ghamuunj Yesu paata. ³⁹ Ve Nikodemus tau muunj ila to Yesu ve yesuru tisavsaav pa mbonj na, i paam ila tomania Yosep. I igham ngoreen tiina tau vaazi

* **19:34:** 1Yo 5:6+ * **19:36:** Igham 12:46; Mbo 34:20 * **19:37:** Mbo 22:16+; Sek 12:10; Syg 1:7

poia na, ve ilam. Ngoreen tawe, patanani tooni tiina, irau 30 kilogram ma vene. † *

⁴⁰ Yesuru tila tigham Yesu paata, ve tila tigharaata itaghon yes Yuda gabuazi tau monmon tighamgham pa mateegha toozi. Tisop ngoreen tana sirivu izala Yesu paata, ve sirivu ila uuli ve tikaukauu. ⁴¹ Nugh tau tirav Yesu pani na, nugh paghuuna ee igheen igharau. Ve maet puura paaghu ee tau tigharaata pataghaan imin naal pa mateegha na, igheen ta sewe. Puura tawe, tighur mateegh eta ilonj ila soone. ⁴² Saawe tana, ene saawe to yes Yuda titartar pa umbom patabuyaaj. Ve ravrav izi gha paita umbom patabuyaaj ivot. Maet puura tana igheen igharau. Tauvene tigham Yesu paata, ve tighuru ilonj ila.

20

Yesu iburig pa mateegh

(Mt 28:1-8; Mk 16:1-8; Lu 24:1-12)

¹ Umbom patabuyaaj isov, ve saawe imin maata to wik tana, mbonoozo, ndoroome geeg, ve Maria to Magdala ila ighe igig naal to Yesu. Ila ivot maet puura tau tighur Yesu paata pani na, ve ighita maet tiina tau ipoon naal aavo na, tipatambulia ighau wa. ² Tauvene ilaan imuul ila to Simon Petrus ve mbiwa tau Yesu loolo igheen tooni kat na, ve ipaes pazi ighe: “Nugh eta tipas Tiina toit paata pa naal, ve tighamu ila wa! Ve yei nikankaan pani. Tighuru sindei?”

† **19:39:** Ngoreen tau Nikodemus ighamu na, tigharaata pa gabua ru, ezazi miir, ve aloos. Muuj, saawe tau Maria ipoop Yesu, yes ngara to aaz puughu tigham miir pa Yesu. Ughita Mt 2:11. * **19:39:** Yo 3:1, 7:50

³ Tauvene Petrus yesuru mbiwa ite tawe tiburig tila pa naal. ⁴ Yesuru tilaan tila, ve mbiwa ite tana ilaan rekia imuun pa Petrus gha ila ivot naal aavo imin maata. ⁵ Ra itugh ghi izi, ve igig ilonj ila pa naal loolo, ve ighita uuli siriv siriv tau tikau Yesu paata pani na, ighengheen ila niia. Eemon i ilonj ila naal loolo mako. ⁶ Malau mako, Simon Petrus aana ilam peria, ve malmali ilonj ila naal loolo. I paam ighita uuli siriv siriv tau tikau Yesu paata pani na, ighengheen. ⁷ Ve ighita uuli tau tikau Yesu daaba pani na, igheen tomania uuli siriv siriv tawe mako. Ene polaanj izi igheen soghan. ⁸ Ra mbiwa ite tau ila ivot naal aavo imin maata na, aana itaghon Petrus ilonj ila. I ighita gabua naol tana, ve ighur ila.

⁹ Onoon, Maaron aliija tau tiboode na, isaav tauvene: Mesia aat imaat ve iburig pa mateegh itaghon Maaron ngar tooni. Eemon ngar toozi ighazoon pa saveen tana puughu soone. *

¹⁰ Yesuru tighita gabua tana le isov, ra tipul naal, ve timuul tila pa niazi to lepoogh.

*Yesu ivot to Maria to nugh Magdala
(Mt 28:9-10; Mk 16:9-11)*

¹¹ Maria to Magdala imuul ila ivot naal aavo, gha iyozyooz ve itanjan. Ve itugh ghi izi, ve igig ilonj ila pa naal loolo ¹² le ighita anela ru tilepleep. Yesuru tinonogh zi pa nonoghiija pisosoonja, ve mbolezi izi nugh tau tighur Yesu paata pani na. Ee ileep ila pa daaba, ve ite ileep ila pa aaghe.

¹³ Anela ru tawe tighasoni tigde: “Livaa, yo utanjan pasaa?”

* 20:9: Mbo 16:10

I iyol aliŋazi ighe: “Wai, tigham Tiina tsiau paata ila wa. Ve yau nakankaan pani. Tighuru sindei?”

¹⁴ Ra itoor ghi, maata imuul, ve ighita Yesu tauu iyozyooz. Eemon ighilaalo mako.

¹⁵ Yesu ighasoni ighe: “Livaa, utan pasaa? Uil sei?”

Maria ighe pa i uraata eta tau ingin nugh tawe. Tauvene isaav pani ighe: “Olman, isaav ighe yo ugham Tiina tsiau paata ila nugh eta, na upaes payau: Ughuru sindei? Leso nala naghamu.”

¹⁶ Tauvene Yesu isaav pani ighe: “Maria.”

I isaav tauvene, ra Maria ighilaalo ighe ene Yesu tauta ene. Tauvene itoor ghi naagho ila pani, ve isaav pani ila saveen Hibru ighe: “Raboni!” Saveen tane, puughu vene: ‘Paduduŋaŋ tsiau.’

¹⁷ Yesu isaav pani muul ighe: “Usaghav ghau sov. Pa saawe to nazala to Taman, ene soone. Umuul ula to taziŋa, ve upaes pazi tauvene: Yau pale namuul nazala to Taman. I, yam Tamamim paam. Ve i Maaron tsiau, ve Maaron tsiam paam.” *

¹⁸ Tauvene Maria to nugh Magdala ila ivot to yes mbiwa, ve ipaes pazi ighe: “Yau naghita Tiina toit pa taug matag wa!” Ra ipaesia Yesu aliŋa pazi gha tilooŋa.

Yesu ivot to mbiwa tooni

(Mt 28:16-20; Mk 16:14-18; Lu 24:36-49)

¹⁹ Saawe eemon tana, ravrav tooni, yes mbiwa to Yesu tilup zi ilon ila ruum ee loolo ve tipoon ataman le tunja kat. Pasaa, tiroi pa yes Yuda.

* **20:17:** Hib 2:11+

Malau mako na, Yesu ivot iyooz ila sosozi, ve isaav pazi ighe: “Luuma to Maaron^{*} igheen tomani gham.”²⁰ Ra itotoi niima ve ranraanjo saamba pazi. Yes tighita Tiina toozi, ve lolozi poia le poia kat.

²¹ Yesu isaav pazi muul ighe: “Luuma to Maaron igheen tomani gham. Aazne, yau nambaan gham ala, imin Taman imbaan ghau nalam ne.”^{*}

²² Ra iviv avuvu ila pazi, ve isaav pazi ighe: “Agham Avuvu Patabuyaany irau gham.”²³ Isaav ighe yam apul sosor to tamtamon eta, ene Maaron paam ireu sosor tooni. Ve tamtamon tau ighe apul sosor tooni mako, ene Maaron paam irau ireu sosor tooni mako.”[†]^{*}

Yesu ivot to Tomas
(Mk 14:14)

²⁴ Saawe tau Yesu ivot to mbiwa tooni, tamtamon toozi ee, eeza Tomas, ileep tomani zi mako. Tomas tawe, eeza ite Didimus.²⁵ Tauvene murei, ra tipaes pani tigde: “Yei nighita Tiina toit wa!”

^{*} **20:19:** Luuma to Maaron ilup gabua naol. Yesu ibaad sosor toit atuya wa, tauvene Maaron aate yavyav pait muul mako, ve itinja Maaron irau tavalupu ghiit tamin eemon. Ve Maaron igham ghiit taroi muul mako, ve loloan ipatanjan muul mako. Loloan poia. Ve aazne, ezaan pa ghamuun lepoogh poia to Maaron tau iseenga taghon gha ila. ^{*} **20:21:** Mt 28:19 [†] **20:23:** Saveen tane, puughu tauvene: Isaav ighe tamtamon eta ighur ila to Krisi, ene pale Maaron ireu sosor tooni. Tamtamon tauvene, iit irau tasaav pani taghe: “Maaron ireu sosor tsio wa.” Ve isaav ighe tamtamon eta ighur ila mako, ene itotoi ighe i ileep ilonj ila pooz to Maaron soone. Tamtamon tauvene, iit aat tasaav ghazonja pani: Maaron ireu sosor tooni soone. ^{*} **20:23:** Mt 16:19, 18:18

Eemon Tomas iyol aliŋazi ighe: “Ah, isaav ighe taug matag naghita kiruunŋ niia tau igheen ila ni-ima na, ve nazeev nimag nguruuŋa itaghon kiruunŋ niia tawe, ve nazeev nimag ilonŋ ila iiz niia ta ranraaŋo saamba na, ene aat naghur ila. Ve ighe mako, ene irau naghur ila saveeŋ tsiam tana mako!”

²⁶ Mbonŋ liim ve ru ilam ila, ra mbiwa tooni tilup zi muul ilonŋ ila ruum tau tilepleep pani na. Saawe tana, Tomas ileep tomani zi paam. Yes tiponaar ataman tisov tivolaar le tunja. Malau mako, Yesu ivot iyooz ila sosozi, ve isaav pazi ighe: “Luuma to Maaron ileep tomani gham.” ²⁷ Ra isaav pa Tomas ighe: “Ulam ugharau, ve ughita nimag, uzeev nimam nguruuŋa itaghon kiruunŋ niia, ve uzeev nimam ilonŋ ila iiz niia tau igheen ranraaŋog saamba ne. Yo lolom ruru irao! Ughur ila!”

²⁸ Tomas iyol aliŋa ighe: “Yo Tiina tsiau, ve Maaron tsiau!”

²⁹ Yesu isaav pani muul ighe: “Yo ughit ghau pa taum matam, tauta ughur ilam tsiau. Ve yes tau tighit ghau pa matazi mako, ve tighur ilam tsiau, ene yes aat tintinizi pa poia to Maaron tau pale iza toozi.” *

Rau tane puughu

³⁰ Yesu igham gabua ngeretazi katini ila mbiwa tooni matazi, leso itotoi tauu pazi ve tighilaal tigue Maaron ileep tomania pa uraat tooni. Eemon saveeŋa siriv igheen ila rau tane mako. *

³¹ Ve saveeŋ isov tau igheen ila rau tane, ene to ipaghazonai ngar tsiam ve igham gham aghur ila

* **20:29:** 2Kor 5:7; 1Pe 1:8 * **20:30:** Yo 21:25

to Yesu aghe i Mesia ve Maaron tauu Naatu. Leso i ndaamo payam ve agham lepoogh poia ila to Maaron. *

21

Yesu ivot to mbiwa tooni liim ve ru izi nari to yaa naliu Galilaia

¹ Murei ra, Yesu ila ivot to mbiwa tooni muul izi nari to yaa naliu Tiberias. *

Ila ivot toozi itaghon eez tauvene. ² Simon Petrus, Tomas tau eeza ite Didimus na, Natanael to nugh Kana tau igheen izi Galilaia na, ve Zebedi natɲa ru, tomania mbiwa ru paam yesɲa tilepleep. ³ Simon Petrus iburig, ve isaav pa zeetɲa tawe ighe: “Yau naghe navot nala nasik puugh.”

Zeetɲa tana tisaav pani tighe: “Yei paam, itɲa tavot tala.” Tauvene yes tisov tila tizaa waan, ve tivot tila. Mbonɲ tana, tiwaswaas le nughizau. Eemon tigham iigh eta mako. *

⁴ Ndoroomo geeg, ve matazi ilonɲ ila le tighita Yesu iyozyooz izi nari. Eemon tighilaalo mako. ⁵ Yesu iboob ila pazi ighe: “Ou geegeu, agham iigh eta, ma mako?”

Yes tiyol aliɲa tighe: “Waii, nigham eta mako kat.”

⁶ Tauvene i iboob ila pazi muul ighe: “Ighe vene, o asik puugh ila pa waan ziige tau igheen ila pa tapir na. O agham iigh.” Tauvene tisik puugh toozi izila muul. Saawe tau tighe tiyauu izaa, titoova le tirao mako. Pasaa, iigh katini tighoon ila puugh le ivon kat.

* **20:31:** Ro 1:17; 1Yo 5:13 * **21:1:** Tiberias, ene yaa naliu Galilaia eeza ite. * **21:3:** Lu 5:4+

⁷ Mbiwa tau Yesu loolo igheen tooni kat na, ighita gabua tana, ve isaav pa Petrus ighe: “Ewe aat Tiina toit!” Saawe tana, Simon Petrus izuzuum nonoghiina tooni to ngoaan izi, ve ighamgham uraat. I iloon saveen tana, ve rekia mon inonogh ghi muul, ve iyaat izila yaa, gha iwai ilon ila pa nari. ⁸ Yes tipot tigharau nari, irau 100 mita ma vene. Tauvene mbiwa siriv tau tileep ila waan na, tigherev puugh tomania iigh, ve titaghon Petrus gha tilon tila pa nari. ⁹ Tiloon kurukia ve tiyaat tizi, ve tighita mberet tomania iigh ighengheen izala yav ngilaani.

¹⁰ Yesu isaav pazi ighe: “Iigh tau ngarig gha agham zi na, agham siriv ilam imoz.”

¹¹ Tauvene Simon Petrus ivot muul ila gha izala waan, ve igherev puugh tomania iigh iloon ilam taan. Iigh tighoon tila puugh le ivon kat. Eemon imotmot mako. Iigh geegeu mako. Tintinazi mon. Tinin zi le irau ndinndin ee, aavo tamoot ru sanavul, ve geege tol (153).

¹²⁻¹³ Yesu isaav pazi muul ighe: “Mbonoozo wa. Alam aghan lemim aniin.” I isaav tauvene, ve niima ila pa mberet tomania iigh tawe, ve ireii pazi. Mbiwa tooni eta aavo pakia gha ighasoni ighe: “Yo sei?” ene mako. Tiroi pa ghasoniin. Pasaa, tighilaalo tighe i Tiina toozi.*

¹⁴ Yesu iburig pa mateegh, ve ivot to mbiwa tooni pai ru ila wa. Ve ite tane imin tol pani.

Yesu ighur Petrus pa uraat muul

¹⁵ Yes tighan le isov, ra Yesu ighason Simon Petrus ighe: “Aa Simon, Yoan naatu, mindai?

* **21:12-13:** Mban 10:41

Yo lolom payau kat iliiv zetamņa siriv tane, ma mako?”

Petrus iyol aliinja ighe: “Vee! Tiina, yo uwatagh, yau lolog payo.”

Yesu isaav pani ighe: “Upan sipsip tsiau pagh-paaghu.” *

¹⁶ Ra Yesu ighasoni muul imin pai ru ighe: “Aa Simon, Yoan naatu, yo lolom payau kat, ma mako?”

Petrus iyol aliinja ighe: “Vee! Tiina, yo uwatagh: Yau lolog payo.”

Yesu isaav pani ighe: “Ungin poghania sipsip tsiau.”

¹⁷ Ra Yesu ighasoni muul imin pai tol ighe: “Aa Simon, Yoan naatu, yo lolom payau, ma mako?”

Petrus iloon Yesu igham ghasoniinj tana pani imin pai tol, le loolo ipatanan. Tauvene iyol aliinja ighe: “Vee! Tiina, yo uwatagh gabua naol isov. Yo uwatagh, yau lolog payo.”

Yesu isaav pani ighe: “Upan sipsip tsiau.” *

¹⁸ Onoon kat, yau nasaav payo: Saawe tau yo paghum, taum ukat kawaal tsio iza ve upuus ghom. Ve nugh sindei tau yo ughe ula pani, na ula mon. Eemon murei, saawe tau umin koon, ene pale uraraav nimam, ve neer ite ikat kawaal tsio iza ve ipuus ghom. Ve nugh tau yo ughe ula pani mako, i pale igham ghom ula pani.” ¹⁹ Saveen

* **21:15:** Mban 20:28; 1Pe 5:2 * **21:17:** Lu 22:61+

tane, Yesu isavia iza to eez tau Petrus pale imaat, ve ipaghazonai Maaron eeza tiina. †
Ve Yesu isaav pani muul ighe: “Utaghon ghau!” *

Mbiwa tau Yesu loolo igheen tooni kat

²⁰ Petrus yesuru Yesu tilaagh tila, ve Petrus itoor ghi, ve maata imuul le ighita mbiwa tau Yesu loolo igheen tooni kat na, itaghon zi gha ilam. Muun, saawe tau tilup zi pa ghanghaniin to Pasova, njeer tawe ta ipaak Yesu, ve ighasoni pa sei ta pale ighuru ila koina nimazi. *

²¹ Petrus ighita mbiwa tana, ve ighason Yesu pani ighe: “Tiina, mindai pa i tau ilam ne?”

²² Yesu iyol aliina ighe: “Matam ila pani sov. Isaav ighe yau naghe i ileep le irau namuul nalam, ene yo gabua tsio mako. Ene igheen to yau taug. Yo aat matam ingal taum, ve utaghon ghau.”

²³ Yesu isaav pani tauvene, tauta murei ra saveen ilaan le irau yes tonvetaz naol tau tighur ila to Krisi na, ve tigde pa mbiwa tooni tau i loolo igheen tooni kat na, irau imaat mako. Eemon Yesu isaav tauvene mako. Isaav mon tauvene: “Ighe yau naghe i ileep le irau namuul nalam, ene yo gabua tsio mako.”

† **21:19:** Sinain munghanazi siriv tisaav tauvene: Murei, Petrus ila ileep izi nugh tiina Rom. Saawe tana, kinik to Rom ighur patanani naol pa yes Kristen, ve irav tamtamon toozi katini timatmaat. Eemon Petrus iroi mako. Iyooz ariaan, ve ivovotia vaaru poia le irau yes Roma tikisi, ve tiravu izala ai pambaroon. Eemon Petrus loolo pa imaat raraate imin Krisi mako. Tauvene isaav pa yes zaaba gha tiravu daaba izi, ve aaghe iza. *

21:19: Mk 1:16+; 2Pe 1:14

* **21:20:** Yo 13:23+

²⁴ Mbiwa tawe, ta ighit katin gabua isov tana, ve ibodeer zi ila rau tane. Leso ipariaan saveen to Yesu, ve tamtamon tighur ila tooni. Ve yei niwatagh: Saveen tooni, ene onoon kat. *

Saveen tau ipasov rau tane

²⁵ Yesu igham uraat katini. Eemon tibood zi tisov ila rau mako. Tibood enaenja mon. Ve imin ta tibood uraat tooni isov ila rau, kanan rau tana ivot imin ndiɲndiɲ le ipavon taan isov, ve siriv lezi niazi mako! *

* **21:24:** Yo 19:35 * **21:25:** Yo 20:30

Maaron Saveen Tooni Patabuyaana
The New Testament and portions of the Old Testament
in the Tuam dialect of the Saveeng language of Papua
New Guinea. The Saveeng language is also called the
Mutu language.
Sampela hap Buk Baibel long tokples Saveeng Tuam
long Niugini.

copyright © 2011 Wycliffe Bible Translators, Inc.

Language: Saveeng (Mutu)

Dialect: Tuam

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-31

PDF generated using Haiola and XeLaTeX on 11 Nov 2022 from source files dated 9 Oct 2020

adb844f0-d769-5b05-9dd0-7c01fca938bb